


# Awara Baibel



Genesis, Ruth, and Jonah in the Awara Language of Papua New  
Guinea

**Awara Baibel**  
**Genesis, Ruth, and Jonah in the Awara Language of Papua New Guinea**  
**Buk Stat, Rut, na Jona long tokples Awara long Niugini**

copyright © 2011 Wycliffe Bible Translators, Inc.

Language: Awara

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-12-29

---

PDF generated using Haiola and XeLaTeX on 11 Nov 2022 from source files dated 9 Oct 2020  
901be67c-3025-58b6-81c0-9c823153f0ef

## Contents

Awara Bible . . . . .	1
Yakap . . . . .	2
Rut . . . . .	78
Jona . . . . .	83
Wam Yäpuli . . . . .	87

# Awara Bible

## Genesis, Ruth, and Jonah in the Awara Language of Papua New Guinea

### Awara Baibel long tokples Awaralong Niugini [awx]

Translation: © 2011, Wycliffe Bible Translators, Inc.

Web version  
2015, Wycliffe Bible Translators, Inc.  
[www.Wycliffe.org](http://www.Wycliffe.org)

<http://pngscriptures.org>

[www.ScriptureEarth.org](http://www.ScriptureEarth.org)

This translation is made available to you under the terms of the Creative Commons license (Attribution-Noncommercial-No Derivative Works).  
<http://creativecommons.org/licenses/by-nc-nd/3.0>

**Your are free to share** — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

**Notice** — For any reuse or distribution, you must make clear to others the license terms of this work.

#### **Tok Orait**

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri.** Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating.** Na tu, **yu no ken senisim Tok.**

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa. Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela.**

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela.**

## Yakap Hängä Yakap Alakinde Wam

### *Anätutä hängäläpä pahawän yiwikin*

<sup>1</sup> Yakapde hikngä Anätutä kepkät yekäpkät yawän yiwikin. <sup>2</sup> U yawän yiwikin gwenune, kewu moyo wom yiwikut. Tiwän kupilä tākngatä yanggä gwende enetängä yiwikut. Tiwän Anätule Wawunggä yanggä unggwende enetängä kungapgut.

<sup>3</sup> Tixäwik Anätutä using yakut. “Kwakäpä tāknga tingalayok,” yawän, kwakäpä tāknga tingalakut. <sup>4</sup> Tiwän kwakäpä uläknganin kake, täke natäpgut. Tikengä kwakäpä tākngaxät kupilä tākngaxät matäkut. <sup>5</sup> Matake, kwakäpätäne umanä “kwakäpä” yang inikut. Tikengä kupilätäne umanä “kupilä” yang inikut. Tiwän täpduxu yakawu unggwenu tukwake kwakakut.

<sup>6</sup> Tiwänä Anätutä using yakut. “Yanggä matäwikge, wangga womdu yanggä bänäkängän tingalayok,” yawän, <sup>7</sup> inä u yakut using tike, uwomdä yanggä bänäkängän matäwän, yanggä käwutdu uwomde enetängä yiwän, käwutdu kematde yiwikut. <sup>8</sup> Tiwän wangga uwomu umanä “yekäp” yang inikut. Tiwän täpduxu 2 unggwenu tukwake kwakakut.

<sup>9</sup> Tiwänä Anätutä using yakut. “Yanggä yekäp gepbine yiwixaxu womdunekän täku yiwän, womdu koxolä yiwiyok,” yawän, inä u yakut using tikut. <sup>10</sup> Tiwän koxolä yiwikulu uwomu umanä “kep” yang inike, yanggä u päku yiwikulu umanä “yanggä gwen” yang inikut. Tikengä unin dayike, täke natäpgut.

<sup>11</sup> Tikengä hipdu using yakut. “Kep däkänetä songäsongä, pa, äwä nak yang alätnong. Tike salinä inäinäne alätnong,” yawän, inä u yakut using alakin. <sup>12</sup> Kep däkäne songäsongä, pa äwä nak yang doke, salinä inäinäne alakin. Tiwän unin dayike, täke natäpgut. <sup>13</sup> Tiwän täpduxu 3 unggwenu tukwake kwakakut.

<sup>14</sup> Tiwänä Anätutä using yakut. “Kwakäpä tāknga äwä kupilä tāknga yang tuwängutningge, kakalä gwenggwenu yekäwune alätnong. Tikengä hopä täpduk, gusit täpduk, äwä täpduxu inulung gwenggwenu yangu tuwängutning. <sup>15</sup> Itä yekäwune yiwike, kep däkäle kwakäpä imining,” yawän, inä u yakut using alakin.

<sup>16</sup> Anätutä kakalä inulungu gwenalä pahakut. Kakalänä inulung hikngä gwenu, kwakäpänele tahakut. Tikengä kakalänä mätekngä bimä gwenu, kupilänele tahake, kuminamkäyā pahakut. <sup>17-18</sup> Tikengä kep däkäle kwakäpä imike, kupilä tāknga kwakäpä tāknga yang matäke daying yiwitningge, yekäwune pewän yiwikin. Tikengä unin dayike, täke natäpgut. <sup>19</sup> Tiwän täpduxu 4 unggwenu tukwake kwakakut.

<sup>20</sup> Tiwänä Anätutä using yakut. “Yanggä gwenkätanu pis, hängä ulung pahanangäsä yangu meya yiwitnong. Tixawän kwäwitkäyā alake, enetängä wepmähikunong,” yang yakut. <sup>21</sup> Hängä inulung hikngä täpäläpä yanggä gwenkätan yiwixaying äwä hängä undä ulung tahake yanggä gwenkätanu meyā yiwixaying yangu, inäinäne pahakut. Tixäwik kwäwitkäyā inäinäne undä pahakut. Tikengä unin dayike, täke natäpgut.

<sup>22</sup> Tikengä hängä u pahakulu, wam gwalängu using yämikut. “Pisu duksäng sakngälake, yanggä gwenu yiwä dopsok. Tixawän kwäwitkäyā

kewune meyä sakngälätngong,” yakut. <sup>23</sup> Tiwän täpduxu 5 unggwenu tukwake kwakakut.

<sup>24</sup> Tiwänä Anätutä using yakut. “Kälawu kep däkäne nanä inäinäne alätngong. Kälawu songäne nanä, kälawu äminsak äwä gwakgwak yangu inäinäne alätngong,” yawän, hängä inä u yakut using alakin. <sup>25</sup> Anätutä kälawu songäne nanä, kälawu äminsak, äwä gwakgwak yangu inäinäne pahake, unin dayike, täke natäpgut.

<sup>26</sup> Tikengä using yakut. “Äminu nihä bimä pahanim. Tiwän itä hängäläpä yanggäne nanä, kwäwilu enetängä nanä, kälawu songäne nanä, kälawu äminsak, äwä hängäläpä undä kep däkäne nanä yang daying yiwitning,” yake, <sup>27</sup> Anätutä äminu inä bimä pahakut. Wäwi mängälä yangu inä hikngä bimä pahakut.

<sup>28</sup> Tikengä wam gwalängu using yämikut. “Engangu meyä dukngisol. Tiwän unetä sakngälake, kewune yiwitake kuwä dopän, hänga undä daying yiwitngong. Tike pisu yanggäne nanä, äwä kwäwilu enetängä nanä, äwä kälawu kep däkäne nanä yangge kuhiläle yiwitngong,” yang yakut.

<sup>29</sup> Tikengä hipdu using yänikut. “Kätak natäpsol. Nätä naxu tämbam salin bimä,\* pa salin yangu undä naksäle daminggat. <sup>30</sup> Tiwän songäsongä undä kälap, kwäwit yanggä näningge yäminggat,” yawän inä u yakut using tikin.

<sup>31</sup> Tiwän Anätutä hängä undä u pahakulunin dayike, täke hikngä natäpgut. Tiwän täpduxu 6 unggwenu tukwake kwakakut.

## 2

<sup>1</sup> Anätutä kepkät yekäpkät pahake, hängäläpä undä inäinäne nomän hikngä pepulukut.

<sup>2</sup> Tiwänä täpduxu 7 gwendä kwakawänu, puyä awahapulukutde, moyo yiwikut. <sup>3</sup> Tike täpduxu 7 gwenu wam gwaläng imike, tahawän takwän tikut, inale puyä awahapulukutde, täpduxu unggwenune, inä Anätu moyo yiwikut.

### *Anätutä ämin pahakut*

<sup>4</sup> Wamu aläknga kepkät yekäpkät yawän yiwikindäne. Anätu Yawetä\* kepkät yekäpkät pahakutkätanu, <sup>5</sup> naxu puyäne nanä kep däkäne dondogin, inale Anätu Yawetä kep gomune hopä dolewän takut, tiwän äminu täpätu kep gomune doyiwiike, puyä dowahakut. <sup>6</sup> Tiwändeyä yanggä kewunetä akoxäwik, kep däkä tänguxawä kwikakut. <sup>7</sup> Tiwänä Anätu Yawetä kewu päke, ämin† kwätäluke, inä kwämanu käluk yiwitngäsä taknga nomnä gwäk puyäpä, äminu uläpä käluk yiwikut.

<sup>8</sup> Tiwänä Anätu Yawetä gusidä akonggak käwulune, Idenkätan puyä womdu pahakut. Tikengä äminu uläpä kwätälukulu une tewän yiwikut. <sup>9</sup> Tixawän Anätu Yawetä pahawän, puyä ulängäne pa kepkätandä inäinäne meyä dopgin. Pa kayitä dayipä takäningge äwä salinä alawä näningge yang pekut. Ile bänäkänkätanu pa däkäyalä. Däkätule salin nakengu käluk yiwitngäsä, tiwän däkätule salin nakengu nomän bä wäyi yang natäpnangäsä pekut.

<sup>10</sup> Puyä ulängäle yanggä imikge, yanggä dupitu Idenkätandä tewän sipgut. Yanggä undupinetäkän upuke, inäinä sipmäke kukinu unekänu 4. <sup>11</sup> Yakap

\* **1:29:** Naxu tämbam salin bimä sänggum, wit, bali, rais yang. \* **2:4:** Yawe yangu Anätule uman. Hibrü wamune alemgin. Tiwändeyä äpmasimu takwän yake, Täkeläpä yang inikaying. † **2:7:** Hibrü wamune ‘adam’ yangu yäpuli ämin bä wäwi. Tiwän ‘adamah’ yangu yäpuli kep. Wamu uläkngayalu guläkngä usäkän bimä.

dupi umanä Pison. Undupi asipmäke, ku Hawilale kewune kunggak. Kewu uwomu golu käyâ. <sup>12</sup> Golu uwomune nanä nomän. Tiwän uwomune pa inuxu kâpängä gwälam hikngä äwâ huwu gwälam hikngä umanä oniks yang yänikayingu käyâ. <sup>13</sup> Yanggä käwutdu dupi umanä Gihon. Undupi asipmäke, ku Käs kep womune kunggaxunin. <sup>14</sup> Yanggä käwutdu 3 dupi umanä Taigris, Asutde gusitdä akonggak käwut sipmänggaxunin. Tiwän 4 dupi umanä Yupretis.

<sup>15</sup> Anätu Yawetä äminu uläpä puyä ulängä kang yiwikge une tekut. <sup>16</sup> Teke wamu kitokngä hikngä täkngatu using inikut. “Gä pa salinu puyä alängäne nanä täkekän näyo. <sup>17</sup> Tiwändeyä pa nomän bä wäyi yang natäpnangäsä däkätäne salinä manäyo, inale änakengu, täpduxu inä unggwenunekän kupiläk,” yang inikut.

<sup>18</sup> Tikengä Anätu Yawetä “Äminu inäkän yiwänu nomänundo. Ge gatäkgatäkngäle notnä täpätu tahawit,” yake, <sup>19</sup> kepdä kälawu kewune nanä äwâ kwäwilu enetängä nanä pahakut yangu “Äminu uläpätä dayike umanä dasingga yäniwik?” yake, päkapgut. Tiwän itä dayike, umanä dasingga yänikulu, umanä unin. <sup>20</sup> Äminu uläpätä kälap, kwäwit äwâ hängäläpä ämindä daying yiwitnangäsä yangu umanä undä yänikut. Tike teyä gatäkgatäkngäle äläwambän malikut.

<sup>21</sup> Ge Anätu Yawetä tahawän, äminu uläpä däpmunä kupsä hikngä pekut. Awexawänä, äminu uläpäle täkäpulä täpätu täkengä, hipdu gupnätä tahang umukut. <sup>22</sup> Tikengä mängälä täpä äminu uläpäle täkäpulä täkutdä kwätälukut. Tikengä mängälä uläpä wäwi uläpätä käwikge täkapgut.

<sup>23</sup> Täkapän kakuläkaxäwik using yakut. “Ile kwätänu näle kwätän, tiwän ile guwu näle gup. Äminu uläpä wäwile tängänetä kwätälukut. Ge umanä ‘mängälä,’”† yang yakut. <sup>24</sup> Ge ile tiwän, wäwi nanämingä peke, mängätinäxät unekän gatäke yiwä, gupnä buläkänu däkngäkaying.

<sup>25</sup> Wäwi uläpäxät mängätinäxälu belum yiwixäwik geyä, domäyäkakumäläk.

### 3

#### *Äminu uläpäyatdä Anätule wam upukumäläk*

<sup>1</sup> Anätu Yawetä hängä dakngä käyâ pahakutkätanu, gomoxu äminu kem yänikäxäluwikge nomän hikngä. Ge mängälä täpä yawänyaxu using inikut. “Anätutä ‘Pa salinu puyä alängäne nanä manahol,’ yangu hiyäkände hikngä danikut?” yang inikut.

<sup>2</sup> Iniwän mängälä täpätä using inikut. “Pa salinu alängäne nanä täke nahim. <sup>3</sup> Tiwändeyä Anätutä using ninikut. ‘Pa puyä bänäkän nanä däkäle salinu manahol. Tike kätakgaxäyâ malahol. Using tahakengu axumsimäläk,’ yang ninikut,” yang inikut.

<sup>4</sup> Yawän gomokgä inikut. “Doxumsimäläk. <sup>5</sup> Anätu using natäpgut. ‘Unin nakengu, kayi kakalä tining. Tiwän nina bimä däkngake, nomän bä wäyi yang natäpsimäläk,’ yang natake usingu ile danikut,” yang inikut.

<sup>6</sup> Mängälä täpätä pa undäkäle salinu kayitä dayipän, nomän tiwä, nänangäsä tikin. Tiwän unin napän, natädetdetnä käyâ tiwikge natäpgut. Ge unin päke naxäwik, käwutdu ayäle imän nakut. <sup>7</sup> Unin napät, natädetdetnä kakalawä, “Belum yiwixamäk,” yang natäpgumäläk. Tikengä pa “fixu” däkätule täm päke, gupnä wamäng umukumäläk.

† 2:23: Hibru wamune ‘wäwi’ äwâ ‘mängälä’ yangu guläkngä usäkän bimä.

<sup>8</sup> Tukwatde kewu axwikaxawän, wäwi täpä äwä mängätnä yanggä natäxawälu, Anätu Yawe puyä tängäne apuhiwän kake, pa yäpuli däkändäkaxätan kohopikumäläk. <sup>9</sup> Tiwändeyä Anätu Yawetä wäwi täpä using inikut. “Adam, gä sandan?” yawän, <sup>10</sup> using yakut. “Puyäxätan apuhiwi kake, nä belum yiwitde äanaxälake kohoppingat,” yakut.

<sup>11</sup> Yawän Anätutä inikut. “Gä belum yangu imindä ganik? Pa salinu don-apiläkge ganikumu imindä ganiwän naläk?” yawän, <sup>12</sup> Adamdä “Mängälä näxätde tekuläxu aläpätä pa salinu notnä anamän nat,” yang inikut.

<sup>13</sup> Tiwän Anätu Yawetä mängälä uläpä “Uläknga inale tahaläk?” yang iniwän, mängälätä “Gomokgä kem naniwän nat,” yakut.

<sup>14</sup> Yawänä Anätu Yawetä gomoxu using inikut. “Uläknga tahaläkge, tokngä wam yäwa, gä gikakän tokngä däkä päpiläk. Tike kälawu äminsak äwä songäne nanä yangu tokngä dowäning. Gä täpduktäpduk yiwiläxu, kep däkäne muhipdatä pengwähake tihikuxawi, muluwu mapdaxätan kopning. <sup>15</sup> Tiwän nätä pahawa, gäxät mängälä täpaxät iwaliwalnä däkngahimäläk. Tiwän gäle bapuka mängälä täpäle bapunä yangkäyä usäkän yiwitake kuning. Tiwän ile bapunätä kuhitda yayiwä, gätä bälängäne yähawiläk,” yang inikut.

<sup>16</sup> Inikengä mängälä täpä using inikut. “Engangga tängäkane kaya tiwänu, meyä däkä gamit. Tiwän tokngämbam päxawik, engangu dukngiwiläk. Tike teyā apdale natänggämätawi, itä kuhitdale yiwik,” yang inikut.

<sup>17</sup> Inikengä, wäwi uläpä using inikut. “Mängätale wam gwälamike, pa salinu donapiläkge kitokngä ganikumu naläk. Ge gäle tiwän, tokngä wam yäwa, kep däkä maliwik. Ge täpduk täpduxu yiwiläxu, tokngämbam päxawik, kep däkä yamäpuke, puyä pahawiläk. <sup>18</sup> Tiwän unetäkänu kep däkäne songäsongä pälangänä käyä doke bupning. Tiwän kwätäl pahakengä, naxu puyäne nanä napiläk. <sup>19</sup> Puyä mepgämän bulak pahawiyä, naxu alawä napiläk. Usinggän pahahika, hipduka kewune kuwiläk, inale gä unetä alakuläk. Gä kepdä kwätalukum. Ge hipduka kep däkäne kuwiläk,” yang inikut.

<sup>20</sup> Adamdä mängätnä “Äminbamu käluk yiwitning täpäläpäle apekngä däkngawik,” yake, umanä Iv\* yang inikut.

<sup>21</sup> Anätu Yawetä täwixu kälap gupdä Adamkät Ivkätde pahake yämikut. <sup>22</sup> Tikengä using yakut. “Wäwi aläpä nihä bimä andäkngake, nomän bä wäyi yangu anatäxak. Ge pa käluk yiwitnangäsä däkätäne salinä nake, käluxu iwikge yiwiyäk” yake, <sup>23</sup> puyä Idenkätanu ulängänetä täwakut. “Anätu Yawetä äminu uläpä kepdä kwätalukum. Ge äminu uläpä kewu undäkäne yamäpuke pahawik,” yake, <sup>24</sup> täwambän epuxukut. Tiwän puyä ulängä gusitdä akonggak käwutkätan, ängela kerup yang yänikaying täpäläpaxät gwäwäyä täpätuxät pewän kang yiwikin. Keruwu uläpäläpä kitokngänä kayä. Tiwän gwäwäyä uläpäne, däki ayähakoxawä kungapgut. Anätutä unin pewän, itä pa käluk yiwitnangäsä däkäle kahilu kang yiwikin.

## 4

### *Ken Abel yangge wam*

<sup>1</sup> Adamu mängätnä Ivkät yiwikumäläk. Tiwän tängene käyä tiwänä, wawakngä täpätu dukngikut. Tikengä “Yawetä gatängamän, wäwi täpätu kake tät,” yake, umanä Ken\* yang inikut. <sup>2</sup> Tikengä yiwitake kuhika, Kende

\* **3:20:** Hibru wamune ‘Iv’ yangu yäpuli käluk yiwitnangäsä täknga. \* **4:1:** Hibru wamune ‘Ken’ äwä ‘alät’ yangu guläkngä usäkän bimä.



ulawu, Abel, dukngikut. Uläpâyalu inulung täpâyat tike, Abelu sipsip daying yiwixawän, Kenu nak puyä pahakakut.

<sup>3</sup> Gwendune Kendä naxu puyäne nanä päke, Yawele ofa tahakut. <sup>4</sup> Tixawän Abelu sipsip mätexu yakap pekin gwengwenu ofale päkut. Tikengä sipsip mätexu sipmäke matäke, gwaxu nomängän tahakut, ofanän. Unin imän, Yawetä Abelkät ofanäxätde täke natäpgut. <sup>5</sup> Tike Kenkät ofanäxätde mähe natäpgut. Ile tiwän Kenu tokngä hikngä natäpän, nomnä malikin.

<sup>6</sup> Tiwän Yawetä Kenu using inikut. “Tokngä inale natäxäläk? Nomda inale malikaying? <sup>7</sup> Nomän täknga tahawi gandupa, täke tiwik yangu donatäläk? Tike nomänu dolahawi, wäyi täknga angguwikge yämäkane yiwixak. Kuhitdale yiwikge natänggämatanggak. Tiwändeyä gäta yapmike, ile kuhiläle yiwike, wäyi täknga mawahayo,” yang inikut.

<sup>8</sup> Tiwänä Kendä ulapnä iniwän, songäxätan kukumäläk. Täku une tänguwän kumgut.

<sup>9</sup> Tiwänä Yawetä Kenu using inikut. “Ulapda Abelu sandan?” yang iniwän, Kendä using inikut. “Doxat. Inale naninggaläk? Nä ile kula tahanggalunin?” yang inikut.

<sup>10</sup> Tiwän Yawetä using inikut. “Wäyi uläknga inale tahaläk? Natäpso. Ulapdale daxu kepkätandä kwänämu näle tikgak. <sup>11</sup> Gätä notda tänguwi kupän, ile daxu kepkätan kuying. Ge tokngä wam yake, kewu awomunetä gäwämba kuwiläk. <sup>12</sup> Ku kewune puyä pahawi, naxu doalätning. Tiwän gä yotda wenä tiwän, kep gomune täwake tihikuwiläk,” yang inikut.

<sup>13</sup> Tiwän Kendä yakut. “Meyä namläxu inulung hikngä. Nätä pänangäsändo. <sup>14</sup> Kewu awomunetä gäle nomune doyiwitde anäwaxäläk. Yotna wenä tiwän, kep gomune tawake tihikuwa, imindäka nandukengu, anuwän kupit,” yang yakut.

<sup>15</sup> Yawän Yawetä inikut. “Äminu täpätutä guwän kupi, meyä gäle gamilu ayapmike, meyä <sup>7</sup> inulung äminu uläpätä päpik,” yang inikut. Tikengä “Ämindä kake, tänguwä kumsäk,” yake, Kenu tuwäng tengämikut.

<sup>16</sup> Tiwän Kenu Yawe äwä kewu Ideno uwom yang peke, gusitdä akonggak käwutkätan kewu womdu, umänä “Tihikuktihikuk” uwomune päku yiwikut.

<sup>17</sup> Tikengä mängätnäxät yiwihika, mängätnä tängene käyä tiwän, wawakngä Enok dukngikut. Tiwän Kendä yolu gäpangu tahake, unggäpangu Enok yang inikut. <sup>18</sup> Tiwänä yiwitake kuhika, Enokgä wawakngä Irat towimbänä, Iratdä Mehujael towimbänä, Mehujaeldä Metusael towimbänä, Metusaeldä Lamek towikut.

<sup>19</sup> Tiwänä Lamexu mängätnä täpâyälä päkut. Täpätu umänä Ada, tiwän täpätu Sila. <sup>20</sup> Ada Jabal dukngikut. Tiwänä Jabalde bapunä mahande alakindä selyot päku kewu womduwomdu tapike yiwixäwik, kälawu äminsak towikakin. <sup>21</sup> Jabalde ulawu umänä Jubal. Tiwänä Jubalde bapunä mahande alakindä gita sipmäxäwik, pipip puyäkakin. <sup>22</sup> Silaxäyä wawakngä dukngikut. Umanä Tubal-Ken. Itä hängä puyä pahanangäsä bä amäk pahanangäsä yangu ain äwä kapa yanggä pahakut. Tiwän haminäle manu Nama.

<sup>23</sup> Gwendune Lamekgä mängätnä using yänikut.

“Adaxät Silaxät, natäxasol.

Mängätna, wamu nätä yäwa, mäläk pähol.

Äminu täpätutä dak nuwänu, nätä äminu uläpä alänguwa kupik.

Tike wawakdäkä täpätutä nä nuwänu, ixäyä kupsäle tänguwit.

<sup>24</sup> Äminu täpätutä Ken tängukengu, meyä 7 inulung päpik.

Tiwändeyä äminu täpätu nä nukengu, meyä Kendäne ayapmike, inulung hikngä 77 päpik,” yang yänikut.

<sup>25</sup> Adamu mängätnäxät hipdu yiwikumäläk. Tiwänä mängätnätä wawakngä täpätu dukngike, “Kendä Abel tänguwän kumgutde, Anätutä engangu Abelde tangge namik,” yake, umanä Set† yang inikut. <sup>26</sup> Tiwänä yiwitake kuhika, Selu wawakngä towike, umanä Enos yang inikut. Täpduxu unggwengwenkätanu ämindä tumuxu Yawele käluk yakin.

## 5

### *Adamde bapunämbam*

<sup>1</sup> Wamu aläknga Adamde bapunä yiwitakapgingdäne temginunin. Anätutä ämin pahakengu, inä bimä pahakut. <sup>2</sup> U pahakulu wäwi, mängälä yang pahake, bänip kwikwik yämikut. Tikenga umanä “ämin” yang yänikut.

<sup>3</sup> Tiwän Adamu krismasnä 130 yiwikengä, wawakngä inä hikngä bimä towikut. Towikengä umanä Set yang inikut. <sup>4</sup> Tikengä krismasu 800 yiwixäwixu, wawak yäpanä towikut. <sup>5</sup> Unekänu krismasnä 930 yiwike kumgut.

<sup>6</sup> Tiwän Selu krismasnä 105 yiwikengä, Enosde nanä däknagakut. <sup>7</sup> Tikengä krismasu 807 yiwixäwixu, wawak yäpanä towikut. <sup>8</sup> Unekänu krismasnä 912 yiwike kumgut.

<sup>9</sup> Tiwän Enosu Krismasnä 90 yiwikengä, Kenande nanä däknagakut. <sup>10</sup> Tikengä krismasu 815 yiwixäwixu, wawak yäpanä towikut. <sup>11</sup> Unekänu krismasnä 905 yiwike kumgut.

<sup>12</sup> Tiwän Kenanu krismasnä 70 yiwikengä, Mahalalelde nanä däknagakut. <sup>13</sup> Tikengä krismasu 840 yiwixäwixu, wawak yäpanä towikut. <sup>14</sup> Unekänu krismasnä 910 yiwike kumgut.

<sup>15</sup> Tiwän Mahalalelu krismasnä 65 yiwikengä, Jaretde nanä däknagakut. <sup>16</sup> Tikengä krismasu 830 yiwixäwixu, wawak yäpanä towikut. <sup>17</sup> Unekänu krismasnä 895 yiwike kumgut.

<sup>18</sup> Tiwän Jarelu krismasnä 162 yiwikengä, Enokge nanä däknagakut. <sup>19</sup> Tikengä krismasu 800 yiwixäwixu, wawak yäpanä towikut. <sup>20</sup> Unekänu krismasnä 962 yiwike kumgut.

<sup>21</sup> Tiwän Enoxu krismasnä 65 yiwikengä, Metuselale nanä däknagakut. <sup>22</sup> Tikengä Anätuxät gatäke yiwikumäläxu, krismasu 300 yiwikut. Yiwixäwixu, wawak yäpanä une towikut. <sup>23</sup> Unekänu krismasnä 365 yiwikut.

<sup>24</sup> Tiwänä Anätuxät gatäke yiwike, Anätutä täkut. Tiwän doxakin.

<sup>25</sup> Tiwän Metusela krismasnä 187 yiwikengä, Lamekge nanä däknagakut. <sup>26</sup> Tikengä krismasu 782 yiwixäwixu, wawak yäpanä towikut. <sup>27</sup> Unekänu krismasnä 969 yiwike kumgut.

<sup>28</sup> Tiwän Lamexu krismasnä 182 yiwikengä, wawakngä towikut. <sup>29</sup> Dungkengä, using yakut. “Yawetä tokngä wam yake, kep tahawän malikutde, puyä kitokngä pahake, meyä päkamäng. Tiwändeyä mahande engangu aläpätä yiwitakaxu äpme nimik,” yang yake umanä Noa\* yang inikut. <sup>30</sup> Tikengä krismasu 595 yiwixäwixu, wawak yäpanä towikut.

<sup>31</sup> Unekänu krismasnä 777 yiwike kumgut.

<sup>32</sup> Tiwän Noa krismasnä 500 yiwikengä, Sem, Ham, Jafet yangge nanä däknagakut.

† 4:25: Hibru wamune ‘Set’ äwä ‘anamik’ yangu guläkngä usäkän bimä. \* 5:29: Hibru wamune ‘Noa’ äwä ‘yiwitakak’ yangu guläkngä usäkän bimä.

## 6

*Äminu yiwiyiwikngä gutongä yiwikin*

<sup>1</sup> Äminu kewune yupsänggän sakngälaxäwik, yäpanä dukngikin. <sup>2</sup> Tixawän Anätule wawak täpäläpätä äminde yäpa dayipä, gwälam hikngä tixawä, daying butaxäwik, mängätnäle päkin. <sup>3</sup> Tiwän Yawetä using yakut. “Äminu kitokngänä wenä. Ge käluk iwikiwixu dowewa yiwitning, kewunen. Tike krismasu 120-kän yiwixäwik kunning,” yang yakut.

<sup>4</sup> Tiwän täpduxu uwomkätan äwä mahande yiwikin yangu Anätule wawakgä äminde yäpa päpä, ixät yiwike, engangä dukngikinu äminu äyapmike, inulung hikngä täpäläpä tākake, kitokngänä käyā tikin. Tiwän umanä käyā tikin.

<sup>5</sup> Tiwän Yawetä dayipänu, äminbamu yiwiyiwikngä kekem hikngä tiwän, bäniyäne wäyi pahaninggekän natänggämätakin. <sup>6</sup> Tiwän äminu kewune pahakutde, meyä hikngä natäpğut. <sup>7</sup> Natäke yakut. “Äminu pahakumde, meyä natäxat. Ge äminu undä pahawa hopining. Hängä kewune yiwixaying äwä awepmāke tihikukaying yangu awahawa hopining,” yang yakut.

<sup>8</sup> Tiwändeyä Noale bänip gwaläng natäpğut.

<sup>9</sup> Noale wam. Noa äminomän täpä. Äminu kewu anggomune yiwikinkätanu Anätule kayine Noatakän gutongänä wenä yiwikut, inale Anätuxät gatäke yiwikumäläk. <sup>10</sup> Noale wawaxu täpäyalä täpätu. Umanä Sem, Ham, Jafet yang.

<sup>11</sup> Anätule kayine äminbamu notnä sipmāxäwik, wäyi hikngä yiwixakin. <sup>12</sup> Tiwän Anätutä dayipänu, kewune nanä äminu gutongä hikngä yiwikin. <sup>13</sup> Tinggawän Anätutä Noa using inikut. “Äminbamu äminsipmāk tāknga tahake yiwixaying. Ge hängä undä käluk yiwixayingu awahawa hopining. Hängä undä äwä kep gom yang pahawa hopining.

<sup>14</sup> “Ge gä siwu gwendu pa nomän päke tahayo. Tikengä okopixätanu ämindä yiwitningge äwä käläpdä yiwitningge, inäinä matäke peyo. Tikengä yanggätä kopnäng yakengu, okopi käwut kepmän käwut yangu koltatä pahayo.

<sup>15</sup> “Sip gwenu using tahayo. Belakngänä 140 mita, kwalangänä 23 mita, tiwän dämnä 13.5 mita tahayo. <sup>16</sup> Tiwänä nomnäne gänangä mätekngä hap mita tewi kungapsok. Tiwän yolu gwenälä gwendu pahayo; yäpuline gwendu, bänäkänu gwendu, äwä nomnäne gwendu yang. Tikengä yämä dākä teyo.

<sup>17</sup> “Nätä yanggä inulung tewa, kewu anggomu yiwikdoke pänguhiwik. Tiwän hängä kewune nanä käluk yiwixayingu undä pahawa hopining. Tiwän hängä undä käluk yiwixayingu axumning.

<sup>18</sup> “Tiwändeyä nätä kontraknga gäle tahawa, sip gwenu kopiläk. Gä, wawakga, ile mängätnä, äwä gika mängät yang kopning. <sup>19</sup> Gikaxät käluk yiwitningge, hängä haxalike tihikuke yiwixayingu ayä mängätnä yang päko peyo. <sup>20</sup> Hängä kewune tihikukaying, awepmāke tihikukaying yangu ayä mängätnä yang gäle apning, käluk yiwitninggen. <sup>21</sup> Ge naxu gika äwä hängä uläkwäk yanggä naningge, inäinäne peyo,” yang inikut.

<sup>22</sup> Tiwän Noa Anätutä yakut using tawake pahakut.

## 7

*Kewu anggwenu yanggätäkän yiwikdoke pänguhikut*

<sup>1</sup> Tãpdukngätã apãn, Yawetã Noa inikut. “Äminu ayiwixayingkätanu, nätä gandupa, äminomãnu gäkãn. Ge gin yãnggwãlu undã sip gwenkätan kopnong. <sup>2-3</sup> Gwaxu nomãnu\* inãinä, äwã kwãwilu inãinä, mãngälã 7, wãwi 7 yang pãyo. Tikengu gwaxu nomãnundo tãpãläpã, mãngälã gwendu, wãwi gwendu yanggãn pãtãke kuyo. Ge ulãkwãkgãyã kewune sakngãlawik. <sup>4</sup> Anggwenunetã tãpduxu 7 yiwikengã, hopã tewa, kwakãpãne kupilãne yang takuhixawãn, ku tãpduxu 40 apuxuwik. Tiwãn hãngãläpã kewu anggomune nina pekumu, undã pahawa hopining,” yang inikut. <sup>5</sup> Tiwãn Yawetã u yakut using tawake pahakut.

<sup>6</sup> Noa krismasnä 600 yiwixawãn, yanggätã kep gomu yiwikdoke pãnguhikut. <sup>7</sup> Noa, mãngãtnã, wawakngã, äwã wawakngãle mãngät yang, “Yanggätã nihipsãk,” yake, sip gwenune kopgin. <sup>8</sup> Gwaxu nomãn, gwaxu nomãnundo, äwã kwãwit yangu ayã mãngãtnã yang <sup>9</sup> sip gwenune kopgin, Anãtutã Noa inikut using. <sup>10</sup> Tãpduxu Anãtutã yakut using 7 gwendã apãn, yanggã une sipgin.

<sup>11</sup> Noa krismasnä 600 tixawãn, yekãwu 2 gwende tãpduxu 17 gwenune kep gomu gãnanggãnangãkãn tixawã, yanggã undandã akopgin. Tixawãn yekãpde yãmãxãyã wangga tixawã, <sup>12</sup> hopã takuhixawãn, ku tãpduxu 40 apuxukut.

<sup>13</sup> Inã tãpduxu unggwenunekãnu, Noa, mãngãtnã, wawakngã äwã wawakngã ulãkwãkge mãngät yang siwune kopgin. <sup>14</sup> Tiwãn hãngã kewune alihikuke yiwixaying, awepmãke tihikukaying, inulung, mãteknã yang undã kopgin. <sup>15</sup> Hãngã undã mepme pexayingu gwenalãnãxãyã apã, sipkätan Noaxãt using kopgin. <sup>16</sup> Anãtutã Noa inikut using, hãngã undã u kopginu, mangãtnã ayã yang kopgin. Tiwãnã Yawetã yãmã dãkã tahakuhikut.

<sup>17</sup> Tiwãnã yanggã kepkätandã akoxawã, hopã alakuhixawãn, tãpduxu 40 apuxukut. Yanggätã yiwikdoke, sip gwenu enen hikngã tãnganakut. <sup>18</sup> Yanggätã inulung hikngã yiwitexãwik, sip gwenu tãpãn tayikut. <sup>19</sup> Tiwãn unetãkãn yanggã inulung hikngã yiwitexãwik, tãwalu belakngã dãkãndãkã undã pãnguhikut. <sup>20</sup> Pãnguhike, tãwalu 7 mita ko yapmikut.

<sup>21</sup> Tikengã hãngã kewune tihikukaying, kwãwit, hãngã inulung, mãteknã äwã ämin yangu undã pãnguhiwãn kumgin. <sup>22</sup> Hãngã tãpã mepme pexãwik, kep dãkãne tihikuke yiwixayingu, undã hikngã kumgin. <sup>23</sup> Tiwãn hãngãläpã kep dãkãne nanã undã pahawãn hopikin. Tike Noaxãt siwune yiwikindãkãn kãluxu yiwikin.

<sup>24</sup> Tiwãn yanggã ayiwikut tãkngane using yiwixawãn, ku tãpduxu 150 apgut.

## 8

### *Yanggã gwenu yiwikulu aleke pukukut*

<sup>1</sup> Tixawãn Anãtutã Noa äwã hãngãläpã ixãt sipkätan yiwikinde natãke, kwãmanu tewãn puyãpãn, yanggã teke pukukut. <sup>2</sup> Tiwãn kep gomu gãnanggãnangã tiwã, yanggã akopginu gwãtnakin. Tixawãn yekãpde yãmãxãyã wangga tikinu apu umumbã, hopã dãkngakut. <sup>3</sup> Yanggã wepdãwepdã teke pukuxawãngãn, tãpduxu 150 apgut. <sup>4</sup> Tiwãn yekãwu 7 gwende tãpduxu 17 gwenune siwu tãku, tãwalu Alalatkätanu dãkãtune yiwikut. <sup>5</sup> Tixawãn yanggã hipdu teke pukuxawãn, yekãwu 10 gwende tãpduxu 1 gwenune tãwalde nomnã alanggãmãn tikin.

\* **7:2-3:** Gwaxu Anãtule kayine nomãnu, ofãle bã anananggengu tãke.

<sup>6</sup> Ge täpduxu 40 apänä, Noa sipde windua sike, <sup>7</sup> kápamu gwendu\* tatewän kungu, yanggä doleke pukukutnä kake, enetängä wepmähikuxawän, yanggä gwenu teke pukukut.

<sup>8</sup> Tiwän Noa yiwän maliwän, yanggä ambä teke pukuk yake, kombunanangu gwendu tatewän, wepmäke kukut. <sup>9</sup> Yanggätäkän yiwikutde, kombunanangu unggwenu ayiwitnangäsä wenä tiwän kake, hipdu wepmäke apän, täteket.

<sup>10</sup> Tikengä täpduxu 7 yiwike, kombunanangu unggwenu hipdu tatewän kukut. <sup>11</sup> Ku tihikuhika tukwatdeyä, pa “oliwu” däkätule tamu käluxu handu mayätä ihinggängänuke, takapän kakut. Unin kakengä, Noa “Yanggä gwenu aleke pukukngä tinggak,” yangu natäpgut.

<sup>12</sup> Tikengä hipdu täpduxu 7 yiwike, kombunanangu tatewän kukengu, doapgut.

<sup>13</sup> Noa krismasnä 601 tixawän, yekäwu 1 gwende täpduxu 1 gwenune yanggä gwenu teke pukukut. Tiwän sip gwen tahangumukulunin wäsike, unetä kewu koxolä bimä alikutnä kakut. <sup>14</sup> Tixawänä yekäwu 2 gwende täpduxu 27 gwenune kep gomu koxolä hikngä tikut.

<sup>15</sup> Tiwän koxotawänä, Anätutä Noa inikut. <sup>16</sup> “Gika, mängätäda, wawakga, äwä wawakgale mängät yangu teke epuxuxut, sip gwenun. <sup>17</sup> Hängä undä gäxät yiwixayingu, kewune sakngälake yiwitake kuwä dopikge, päke epuxuyo,” yang inikut.

<sup>18</sup> Tiwän Noa, mängätinä, wawakngä, äwä wawakngäle mängät yangu siwu teke epuxukin. <sup>19</sup> Tixawän kälap, kwäwit, gwakgwak, undä uläpäläpähimkäyä teke epuxukin.

<sup>20</sup> Tiwän Noatä alta tahake, gwaxu nomän äwä kwäwilu nomän yangu gwendu gwendu päke sipmäke, däkine Yaweke hakut. <sup>21</sup> Häwän, Yawetä ile kápangu gwälam tiwän natake, bäniyäne using natäpgut. “Äpmanu ämindä yiwikmaliwä, kewu andäka tokngä wamu hipdu dohikngä yake tahawa maliwik. Engangunetä äminbamu wäyi takngäläknga pahaninggekän natänggämätäkaying. Tiwändeyä mahande u pahawa malikin usingu, hängäläpä undä käluk yiwixayingu dowahawa malining. <sup>22</sup> Ge unin. Kewu anggomu using yiwixawängän, puyä dändän, bulä nak pänangäsä dändän, o gusit dändän, hopä dändän, kwakäpä bä kupilä yanggäkän apukaning,” yang yakut, Yawetän.

## 9

### *Anätutä kontraxu Noale tahakut*

<sup>1</sup> Anätutä Noa, wawakngä yangu wam gwälängu using yämikut. “Ginu engangu meyä dukngitnong. Tiwän unetä sakngälake, kewune yiwitake kuwä dopsok. <sup>2</sup> Tiwän kälawu undä kep däkäne nanä, kwäwilu enetängä nanä, äwä pisu yanggäne nanä yangu ginde kätaxune pexat. Ge gindä kuhiläle yiwä, itä dandung naxälätning.

<sup>3</sup> “Naxu puyäne nanä tupä damikum usinggän, käläpkäyä using näningge daminggat. <sup>4</sup> Tiwändeyä gwaxu dakngäxälu manänong, inale käluk yiwitnangäsä taknga daxune yiwixak. <sup>5</sup> Tike äminu täpätutä ämin notnä tänguwän kupänu, yäkwäle ile dakge nätä tokngä däkä imit. Tike kälawu täpätutä äminu täpätu tänguwän kupänu, ixäyä kupsäle tänguwit, <sup>6</sup> inale Anätutä äminu inä bimä pahakut. Ge imindäka äminu täpätu tänguwän kupänu, äminu uläpä ämin notnä tänguwä kupik.

\* **8:7:** Kwäwilu kápam bimä, kwayit wamune kotkot yang yänikaying.

<sup>7</sup> “Ginu, engangu meyä dukngitnong. Tiwän kewune äminu meyä yiwitning,” yang yänikut.

<sup>8</sup> Tikengä Anätutä Noa wawakngä yangu hipdu using yänikut. <sup>9-10</sup> “Nätä kontraknga gin, bapuhä mahande yiwitning, hängä undä ginkät yiwike siwunetä epuxuying, äwä kewune nanä undä mahande yiwitning yangge tahanggat. <sup>11</sup> Kontraknga using tahanggat. Hipdu hängä käluk yiwixayingu undä yanggätä doyäwa pahawän hopining. Tiwän kewu anggomkäyä yanggätä doyäwa tahawän maliwik,” yang yänikut.

<sup>12</sup> Yänike, unetäkänu using yänikut. “Kontraxu gin äwä hängäläpä käluk yiwixaying yangge tahake, tuwängu täkngatu textat. Ge kontraxu aläknga iwikge yiwixäwik. <sup>13</sup> Kontraxu kewune nanäle tahanggalu uläkngale tuwängge, sawilakwäna mingädäkäne textat. <sup>14</sup> Yekawune mingändäkä pewa umumbä, sawilakwändä une alawänu, <sup>15</sup> kontrakngale natäpit. Tikengä hängäläpä käluk yiwixayingu undä yanggätä hipdu dowahawa malining. <sup>16</sup> Sawilakwänu mingändäkäne alawän kakengu, kontraxu iwikiwik yiwikge, ginu kep däkäne nanä undäle tahanggalu uläkngale natäpit. <sup>17</sup> Kontraxu kep däkäne nanä undäle tahat täkngale tuwängu uläknga textat,” yang yänikut.

### *Noaxät wawakngäxät*

<sup>18</sup> Noale wawaxu siwunetä epuxukinu, Sem, Ham, Jafet yang. Tiwänä Hamu wawakngä täpätu umanä Kenan. <sup>19</sup> Noale wawaxu aläkwäkgä äminu undä kep däkäne yiwixayingge bapunä däkngakin.

<sup>20</sup> Noa nak puyä pahakakut. Pahake yakapde itä wain puyä pahakut. <sup>21</sup> Gwendune Noa wain tängoke datdawuke, täwikngä päpän epä, selyotnäne belum pekut. <sup>22</sup> Tixawän Hamu Kenande nanä, selyolune ko, nanä belum pekgawän kake, epuxu notnä täpäyalu yänikut. <sup>23</sup> Yäniwän Semkät Jafetkätdä täwixu kwämbätdu täke, gwälamnäne mehe käwut mapät epgut. “Nanit kähäm,” yake, mahatä täko, nanä omikngämikumäläk.

<sup>24</sup> Noa andatdawukulu wenä tiwä enake, wawakngä wasekngä täpätä u tahakulunin natake, using inikut. <sup>25</sup> “Kenanu tokngä däkä päpik. Notnäle gepbine yiwixäwik, ile puyä däkä pahangyämik,” yang inike, <sup>26</sup> unetäkänu using yakut. “Yawe, Semde Anätunä, ile uman yatängenatnim. Tiwän Kenanu Semde gepbine yiwixäwik, ile puyä däkä pahangämik. <sup>27</sup> Anätutä tahawän, Jafelu bapunä meyä tiwä, kewune yiwitake kuning. Tiwän Jafetde bapunäxät Semde bapunäxälu unekän gatäke yiwitning. Tiwändeyä Kenanu Jafetde gepbine yiwixäwik, ile puyä däkäxäyä pahangämik,” yang yakut, Noatän.

<sup>28</sup> Yanggä gwendä yiwikdoke pänguhiwän, Noa krismasu 350 yiwikut. <sup>29</sup> Unekänu krismasnä 950 yiwike kumgut.

## 10

### *Noale wawakge bapunämbam*

<sup>1</sup> Kewu yanggätä yiwikdoke pänguhiwän, Noale wawaxu Sem, Ham äwä Jafet yanggä wawakngä towikindäne.

### *Jafetde bapunämbam*

<sup>2</sup> Jafetde wawaxu umanä Gomer, Magok, Madai, Jawan, Tubal, Mesek, äwä Tiras yang.

<sup>3</sup> Tiwänä Gomerde wawaxu umanä Askenas, Ripat, äwä Togama yang.

<sup>4</sup> Tiwän Jawande wawaxu umanä Elisa, Tasis, äminu Saiprus nanä, äwä Dodan nanä yang. <sup>5</sup> Unetä sakngälawän uhike, yanggä kwayimune päku, bapunäne, wamnäne ku kepnä päxäwik, kantrinä inäinä yiwikin.

### *Hamde bapunämbam*

<sup>6</sup> Tiwän Hamde wawaxu umanä Kus, Isip, Libia, äwä Kenan yang.

<sup>7</sup> Tiwänä Kusde wawaxu umanä Seba, Hawila, Sapta, Rama, äwä Sapteka yang. Tiwänä Ramale wawaxu umanä Seba äwä Dedan yang.

<sup>8</sup> Inä Kusde wawakgänu täpätu umanä Nimrot. Uläpä kitokngänä inulung tiwän, yolu gäpangguyine nanä äminu axu sipmäxäwik, kuhiläle yiwikut. <sup>9</sup> Yawetä Nimrotde natdetdelu nomän imän, kälawu buläkän sipmäkakut. Ile tiwän using yäkaying. “Yaweke kayine äminu uläpä Nimrotdä bimä nomän sipmänggak,” yangun. <sup>10</sup> Yolu yakapde pahake yiwikut gäpanggäpangu umanä Babilon, Erek, Akat äwä Kalne yang.\* Yolu unggapanggäpangu Babiloniale kewunekän yiwixakin. <sup>11</sup> Nimrotdä Babiloniale kep teke, ku Asiriale kewune taunu inulungu gäpangguyi pahakut. Umanä Niniwe, Rehobotir, Kala, <sup>12</sup> äwä Resen yang. Resenu Niniwe äwä Kala yolu inulung hikngä unggapangatde bänäkängän yiwixakut.

<sup>13-14</sup> Isiwu äminu Lidia nanä, Anam nanä, Lehap nanä, Naptu nanä, Patrus nanä, Kaslu nanä, äwä Krit nanä yangge bapunä däkngakut. Filistia nanä Kaslutä towimbän, unetä sakngälakut, äminu unin.

<sup>15-18</sup> Saidonu Kenande wawaxu yakap täpänin. Tiwän Kenanu Hit nanä, Jebus nanä, Amor nanä, Girgas nanä, Hiwi nanä, Arka nanä, Sini nanä, Arwat nanä, Semar nanä, äwä Hamat nanä yangge bapunä däkngakut. Kenan nanä unetä sakngälake, päku yolu inäinä yiwitake kukin.

<sup>19</sup> Tiwän Kenande kewu using päkin. Saidondä ku taun Gerar ku Gasa kukut. Tiwän unetä täpän täkwämbän, gusitdä akonggak käwut ku, taun Sodom, Gomora, Atma, Seboim yang kukut. Lasale kewune wäkngäsim, Seboimun.

<sup>20</sup> Äminu aläkwäxu Hamde bapunä. Bapunäne wamnäne upuke, kepnä äwä kantrinä yangu inäinä päke yiwikin.

### *Semde bapunämbam*

<sup>21</sup> Jafetde ulawu Semkäyä wawakngä towikut. Tiwän Semde wawaxu unetä sakngälake dukngikinu bapunä täpätu Eber. Tiwänä Semu Eberunetä sakngälakin täkwäkke bapunä. <sup>22</sup> Semde wawaxu umanä Elam, Asur, Apasat, Lidia äwä Aram yang. <sup>23</sup> Tiwänä Aramde wawaxu umanä Us, Hul, Geter äwä Mas.

<sup>24</sup> Apasatde wawaxu Sela. Tiwänä Selale wawaxu Eber.

<sup>25</sup> Eberde wawaxu täpäyalä. Yakap täpä umanä Pelek yang inikut. Ile täpdukätanu kewu inäinä upuke yiwikin, ge ile tiwän Pelek yang inikut.† Ile ulapnä umanä Joktan.

<sup>26</sup> Joktande wawaxu umanä Almodat, Selep, Hasamawet, Jera, <sup>27</sup> Hadoram, Usal, Dikla, <sup>28</sup> Obal, Abimael, Seba, <sup>29</sup> Ofir, Hawila äwä Jobap yang. Äminu aläkwäxu undä Joktande wawak. <sup>30</sup> Kewu itä take yiwikinu, Mesa unetä ku Sefar gusitdä akonggaxu täwal halak yiwikin.

<sup>31</sup> Äminu aläkwäxu Semde bapunä. Bapunäne wamnäne upuke, kepnä äwä kantrinä yangu inäinä päke yiwikin.

\* **10:10:** Äminu täpätuyitä Kalne taunu womdu yang natäxaying. Tiwändeyä Hibru wamune kakalä hikngändo. † **10:25:** Hibru wamune ‘Pelek’ yangu yäpuli upukin.

<sup>32</sup> Tiwän äminu aläkwäxu Noale wawaxunetä sakngälakinunin. Kewu yanggätä yiwikdoke pänguhiwänä, sakngälake, unetä upuke, päku kantrinä inäinä yiwitake kukin.

## 11

### *Yawetä äminu wamu buläkän tänga yakinunin pängginungukut*

<sup>1</sup> Ämimbamu kep däkäne yiwikinu wamnä buläkän tänga yakin. <sup>2</sup> Tixäwik äminu gusitdä akonggak käwutkätan tihikuke, kewu kupi gwendu Babiloniaxätan kake, uwomune päku yiwikin. <sup>3</sup> Päku yiwike, “Kep gämänu päke, däkine häna, yähakitokawä, blik däkngäning,” yang yakin. Yolu hup simen yanggä dowahakin, tike kolta tuliwä, blixu päpä kitokakin. <sup>4</sup> Tiwän using yakin. “Inäinä domatäke, womdu womdu dowäku yiwihikunim,” yake, “Yolu gäpanggu tahake, yot bänäkängän yolu belakngä gwendu tahana, yekäwune kopik. Tiwän umaninu käyä tiwik,” yang yake, using pahakin.

<sup>5</sup> Tixawändeyä Yawe äminu kewune nanätä yot gäpang, yolu belakngä gwen yang pahaxawä, unin dayipikge epgut. <sup>6</sup> “A! U äminu inä uninggän, tiwän wamnä buläkän tänga. Yakapde unin pahaying. Ge mahande dasingga pahaningge natäkengu, awahaningunin,” yake, <sup>7</sup> “Puku wamnä pängginungutnim. Tiwän wamnä yawä, notnätä donatäpning,” yang yakut.

<sup>8</sup> Yake, Yawetä äminu womduwomdu petäke kuwän, yolu tahakinu dola-hapulukin. <sup>9</sup> Ile tiwän yolu unggäpangu umanä Babel yang inikakin.\* Yolu unggäpangune Yawetä äminbamde wamnä pängginunguke, unetä petäke kuwän, päku kep däkäne womduwomdu yiwihikukin.

### *Semde bapunämbam apu Tera*

<sup>10</sup> Semde bapunä. Yanggä gwendä yiwikdoke teke pukuwän, krismasu gwenalä apuxukut. Tiwän Semu krismasnä 100 yiwikengä, wawakngä Apasat towikut. <sup>11</sup> Ile mahene krismasu 500 yiwixäwixu, wawak yäpanä towikut.

<sup>12</sup> Tiwän Apasalu krismasnä 35 yiwikengä, wakwakngä Sela towikut. <sup>13</sup> Ile mahene krismasu 403 yiwixäwixu, wawak yäpanä towikut.

<sup>14</sup> Tiwän Sela krismasnä 30 yiwikengä, wawakngä Eber towikut. <sup>15</sup> Ile mahene krismasu 403 yiwixäwixu, wawak yäpanä towikut.

<sup>16</sup> Tiwän Eberu krismasnä 34 yiwikengä, wawakngä Pelek towikut. <sup>17</sup> Ile mahene krismasu 430 yiwixäwixu, wawak yäpanä towikut.

<sup>18</sup> Tiwän Pelexu krismasnä 30 yiwikengä, wawakngä Reu towikut. <sup>19</sup> Ile mahene krismasu 209 yiwixäwixu, wawak yäpanä towikut.

<sup>20</sup> Tiwän Reu krismasnä 32 yiwikengä, wawakngä Seruk towikut. <sup>21</sup> Ile mahene krismasu 207 yiwixäwixu, wawak yäpanä towikut.

<sup>22</sup> Tiwän Seruxu krismasnä 30 yiwikengä, wawakngä Nahor towikut. <sup>23</sup> Ile mahene krismasu 200 yiwixäwixu, wawak yäpanä towikut.

<sup>24</sup> Tiwän Nahor krismasnä 29 yiwikengä, wawakngä Tera towikut. <sup>25</sup> Ile mahene krismasu 119 yiwixäwixu, wawak yäpanä towikut.

<sup>26</sup> Tiwän Tera krismasnä 70 yiwikengä, wawakngä Abram, Nahor, äwä Haran yang towikut.

<sup>27</sup> Terale bapunä. Tera Abram, Nahor, Haran yangge nanä. Tiwän Haranu Lotde nanä. <sup>28</sup> Nanä käluk yiwixawän, Haranu Ur Kaldia alakut womune kumgut. <sup>29</sup> Tiwän Abramkät Nahorkät mängätnä päkumäläk. Abramde

\* **11:9:** Hibru wamune ‘Babel’ äwä ‘pängginungukut’ yangu guläkngä usäkän bimä.



mängälu umanä Sarai, tiwän Nahorde mängälu umanä Milka, Harande yäpa. Haranu Milka äwä Iska yangge nanä. <sup>30</sup> Sarai engang hongge yiwikut.

<sup>31</sup> Teratä wawakngä Abram, bapunä Lolu Harande wawak, bapunä Sarai Abramde mängät yang päpän, Ur yolu Kaldiaxätanu unggäpangu teke, Kenan kuningge kukindeyä, Haran yolu unggäpangune päku yiwikin.

<sup>32</sup> Yiwihika, Tera krismasnä 205 yiwixäwixu, une kungut.

## 12

### *Yawetä Abramü Kenan kuwikge inikut*

<sup>1</sup> Gwendune Yawetä Abramü using inikut. “Kantrika, notdambam, nangga yänggwät yang peke, kewu nätä ganiwa, uwomune kunggayo.

<sup>2</sup> Nätä pahawa, bapuka sakngälake, kantri inätä täke yiwä, umanä käyä tiwik. Tiwän bänip kwikwik gamike, tahawa umanda inulung tiwik. Tiwän gäle natäke, äminbamu mahandexäyä bänip kwikwixu äpme yämit. <sup>3</sup> Ämindä gäle bänip kwikwik gamä, nätä yäkwäle ile bänip kwikwik yämit. Tike ämindä tokngä däkä gamä, nätä yäkwäle tokngä däkä yämit. Gäle tiwän, yotyolu kewune nanä undä bänip kwikwik päning,” yang inikut.

<sup>4</sup> Tiwän Abramü yotnä teke, Yawetä inikut using kukut. Lotkäyä ixät kukumäläk. Abramü krismasnä 75 yiwikengä, Haranu teke kukut. <sup>5</sup> Mängätnä Sarai, notnäle wawak Lot, hängäläpä äwä puyä äminu Haran päkin yangu undä päke, kewu Kenan uwomune kuningge kukin. Kuhika, Kenan kewu uwomune kundopgin.

<sup>6</sup> Kundoke kuhika, Sekem päku, pa takwänu More undäkäne yiwikin. Täpduxu uwomkätanu kewu uwomune Kenan nanä ayiwixakin. <sup>7</sup> Tiwän Yawetä apu, Abram using inikut. “Kewu awomu bapukale äpme yämit,” yang inikut. Yawetä ile apgutde, ile tiwän, Yaweale alta gwenu uwomune tahakut.

<sup>8</sup> Tikengä Sekem teke kuhika, Betelde gusitdä akonggak käwutkätan päku, selyotnä täwal kemat tapike yiwikut. Uwäku yiwikulu, Betelde gusitdä akonggak käwut, tiwän Aile gusitdä pukunggak käwutde, bänäkängän päku yiwikut. Unexäyä alta gwendu tahake, Yaweale uman tängenakut. <sup>9</sup> Tikengä uwomu teke, päku womduwomduhim yiwitake, Negepde\* kukut.

### *Abramü Isip päku yiwikut*

<sup>10</sup> Kewu uwomkätanu gusit täpduk tiwän, naxu wenä hikngä tikut. Tiwän Abramü womduhimu Isip päpu yiwikge pukukut. <sup>11</sup> Isip kundopningge kuxäwik, mängätnä Sarai using inikut. “Gä mängälä gwälam hikngä. <sup>12</sup> Isip nanätä ganduke ‘Ile mängät,’ yakengu, nä anuwä kungäxäwa, gä täning. <sup>13</sup> Ge ayäwä kakengu, ‘Hamina’ yang yäniyo. Tiwän gäle natäkengu, donuwä kupit,” yang inikut.

<sup>14</sup> U inikut using kuwäl, Isip nanätä mängätnä kawä, gwälam hikngä tikut. <sup>15</sup> Tiwän kingge puyä ämindä kake, ku kingu “Mängälä gwälam hikngä täpätu undan kamäng,” yang inikin. Tikengä Sarai kingge yolune täke kukin. <sup>16</sup> Tiwän kinggä Sarai täkutde tiwän, Abramde sipsip, towiyä gämän, donggi, kamel, puyä ämin yang imikut.

<sup>17</sup> Tiwändeyä kinggä Abramde mängätnä täkutde, Yawetä iwalu wäyi hikngä king, äminu undä yotnäne yiwixakin yangge yämän dambätakin. <sup>18</sup> Andambätake, kinggä Abram yawän apän, using inikut. “Usingu inale tahakuläk? ‘Mängätän’ yangu dasingge tiwän donanikuläk? <sup>19</sup> ‘Hamina’ yangu kemu inale naniwi täkum? Wanin, mängätän. Täke kunggä,”

\* **12:9:** Negewu kep uman. Tiwän yäpulinä saut.

yang inikut. <sup>20</sup> Inike, puyä äminä yäniwän, itä Abram, mängätnä, yang yäningyäpiwä, hängä täpänä undä päke kukumäläk.

## 13

### *Abramkät Lotkät matäke kukumäläk*

<sup>1</sup> Abramdä Isip teke, mängätnä, hängä täpänä yang päke, hipdunä Negep koptut. Notnäle wawaxu Lotkät using koptumäläk. <sup>2</sup> Abramumoningä silwa, gol, kälawu äminsak yangu meyä hikngä tiwäyä, päke koptut. <sup>3</sup> Täko yiwihika, Negep teke, womduwomduhim yiwitake, Betel kukut. Täku Betelkät Aixätde bänäkän yiwikut, tupä selyotnä tapike yiwike, <sup>4</sup> alta gwenu Yaweletahakut womune. Une päku yiwike, hipdu Yaweletumuk takahut.

<sup>5</sup> Tixawän Lotkäyä sipsipnä, towiyä gämänä, äminu ixät kukin yangu meyä. <sup>6</sup> Abramkät Lotkätäne kälapnä meyä hikngä tiwän, kewu uwomunekänu yiwitnangäsä dolikut. <sup>7</sup> Äminu Abramde kälap daying yiwixakin äwä äminu Lotde kälap daying yiwixakin yanggä yanganikin. Tixawän uwomkätanu Kenan nanä Peres nanä yangu uwomunekän yiwäxakin.

<sup>8</sup> Puyä äminätä yanganiwä, Abramdä Lolu using inikut. “Puyä äminilu amäk wam yawä, täke dolinggak. Nilu u notnäxäluninggän. Ge amäk wamu teta. <sup>9</sup> Kayo. Kewu inulung. Ge inäinä matäke kuhim. Gä hiyä käwut kuwiläkge natäpi, nä kwänä käwut kuwit. Tike gä kwänä käwut kuwiläkge natäpi, nä hiyä käwut kuwit,” yang inikut.

<sup>10</sup> Iniwän Lotdä Jodan kupi ku Soar kewu uwom kawänu, yanggänä käyä tikut, Yaweletpuyä bimä,\* äwä Isipde kupi bimä. (Yawetä Sodom Gomora yangu dosipmäxawän kakut.✧) <sup>11</sup> Kewu unin kake, Lotdä kupi undä gwen inäle tuwänguke, womduwomduhim yiwitake, gusitdä akonggak käwulunele kukut. Tiwänä Abramkät Lotkälumätäke kukumäläk. <sup>12</sup> Abramum Kenan yiwixawän, Lolu kupi unggwenune yolu gäpangguyi bänäkängän päku, selyotnä Sodomu kwayimune tapike yiwikut. <sup>13</sup> Äminu Sodom nanä gutongä ämin. Yaweletkayine wäyi hikngä pahakakin.

<sup>14</sup> Lotdä Abramum teke kuwänä, Yawetä Abramum using inikut. “Anetä yiwike, kewu undä dayipso. Gusitdä akonggak käwut, gusitdä pukunggak käwut, not käwut, äwä saut käwut yangu dayipso. <sup>15</sup> Kewu undä undayixaläxu nätä gäxät bapukaxätde gihäle tupäkände äpme damit. <sup>16</sup> Nätä tahawa, bapuka naxälä hikngä tike, haluhalu bimä tining. Äminu täpätutä haluhalu kendekegä, bapukaxäyä kendewik. Tiwän bapuka naxälä hikngä tiwän, kendetnangäsä doliwik. <sup>17</sup> Kuke, kewu awomdäne belakngänä däpinä yangu undä dayipso, inäle gäle gamit,” yang inikut.

<sup>18</sup> Iniwän Abramdä selyotnä wäsipäke, Hebron täku Mamrele pa takwän däkändäkäne selyotnä tapike, uwomune yiwikut. Une täku yiwike, alta gwenu Yaweletahakut.

## 14

### *Abramdä Lot gatängämikut*

<sup>1</sup> Täpduxu uwomune kingu malä nanä täpäyaläxät täpäyaläxätä amäk äminä päpä, Kenan apä, amgin. Elamde king Kedorlaomer, Babiloniale king Amrapel, Elasarde king Ariok, äwä Goimde king Tidal, yanggä apä, kingu Kenan nanäxät amgin. <sup>2</sup> Kingu Kenan nanä using: Sodomde king Bera, Gomorale king Birsa, Atmale king Sinab, Seboimde king Semeber, äwä

\* **13:10:** Puyä Yawetä Idenkätanu pahakut wom. Yakap 2:8-10 kayo. ✧ **13:10:** Yakap 19:1-29

Belale king. Bela äpmanu Soar yang inikaying. <sup>3</sup> Kenande kingu uläkwäxu amäk äminä päke, Sidim Kupi kukin, Sol Yanggä Gwende kwayimune.

<sup>4</sup> Using tupä Kenan nanä Kedolaomerde gepbine yiwixawä, krismasu 12 apuxuwän, krismasu 13 täpäne mähe natäke, wamnä donggwälamikin. <sup>5</sup> Ile tiwän krismasu 14 täpäne Kedolaomeroxät king notnäxät amäk äminä päpä, Astoret Karnaim apu Repa nanä sipmäke, Ham apu Sus nanä sipmäke, Sawe Kiriataim apu Em nanä sipmäke, <sup>6</sup> Seir täwal däkändäkäne apu Hor nanä sipmäke, Elparan nanä apu sipgin. Elparanu kepdän däkäle inälängändän. <sup>7</sup> Unetä täpä täkwämbän, Enmispat, äpmanu Kades yang inikayingune ku, Amalek nanä sipmäke, kepnä unda päke, Amori nanä Hasason Tamar yiwäxakinkäyä sipmäke, kepnä unda päkin.

<sup>8</sup> Unin sipä, kingu Sodom nanä, Gomora nanä, Atma nanä, Seboim nanä äwä Bela nanä yanggä amäk äminä päpä, Sidim kupine päku ämningge tändäkngakin. <sup>9</sup> Elamde King Kedolaomer, Babiloniale King Amrapel, Elasarde King Ariok, äwä Goimde king Tidal, yanggä apä, ixät amgin. Amäk äminu 4 täkwäkgänetä apä, amäk äminu 5 täkwäkgänexät amgin.

<sup>10</sup> Sidim Kupi Gwenune, gänangä däkändäkä koltatäne käyä. Tiwän amänggawä täke doliwän, Sodomde amäk äminäxät Gomorale amäk äminäxät andatäkuningge tahake, notnä kolta gäpmane päpu sipän, notnä täwal däkändäkäne datäkukin. <sup>11</sup> Datäkuwä iwalnätä päku, Sodomdäne Gomoratäne yang hängälapanä nakngä yang päkin. <sup>12</sup> Tixawän Abramde notnäle wawaxu Lot Sodom yiwäxakutde, amäk ämindä hängä täpänä Lot yang päke kukin.

<sup>13</sup> Tiwänä äminu andatäkukinu täpätutä apu, Abram Hibru uläpä inikut. Äminu Amor nanä täpätu umanä Mamre, panä takwän däkändäkä käyä. Tiwän Abrahamu pa undäkändäkäle kwayimune yiwixakut. Eskol, Aner yangu Mamrele epänepän notnä. Tupä Abram, Mamre, Eskol, Aner yang gatäkgatäk tahaningge wamu aläkakut. <sup>14</sup> Abramde wawakngä täkinde natäke, amäk äminä Abramde yolune alakinu 318 ämin yangyävambän, päku iwalnä yäwatäke kuhika, Dan yot gäpangune kukin. <sup>15</sup> Kupiläne Abramdä amäk äminä uhike pewän, iwalnä sipä datäkuxawä, yäwatäke kuhika, Hoba kukin, Damaskusde not käwutkätan. <sup>16</sup> Kuke hängäläpä iwalnätä päkinu, wawakngä Lot, Lotdäne hängäläpä äwä wäwi mängälä yang päkapgin.

### *Melkisedegä Abramde wam gwaläng inikut*

<sup>17</sup> Abramdä King Kedolaomeroxät king notnäxät sipmäke, hipdunä Sawe Kupi bä Kingge Kupi yang inikayingune apuxawän, Sodomde kingu Abramkät yiwik yähimäläkke apgut.

<sup>18</sup> Tiwänä Melkisedexu Salemde kingkäyä Abramde apgut. Täkapu bretkät wainkät imikut. Melkisedexu Anätu Enetängä Nanä Täpäle prisde yiwikut. <sup>19</sup> Itä apu wam gwalängu using imikut. “Abram, Anätu Enetängä Nanä kepkät yekäpkät pahakut täpätä, gäle bänip kwikwixu äpme gamik. <sup>20</sup> Tiwän Anätu Enetängä Nanä Täpäle uman yatängenatnim, inale itä iwalda kätakgane pewän sipguläk,” yang inikut. Iniwän Abramdä hängäläpä upuke, 9-u inäle pexäwik, 1-u Melkisedegge imikut.

<sup>21</sup> Tiwänä Sodomde kingu Beratä Abramde using inikut. “Hängä täpä gikale pexäwik, äminäkän namiyo,” yang inikut.

<sup>22</sup> Tiwändeyä Abramdä using inikut. “Kätaknga tängenake, Yawe, Anätu Enetängä Nanä, kepkät yekäpkät pahakut täpäle umande wamu hiyäkän hikngä yänggat. <sup>23</sup> Hängä täpätu gätäne dohikngä täpit. Täwikge tret bä

bälängyayikge kätak yangu mätekngä. Tiwändeyä dowäpit. Using päpiträ, gätä 'Nätä tahawa, Abramü hängänämbängän tikin,' yang yeyä. <sup>24</sup> Hängä täpätü ninale doläpit. Tike hängä amäk äminatä anayingu unin. Tike Aner, Eskol, Mamre yangu näxat kukumäng. Ge hängä mätekngä itäkän päning," yang inikut.

## 15

### *Yawetä Abramü hiyäkän wam inikut*

<sup>1</sup> Abramdä awewelike kaxawän, Yawetä apu, wamu using inikut. "Manaxälayo. Nä tulungguka bimä. Tike bänip gwalängge hängä inulung gamit," yang inikut.

<sup>2</sup> Tiwän Abramdä yäkwäle inikut. "Täkeläpä Yawe, hängä dasä bimä namiläk? Enganga wenä. Ge nätä kupa, Elieser Damaskas nanä täpätä näle tangge yiwike, hängäna päpik. <sup>3</sup> Engangu donamikuläkge, puyä ämina täpätütä näle hängä päpik," yang inikut.

<sup>4</sup> Iniwän Yawetä wamu hipdu using inikut. "U. Gäle hängä äminu uläpätä dowäpik. Tike gika wawak hikngätä päpik," yang inikut. <sup>5</sup> Inike kepmän täkepuké using inikut. "Yekäpkätan kake, kuminamu kendeyo. Kendetnangäsä tinggak? Bapuka using tining," yang inikut.

<sup>6</sup> Iniwän Abramdä Yawele bänip tiwän, Yawetä "äminomän" yang inikut.

<sup>7</sup> Tiwänä hipdu Yawetä Abramü using inikut. "Nä Yawe. Nätä kewu awomunin gamitde Ur yolu Kaldiaxätanu unggäpangunetä täkapgum, gän," yang inikut.

<sup>8</sup> Tiwän Abramdä inikut. "Täkeläpä Yawe, dasing tahawi kakengä, hiyäkände yangu natäpit?" yang inikut.

<sup>9</sup> Iniwän yäkwäle inikut. "Towiyä gämän mängälä gwendu, meme mängälä gwendu, sipsiwu wäwi gwendu, undä krismasnä gwenälä gwendu, äwä kombunanang mätexu gwendu, päkalu gwendu yangu päkapu namiyo," yang inikut.

<sup>10</sup> Iniwänä Abramdä undä Yawele päkapu, bänäkängän wehike, käwutdu pexäwik, käwutdu petäke kuwän, täkngayalä tikut. Tikengä kwäwilu dowe-hikut. Tike gwendu käwutdu täkngane teke, gwendu käwutdu täkngane tekut. <sup>11</sup> Pewän dayike, käpämädä epu naninngé epä, Abramdä yäwambän datäkukin.

<sup>12</sup> Tiwänä gusitdä pukuxawän, Yawetä natäpän, däpmunä kupsä hikngä pekut. Pexawän, kupilä täkngaxät naxälä täkngaxät apän naxälakut.

<sup>13</sup> Tiwän Yawetä inikut. "Wamu ganiwa, hiyäkängän natäpso. Bapuka kewu womdune päku, apuyiwit däkngake, uwomune nanäle kematde yiwitning. Tiwän puyä kitokngä yämä pahaxawä, äminu sipmäxäwik pahawä malixawä, 400 krismas apuxuning. <sup>14</sup> Tiwän äminu gin pahawä maliningu, nätä tokngä däkä äpme yämit. Tiwän bapuka hängä täpänä naxälä päke, yolu uwomu teke kuning. <sup>15</sup> Tiwänä gän, yiwitake kuhika, äminälake hikngä damänsim tike, bänip kwikwik täkngane kupi kwayining. <sup>16</sup> Bapuka gwenu gwenäläxät gwenäläxät sakngäläxawänä, ane apning. Amor nanäle wäyinä inulung hikngä tiwän kakengä, anetä yäwämba epuxuning," yang inikut.

<sup>17</sup> Gusitdä pukuwän kupilä tiwänu, gäpma kupänä käyä gwenkät, aläkätäwu däkinä käyä täpaxätädä tingalake, kälawu wehike pekulune bänäkändekän apuxukumäläk. <sup>18</sup> Täpduxu unggwenune Yawetä Abramü hiyäkän wam täknga using inikut. "Bapukale kewu awomunin yämit, Isipde yanggä dupinetä apuxu yanggä inulungu Yufrites dupine. <sup>19</sup> Ken, Kenis,

Kadmon, <sup>20</sup> Hit, Peres, Repa, <sup>21</sup> Amor, Kenan, Girgas, äwä Jebus yangge sakngayile kewu undä bapukale yämit,” yang inikut.

## 16

### *Hagartä Abramde wawaxu Ismael dukngikut*

<sup>1</sup> Sarai, Abramde mängälu, engangu dondukngikut. Tiwändeyä mängälä täpätu Isip nanä puyä äminäle yiwikulu umanä Hagar. <sup>2</sup> Ge Saraitä Abram inikut. “Yawetä bänipna umumbän, engangu dondukngit. Ge kuyo. Tiwän puyä äminaxät däpmunu pesimäläk. Dasingga? Itä enganga äpmembä betangamik?” yang inikut.

Iniwän Abramü täke natäpögut, Saraitä yawänun. <sup>3</sup> Abramü Kenan täku krismasu 10 yiwikut. Tiwänä, Saraitä puyä äminä Hagarü Abramde imikut.

<sup>4</sup> Tiwän Hagarxät yiwät, tängene käyä tikut. Tiwän kake, Hagarü inäle natäpänü axopögut. Tiwän towikngä\* Saraile natäpänü aepögut. <sup>5</sup> Tiwänä Saraitä Abramü using inikut. “Gätä tahawi, nä meyä pänggat. Puyä ämina uläpä nina gäle kätaxune tekum. Tiwändeyä Hagarü tängene käyä tiwän kake, itä nandupänü, kwakwakngä tinggak. Ge Yawetä gäxät näxälu äpme uhinggiwik,” yang inikut, Saraitä Abramun.

<sup>6</sup> Yawän yäkwäle Abramdä using inikut. “Täke. Gika puyä ämin. Gika dasingga tahawiläkge nataläxu, gika tängäne yiwixak,” yang inikut. Yawänä Saraitä mähemähe kaxäwik tahanggawän, Hagarü datäkukut.

<sup>7</sup> Yawele ängelatä kepgän gomune, Hagarü yanggä akondokayingune kakut. Yanggä akondokayingu unggwäxu Surde kähit kwayimune yiwixak. <sup>8</sup> Tiwän ängelatä using inikut. “Hagar, Saraile puyä ämin, sänetä apuläkngä, säne kunggaläk?” yang inikut.

Iniwän “Nä towiknga Saraile naxälake datängapunggat,” yang inikut.

<sup>9</sup> Iniwän Yawele ängelatä inikut. “Hipdu päku towiknga Saraile gepbine yiwiyo,” yang inikengä, <sup>10</sup> unetäkänü using inikut. “Nätä tahawa, ayika sakngälawä meyä tiwän, kendetnangäsä doliwik. <sup>11</sup> Gä äpmanu tängakane käyä. Ge engangu wäwi täpä dukngiwiläk. Tikengä umanä Ismael† yang iniyo, inale kwänämu tiläxu, Yawetä anatak. <sup>12</sup> Wawakga uläpä donggi tuk bimä däknake, äminbamde iwalnä däknawik. Däknawän yäkwäle iwalnä däknawä, tahake yiwitning. Tikengä notnämbamkälu gupsängu doyiwitning,” yang inikut.

<sup>13</sup> Yawetä Hagarü wam inikutde, “Ananduxak Täpä axat,” yake, umanä täknötu using inikut. “Anätu Ananduxaläk Täpänin” yang inikut. <sup>14</sup> Ile tiwän yanggä akondokayingu unggwäxu umanä “Käluk Yiwäxäwik Nanduxak Täpäle Yanggä” yang inikin. Yanggä akondokayingu unggwäxu Kadeskät Beretkätde bänäkängän yiwäxak.

<sup>15</sup> Tiwänä Hagarä Abramde wawak dukngiwän, Abramdä umanä Ismael yang inikut. <sup>16</sup> Abramü krismasnä 86 yiwixawän, Hagarä Ismaelu une dukngikut.

## 17

### *Wamu gupnä matäkindäne*

<sup>1</sup> Abramü krismasnä 99 yiwixawän, Yawetä apu inikut. “Nä Anätu Kitokngäna Käyä Täpä. Näxät gatäke yiwixäwik, nomängän pahayo.

\* **16:4:** Hängä täpä uhike towikngä däknakaying usinggän, hängänämbamgän ämindä äminu puyänä pahangyämningge uhike, towikngä däknakakin. † **16:11:** Hibrü wamune ‘Ismael’ yangu yäpuli Anätutä anatak.

<sup>2</sup> Kontraknga gäxät tahakumäxu aläpa kitokawän, tahawa bapuka meyä hikngä tiwik,” yang iniwän, <sup>3</sup> Abramdä sopäsopä puke, kuhilä kewune täpu temgut.

Tiwän Anätutä using inikut. <sup>4</sup> “Näle kontraxu using. Mahande kantri yiwitäke kuninggäne bapunä däknawiläk. <sup>5</sup> Ile tiwän umanda Abram\* yangu dongganikaning. Tike umanda Abraham† yang ganikaning, inale nätä pahawa, bapuka meyä sakngälake, kantrinä inäinä päke yiwitning. <sup>6</sup> Nätä tahawa, bapuka meyä dukngixäwik, kantri däknake yiwitäke kuning. Tiwän bapuka täpätuyi kingge yiwitning. <sup>7</sup> Kontraknga hipdu täpa kitokawän, iwikge using yiwik, bapuka mahande alätninggexät. Nä gäle Anätuka, tiwän bapuka mahande alätningge Anätunä. <sup>8</sup> Gä Kenande kewune apuyiwitde päkapu yiwixaläk. Tiwändeyä kewu Kenandäne awomu undä gäxät bapuka mahande alätningkätde gihäle tupäkände damike, Anätunäle yiwit,” yang yakut.

<sup>9</sup> Tikengä unetäkänu using inikut. “Gäxät bapuka mahande alätningkälu näle kontrak tawake yiwitnong. <sup>10</sup> Kontraknga uläknga using. Wäwi undä gität yiwixayingu, yämunäle gup matänong. <sup>11</sup> Kontrakngitde tuwängge gupnä matäkaningu uläkngatä yiwik. <sup>12</sup> Wäwi gität yiwitning, engangu wäwi alake täpduxu <sup>8</sup> yiwitning, äwä malä nanä puyä äminsäle moninggä uhining yangu, undä gupnä matänong. Usäkän bapuka mahande alätningkäyä usinggän tahanong. <sup>13</sup> Yotsäne alätning bä moninggä uhining yangu undä gupnä amatänong. Uläkngatä tuwängge yiwän, kontraknga iwikge yiwixäwik. <sup>14</sup> Tike wäwi täpätu iminda gupnä domatäwixu, näle kontraxu doläwämbik. Ge aläwämbä epuxuyok,” yang inikut.

<sup>15</sup> Täknagatu using inikut. “Mängätäda Sarai yang inikakinu aleke, Sara yang ininong. <sup>16</sup> Nätä bänip kwikwik ima, wawakga dukngiwik. Unetäkänu nätä bänip kwikwik ima, yotyotde hawanä däknawik. Tiwän ayinä täpätuyi kingge yiwitning,” yang inikut.

<sup>17</sup> Iniwän Abrahamdä sopäsopä puke, kuhilä kewune täpu temäke, using natäpगत. “Wäwi krismasnä 100 tiwänu, engangu äpme towimbik? Saraxäyä krismasnä 90. Ge engangu äpme dukngiwik?” yang natäpän, kwakwakngä tiwän mikut. <sup>18</sup> Tikengä Anätu using inikut. “Wamu yäläxu, Ismaelde takembä imiläk?” yang inikut.

<sup>19</sup> Tiwänä Anätutä inikut. “Ile donatäke yat. Tike mängätäda hikngä, Saratä wäwi täpätu äpme dukngiwik. Tiwän umanä Aisak yang iniyo. Tiwänä kontraknga ixät tahake, täpa kitokawän, iwikge using yiwik, bapunä mahande alätninggexät. <sup>20</sup> Ismaelde yäläxu anatät. Ge ixäyä bänip kwikwixu äpme ima, engangu meyä towimbik. Wawakngä 12 towimbän, uläkwäxu kuhiläle yiwike, kantrinä täke yiwitning. <sup>21</sup> Tiwändeyä kontraknga uläknga Aisakät tahahim. Äminu uläpä krismasu ende gwenuneyä Saratä kake täpik, täpduxu asawomune,” yang inikut. <sup>22</sup> Wamu Abraham iniwän puluwänu, Anätu axukut.

<sup>23</sup> Täpduxu inä unggwenunekän Abrahamdä Ismael, wäwi inäxät yiwixakin, moninggä uhikut yangu wäwi undä gupnä Anätutä inikut using matäkut. <sup>24</sup> Abrahamu krismasnä 99 tixawän, gupnä matäkin. <sup>25</sup> Tike wawakngä Ismaelu krismasnä 13. <sup>26</sup> Täpduxu inä unggwenunekän Abrahamkät Ismaelkätde guwu matäkin. <sup>27</sup> Abraham, wäwi inäxät yiwixakin, moninggä malä nanä uhikut yangu wäwi undä gupnä matäkin.

\* **17:5:** Abram yangu yäpuli ‘nanä umanä käyä täpä’. † **17:5:** Abraham yangu yäpuli ‘äminu meyäle nanä’.

## 18

### *Äminu täpöyalä täpätu Abrahamde apgin*

<sup>1</sup> Abrahamu selyotnä Mamrele pa takwän däkändäkäle kwayimune täku tapikut. Ngä täpduxu gwendune gusilu tokngä tiwän, selyotnäle yämäne yiwixawän, Yawe apgut. <sup>2</sup> Abrahamu kuhilä kwayiwän enawän, äminu täpöyalä täpätu päkapu yiwikinä dayipgut. Unin dayikengu, selyotnä yämä däkäneta ihapmäke kuke, sopäsopä puke, kuhilä kep däkäne temgut.

<sup>3</sup> Temäke using yakut. “Bulämbam täpä, nä ilakngä nandukengu, puyä äminda manapmake kuyo. <sup>4</sup> Puyä ämina iniwa, yanggä täkapu damän, bälängsä häluke, pa andäkale gepmäne yiwä täkanong. <sup>5</sup> Näle apuyingge, naxu mätekngä hangdama, nakitokakengä, axunangge natäyingune kunong,” yawän, “Täke. Usingu täke tahawiläk,” yang yakin.

<sup>6</sup> Tiwän Abrahamu yupsäng ihapmäke, selyotkätan koptgut, Sarale. Ko Sara using inikut. “Flawa gwälamu bulämbamu tupöyalä päke, bret hayo,” yang inikut.

<sup>7</sup> Tikengä ihapmäke, towiyä gämände kukut. Ku towiyä gämän mätexu tänge ilakngäkänu gwendu täkapu, puyä äminä täpätule imän, itä yupsäng matäke hakut.

<sup>8</sup> Tiwänä towiyä gämändäne mäm yanggä kälukät, äwä mäm yanggä awäke pewä kitokakinkät, towiyä gämän mätexu u hakinkät päkapu yämikut. Yämike, pa gepmä yiwike, daying yiwixawän, nakin.

<sup>9</sup> Tikengä using inikin. “Mängätä Sara sandan?” yang yawä “Endesing. Selyotkätan,” yang yänikut.

<sup>10</sup> Tiwänä u yiwikinu täpätutä using yakut. “Täpduxu asämbimä gwenu krismasu endenggwenune apa, mängätä Sara engangu wäwi täpä kake täpik,” yang inikut.

Wamu u yakinu, Sara selyolune yiwixäwik natäpgut. <sup>11</sup> Abrahamkät Saraxälu äminäläke hikngä tiwät, engangä dukngitnangäsä täpduxu ayapmikut. <sup>12</sup> Ge Sara using natäpgut. “Apnaxät nilu äminäläke alimäk. Engang äpme dukngiwik yake yänggak?” yang natäke, mipäkohopikut.

<sup>13</sup> Tiwän Yawetä Abrahamu using inikut. “Sara inale mikgak? ‘Engangu kake tänangäsändo. Äminäläke alit,’ yangu inale yänggak? <sup>14</sup> Hängä täkngatu Yawetä using tiwik yang natäpänu, doaläwik? Tiwän täpduxu angganit gwenune hiyäkände äpme apit. Tiwän engangu wäwi täpä kake täpik,” yawän, <sup>15</sup> Sara anaxälake “Domit,” yawän, Yawetä “Hiyäkände. Amiläk,” yang inikut.

### *Abrahamkät Täkeläpaxätdä Sodomde yakumäläk*

<sup>16</sup> Äminu uläkwäxu Sodomde kuningge enawä, Abrahamkät kukin. Kuke päku kahitbänä yiwike, yot gäpangkätan kakin. <sup>17</sup> Yawetä using natäpgut. “Hängä tahawitde natälu, Abrahamu doxanghopike tahawit, <sup>18</sup> inale Abrahamu bapunä sakngälake, kantri inätä täke yiwä, kitokngänä käyä tiwik. Tiwän Abrahamde tiwän, kantri kewune nanä undä bänip kwikwik päning. <sup>19</sup> Abrahamu, engangä, bapunä yang yänindämumbän, nomängän tahaxäwik, Yawele kahit täwaningge tuwängukum. Ge hiyäkän wamu Abraham inikumu, inä using pahawit,” yang natäpgut.

<sup>20</sup> Tikengä Yawetä using inikut. “Sodom nanäxät Gomora nanäxät gutongä hikngä pahaxawä, kwänäm tixäwik, näle yayingu meyä hikngä. <sup>21</sup> Ge nina pukuke dayikengä, hängä wäyi pahawä wamu natäpgumu hiyäkän bä kem yangu natäpit,” yang inikut.

<sup>22</sup> Tiwänä äminu Yawexät kukin täpöyalu Sodomde kuxawät, Yawexät Abrahamkälu ayiwikumuläk. <sup>23</sup> Yawetä yiwikulune inälängän ku, Abrahamdä using inikut. “Ngä dasing? Äminomänkät gutongä äminkät undä sipnangge tinggaläk?” <sup>24</sup> Ngä äminomänu 50 tiwänu, ile butayä donatäxäwik, yolu undä gäpangu pahawi malining? <sup>25</sup> Gätä gutongä ämin sipmækengu, äminomänu dosipnangäsä, inale undä sipmækengu, meyä usakän yämiläxunin. Kewu undä womde meyä uhinggikgaläxunin. Kekem usingu dolahanangäsä,” yang inikut.

<sup>26</sup> Tiwänu Yawetä using inikut. “Sodomkätanu äminomänu 50 dayikengu, butayä ile natake, yolu undä gäpang tewa yiwik,” yang inikut.

<sup>27</sup> Tiwänä Abrahamdä hipdu using inikut. “Nä kep ämingän. Wamu yänangäsändo. Tiwändeyä hipdu yäwit. <sup>28</sup> Äminomänu 5-u wenä tiwän, 45-kän tiwänu, dasing? Yolu undä gäpangu asipiläk?” yang iniwän, “45 dayikengu, dosipit,” yang inikut, Yawetän.

<sup>29</sup> Tiwänä hipdu using inikut. “Ngä 40-kän tiwänu, dasing?” yawän, “Äminu 40 uläkwäkge tiwänu, dosipit,” yang inikut.

<sup>30</sup> Iniwän hipdu “Täkeläpä, tokngä manandupso. Hipdu yänanggenggat. Ngä 30-kän tiwänu, dasingga?” yawän, “Dawahawit, 30-kän tiwikäyän,” yang inikut.

<sup>31</sup> Iniwän hipdu inikut. “O, Täkeläpä, wamu hipdu angganinggat. Ayäwa kakengu, mähe manatängamiyo. Ngä undanu 20-kän tiwänu, dasing?” yawän, “20-kän dayikexäyä, dosipit,” yang inikut.

<sup>32</sup> Iniwänä “O Täkeläpä, wamu wäsekngä hikngä ganiwit. Dasing? Äwä undanu 10-gän dayikengun?” yawän “10-gän dayikexäyä, dosipit,” yang inikut.

<sup>33</sup> Tiwänu wamu yakumuläxu, une using ku yiwikut. Tiwän Yawe teke kuxawän, Abrahamu yotnäle hipdu kukut.

## 19

### *Yawetä Sodomkät Gomoraxät sipgut*

<sup>1</sup> Lolu taunu Sodomde yämä däkäne, wamu inulung wopwom yiwik yakakin womune puku yiwike yiwixawän, ängela ulöpöyalu kupilä täkngaläknga kundopgumuläk. Kundopät dayikengu enake, ku sopäsopä ulöpöyatde puke, kuhilä kep däkäne temgut. <sup>2</sup> “Bulämbam täpä, nä puyä äminsä. Ge yotnane apät kuna. Päku bälängsä häluwät, une petnim. Ge enakengä, gihä natämäläxune kuhol,” yang yänikut.

Yäniwän yäkwäle using yakumuläk. “Ane, kekewune pesim,” yang inikumäläk.

<sup>3</sup> Tiwän Lotdä kitokawän, ile yolune kukin. Flawa yisnä wenä hangyämike, nakäyä meyä hake, yämän nakin. <sup>4</sup> Yämän nake, awetningge däpi tixawän, wäwi Sodom nanä undä, wawakdäkä, äminäläke yang Lotde yolu yiwit täpän gwähawän, <sup>5</sup> Lotde yangoke yakin. “Äminu gäle apumuläxu, yawi epuxuwät tahakana,” yang yakin.

<sup>6</sup> Tiwän Lotdä epuxuke, yämä mehene gupsäng tahake, yänikut. <sup>7</sup> “O mäte notna. Wäyi täknga usingu malahanong. <sup>8</sup> Tike yäpana täpöyalä wäwixälu doyiwxayingu undan. Ge unin päkepu dama, gihä natäying täknga unuxät yiwitnong. Tike äminu alöpöyalu mawahawä malinong, inale näle yolunekän apumuläk,” yang yänikut.

<sup>9</sup> Yäniwän, “Kuke nipmit,” yang inikin. Inikengä yakin. “Lolu womdune nanä täpätä päkapu yiwike, ninu gutongä äminde nininggak,” yang yakin.



Tikengä using inikin. “Meyä uläpätde natämäng taknga gäle tahana, meyämbamu gätä päpiläk,” yang yake, Lolu tekwätämapä kuxawän, yämä uputningge tahakin.

<sup>10</sup> Tiwändeyä okupi yiwikumäläxu uläpätde Lolu tulitämäpät kopän, yämä gupsäng tahakuhikumäläk. <sup>11</sup> Tikengä kepmän yiwikinu uläkwäxu undä pahawät, kayi kupilawä, yämä däkä kanangäsä dolikut.

<sup>12</sup> Tiwänä uläpätde Lolu using inikumäläk. “Yepmäka, wawakga, yäpaka, bä gikaxät nanä täpätuyi andanu käyä kakengu, päpi awomu teke kukanong, <sup>13</sup> inale yolu anggapangu awahata malining. Äminu ane nanätä gutongä pahaxawä, Yaweke kwänäm tixäwik yayingu meyä hikngä tiwän, Yawetä niningyäpiwän, nitdä pahata maliningge apumäk. Ge notda päpi, yolu awomu teke kukanong,” yang inikumäläk.

<sup>14</sup> Iniwät Lolu enake epuxuke, yepme yäpanä uläpätde pähimäläkge tuwungukin täpätde kuke yänikut. “Yupsäng enake, yolu anggapangu teke kukahol, inale Yawetä pahawän malinangge tinggak,” yang yäniwän, “Yamändetbä nininggak?” yang natäp gumuläk.

<sup>15</sup> Gusilu moyokän akondoxawän, ängelatä Lolu iningyäpikumäläk. “Mängätde yäpaka yang päke epuxunggayo. Tike yolu anggapangkät pahata malinäng,” yang inikumäläk.

<sup>16</sup> Tiwändeyä Lolu hipnalä tahangyiwikut. Tinggawän ängelatä Lot mängätinä yäpanä yang kätakngäne päke, epu päke kukumäläk, inale Yawetä Lotde butayä natäp gut. <sup>17</sup> Epu päke kuke, ängela täpätutä using yänikut. “Tupäkände datäkukanong. Päkungu kupi gwenune mayiwä takanong. Tiwän maläpä takwämbän kanong. Tupäkändekän täwalune datäkukanong. Tike dahipän kumnäng,” yang yänikut.

<sup>18</sup> Tiwändeyä Lotdä using yakut. “O, Bulämbam täpä, usingu mayawi tahanom. <sup>19</sup> Nä axumnangäsä tiwändeyä, gätä puyä äminda ilakngä nanduke, nandung yiwixawi, käluk yiwixat. Tiwän täwalu malä hikngä. Ge unele datäkuxätna, meyä uläkngatä apungu, anihipän kumnimunin. <sup>20</sup> Tike yolu atunggapangsimu wäkngäsim. Tiwän mätekngä hikngä. Ge une takembä datäkuke doxupit?” yang inikut.

<sup>21</sup> Iniwän ängelatä inikut. “Täke. Wamu u yänggaläxu using tahawit. Yolu unggapangsimu dowahawa malining. <sup>22</sup> Tiwän yupsäng ihapmäke, datäkunggayo, inale yolu gäpangsimune doxuxawi, näta hängä takngatu pahanangäsändo.” (Yolu unggapangsimu Lotdä mätekngä yang inikutde, umanä Soar yang inikakin.\*)

<sup>23</sup> Gusilu moyokän ako apuxawän, Lolu Soar kundopgut. <sup>24</sup> Kundopän kakengä, Yawetä huwu tokngä yähakaying gwengwenu,† yekäpkätandä pewän, hopätä epukaying bimä taknga epgin, Sodom Gomoraxätanun. <sup>25</sup> Tiwän Yawetä pahawän, ämin, yot, hängäläpä yangu kupi unggwenune yiwixayingu undä yähakukin. <sup>26</sup> Unin ihiwän natäke, Lotde mängälu täpän takwämbän kake, hup bimä‡ däkngake, däm täpä yiwikut.

<sup>27</sup> Yolu yähakuxawä, gwäsi hikngä Abrahamu Yawexät yakap yiwikumäläk womune täku yiwike, hapäpu, <sup>28</sup> Sodom, Gomora, kupi unggwen yang kaxawän, gwäha bulämbam hikngä kewu uwomkätandä mingändäkä bimä gwendä kopän kakut. <sup>29</sup> Anätutä yot kupi unggwen yang pahawän malikin täpduxu, Abrahamde natäke, Lolu iniwän, andatäkuke meyä uläknga yapmikut.

\* **19:22:** Hibru wamune ‘Soar’ yangu yäpuli mätekngä. † **19:24:** Huwu unggwenu umanä sulfa. Däkita bimä yähakaying. ‡ **19:26:** Hup bimä undäkä sol.

*Lotde yäpa*

<sup>30</sup> Lolu Soar yiwitnanggengu anaxälake, yäpanä täpöyalu päpän, päko täwal däkäne hupgänangkätan yiwikin. <sup>31</sup> Täpduxu gwendune päyenätä ulapnä inikut. “Nanilu äminälake hikngä alinggak. Tiwän kewu anggomune mängälä ayä käyäkän. Tike kewu awomkätanu nit päke yiwitnangäsä wäwi wenä. <sup>32</sup> Ge nanilu wain imita, tängoke andatdawuwänä, unuxät petnim. Unetäyā engangu käyā tiwik,” yang inikut.

<sup>33</sup> Ge kupilä unggwenune nanä wain imät tängoppgut. Tangopänä yäpanä yakap täpätä kuwän pekumäläk. Tiwändeyä nanä donatäppgut.

<sup>34</sup> Kwepdätä päyenätä ulapnä inikut. “Kupilä unggwenune nankälu axuwa pemäk. Ge hipdu imita tängoke datdawuwik. Tiwänä kuwi pesimäläk,” yang inikut. <sup>35</sup> Ge kupilä unggwenune wainu hipdu tängoke datdawuxawänä, yäpanä mahan täpätä kuwän pekumäläk. Tiwändeyä nanä donatäppgut.

<sup>36</sup> Unin tahakengä nanätä yäpanäle engangmuhiwu pängyämikut. <sup>37</sup> Tiwänä yäpanä yakap täpä engangu wäwi täpa dukngike, umanä Moap\$ yang inikut. Ile tiwän Moap nanä äpman yiwixayingu, Lotdä bapunä dakngawän yiwixaying. <sup>38</sup> Inä usinggän yäpanä mahan täpaxäyän wawakngä dukngike, umanä Ben-Ammi\*\* yang inikut. Ile tiwän Amon nanä äpman yiwixayingu††, Lotdä bapunä dakngawän yiwixaying.

**20***Abimelegä Abrahamde mängät täkut*

<sup>1</sup> Abrahamu Mamrele pa gänang teke, Negep päku, Kadeskät Surxätde bänakan yiwikut. Päku Geraru mätekngä wesim yiwixäwikngä, <sup>2</sup> mängätinäle “Hamina” yang yakut. Tiwänä Gerarle kingu Abimelegä puyä äminä yäningyäpiwän, ku Sara täkapu imä, yotnäne tekut.

<sup>3</sup> Tiwän kupilä gwendune Anätutä dambu tängäne apuke, Abimelexu inikut. “Gä axumnangge tinggaläk, inale Gä mängälä uläpä täkuläxu ayä käyā,” yang inikut.

<sup>4</sup> Tiwändeyä Abimelexu Saraxät däpmunu dowekumäläk. Ge Abimelegä using inikut. “Täkeläpä, äminu gutongänä wenä asipiläk? <sup>5</sup> Abrahamdä Sarale ‘Hamina,’ yawän, Saratäxayä ‘Hamina,’ yakut. ‘Ayä wenämbä,’ yake yäwa ku täkapgin. Tiwändeyä nätä gutongä täkngatu ile dolahakum. Ge undanu gutongä wenä,” yang inikut.

<sup>6</sup> Iniwän Anätutä dambu tängäne inikut. “Hiyäkände. Gä donatäxäwik tahakuläk yangu anatät. Ile tiwän, nätä natäpa, mängälä uläpä doläke, wäyi täknga dolahakuläk, nälen. <sup>7</sup> Ge mängälä uläpä hipdu ayäle imiyo. Äminu uläpä profet. Ge aimi, itä gäle tumuk wam yawänu, Gä doxupiläk. Tike doimiläxu, yäko! Gä äwä gikaxät nanä yangu undä axumning,” yang inikut.

<sup>8</sup> Kwepdätä gwäsi hikngä, Abimelegä puyä äminä undä yangyävambän apä, meyä apgutdäne yäniwän, anaxälakin. <sup>9</sup> Tiwänä Abraham yatävambän apän, inikut. “Gä ninde dasing tahanggaläk? Nätä gäle meyä täkngatu dolahakum. Tiwändeyä Gä kem yake, meyä täknga ninde täkapunggaläk. Äminbamdä dowahakaying täknga, gätä ninde tahanggaläk. <sup>10</sup> Yäpuli inale hikngä tahakuläk?” yang inikut.

§ 19:37: Hibru wamune ‘Moap’ äwä ‘nananetä’ yangu guläkngä usäkän bimä. \*\* 19:38: Hibru wamune Ben-Ammi yangu yäpuli notnambamde wawak. †† 19:38: äpman yiwixayingu Mosesdä wamu aläkngä temgut. Täpduxu inä yiwikut womune natäke ‘äpman’ yang temgut.

<sup>11</sup> Tiwänä Abrahamdä inikut. “‘Ane nanä Anätule donaxäläke, nuke mängätña tänäng,’ yang natäppum. <sup>12</sup> Tike ‘Hamina’ yangu hiyäkände yakum. Nanilu uläpäningän. Tike mingilu inäinä. Tiwändeyä mängätñale tükum. <sup>13</sup> Tiwänä Anätutä natäpän, yotna teke, kewu womduwomdu tihikuxäwik, mängätña using inikum. ‘Gätä näle nomän tahaxawi, yotyotbä säneka kuhimu, näle gätä “Hamina” yang yäniyo,’ yang inikum,” yang yakut, Abrahamdän.

<sup>14</sup> Tiwänä Abimelegä Sara Abrahamde hipdu imikut. Imike towiyä gämän, sipsip, puyä ämin yang imikut. <sup>15</sup> Imikengä Abrahamu using inikut. “Awomu näle kepgän. Gika sawomuneka yiwitnangge natakungu, une yiwiyoy,” yang inikut.

<sup>16</sup> Inikengä Sara using inikut. “Nätä hamindale moningu silwa meyanä 1000 sekel\* imit, gutongä uläknga gäle tahakumden. Tiwän äminbamu gäxät yiwixayinggä using natäpning. ‘Gä gutongä tükngatu dolahakuläk,’ yang natäpning,” yang inikut.

<sup>17-18</sup> Tiwänä Abrahamdä Anätule tumuk wam yakut. Tupä Abimelegä Abrahamde mängät täpän, Yawetä mängälä undä Abimelekät nanä engang dayike pänangäsä bäniyä umukut. Tiwäna Abrahamdä ile tumuk wam yawän, Anätutä Abimelek, mängätñä, mängälä puyä äminä yang gatängyämän, hipdu engang dayike pänangäsä täke tikin.

## 21

### *Saratä Aisak kake tükut*

<sup>1</sup> Yawetä Sarale natake apuke, yakap wamu hiyäkän tüknga yakulu tahawän bulä tikut. <sup>2</sup> Abrahamu äminäläke aliwänä, Sara tängene käyä tiwän, täpduxu Anätutä yakut gwenune, engangu wäwi täpä kake tükut. <sup>3</sup> Täpänä Abrahamdä umanä Aisak\* yang inikut. <sup>4</sup> Tixawän täpduxu 8 gwendä apän, Abrahamdä engangäle gup matäkut, tupä mämä wam tüknga Anätutä yakut using. <sup>5</sup> Abrahamu krismasnä 100 yiwixawän, Aisaxu alakut.

<sup>6</sup> Saratä using yakut. “Anätutä bänip gwaläng tüknga namän, axuläkake mikgat. Ge äminbamdä ile natakungu, näxät axuläkake mitnim,” yang yakengä, <sup>7</sup> unetäkän yakut. “Tupä äminbamu ‘Abrahamde mängälu Sara engangä dombä kake täpik?’ yang natäppin. Tiwändeyä Abrahamu äminäläke aliwänä, engangä kake tänggat,” yang yakut.

### *Abrahamdä Hagarxät Ismaelkät yangyävambän kukumäläk*

<sup>8</sup> Aisaxu bulämbam tike, mämu tewän kakengä, Abrahamdä naxu bulämbam gwen hawän nakin. <sup>9</sup> Tiwänä Saratä kaxawänu, wawakngä Aisaxu Abrahamdä Isip nanä mängälä Hagar uläpä tükutde wawakngä wäyi tükngaläknga inixäwik inimikut. <sup>10</sup> Kakengä Abrahamu inikut. “Mängälä puyä äminda uläpäxät wawakngäxälu yangyävambi kukakun. Axungwäxawi, puyä äminda uläpäle wawakngä hängä täpäka dowäpik. Tike näle wawaxu Aisakgäkän päpik,” yang inikut.

<sup>11</sup> Ismaelu Abrahamdä inä wawak. Ge ayangyävambikge yawänu, meyä päkut. <sup>12</sup> Tiwän Anätutä Abrahamu using inikut. “Wawakga Ismael äwä puyä äminda Hagar yangyävambiläkge, meyä mawäyo. Saratä dasingga yak using tahayo, inale ‘Bapukambamu meyä hikngä tiwik,’ yangu hiyäkän wam tüknga ganikumu, wawakga Aisakge tiwän yakum. <sup>13</sup> Tike puyä ämindale wawakäyä tahawa, meyä sakngäläke kantrinä inätä täke yiwitning, inale ixäyä wawakga,” yang inikut.

\* **20:16:** Hibru wamune 1000 sekel yangu 11.5 kilogram. \* **21:3:** Aisak yangu yäpuli ‘mikgak’.

<sup>14</sup> Kwepdätä gwäsi hikngä, Abrahamdä nak, yanggä kälap guwune uhike pekinunin yang päkapu, Hagarde gwälamune pekut, wawakngäxät. Pewän päke, Berseba kepgän womune päke tihikukut. <sup>15</sup> Yanggä kälap guwune päkulu alängopät puluwän, wawakngä pa mätekngä kwämbätsimde gepmä tekut. <sup>16</sup> Teke “Wawaknga kayitä hikngä doxaxawa kupik,” yake, inäkän päku malähimsim yiwixäwik, kwänämnä tikut.

<sup>17</sup> Engängä kwänäm tiwän, Anätutä natäpögut. Tiwän Anätule ängelatä Hagaru yekäwunetä using inikut. “Hagar, inale tikgaläk? Engang täpä awexäwik tixu, Anätutä anatak. Ge manaxälayo. <sup>18</sup> Ku kätakngäne täke täpi enawän, inale nätä tahawa ile engangu meyä sakngälake, kantrinä inätä täke yiwitning,” yang inikut.

<sup>19</sup> Tiwänä Anätutä tahawän, kayi kakalä tiwän, gäpma yanggäle kwayik-inu däkätu kake, täku kälap guwu une tewän pukuwän dopän, täkapu wawakngä imän tängopögut.

<sup>20</sup> Wäwi mätexu uläpä aläkaxawän, Anätu ixät yiwikumäläk. Paran kepgän womune yiwixäwik, kwalemu mutnatäpögut. <sup>21</sup> Tixawän mingätä mängätinä Isip nanä täkapu imikut.

### *Abrahamkät Abimelekät wam yakumäläk*

<sup>22</sup> Täpduxu gwendune Abimelekät Fikol amäk äminäle kuhiläle yiwixakut uläpäxät ku, Abrahamu using inikumäläk. <sup>23</sup> “Inaka pahaläxu, Anätutä gatänggaminggak. Ge Anätule umande wamu kitokngä hikngä naniyo. ‘Gä, wawakga, bapuka yangu kemu dondaniwit,’ yang niniyo. Nätä gäle nomän tahakum usinggän, gätäxäyä nä äwä kantri anggäpang apuyiwitde päkapu yiwixaläk yangge usinggän tahayo,” yang inikut.

<sup>24</sup> Iniwän Abrahamdä “Anätule umande kitokngä hikngä yänggat. U yänggaläk usingu äpme tahawit,” yang inikut.

<sup>25</sup> Tikengä using inikut. “Yanggä gäpma däkätu kwayikumu, puyä ämindatä kukäle inale täke towikngä däkngaying?” yang inikut.

<sup>26</sup> Tiwändeyä Abimelekgä “Ngä, itä täkin yangu donatät. Moyokän tahawä donanikuläk. Ngä äpmangän yawi natäxat,” yang inikut.

<sup>27</sup> Tiwänä Abrahamdä sipsip, towiyä gämän yang päkapu, Abimelekgä imän, kontrak tahakumäläk. <sup>28</sup> Unetäkän Abrahamdä sipsip mätexu mängälä 7 päkapu inätä pekut.

<sup>29</sup> Pewänä Abimelekgä Abrahamu using inikut. “Sipsip mätexu mängälä 7-u uläkwäxu, inätä yäpuli dasingge peläk?” yang inikut.

<sup>30</sup> Iniwän “‘Yanggä gäpma unggwenu Abrahamdä kwayikut,’ yake, sipsip mätexu 7-u uläkwäxu näle kätaxune awäyo,” yang inikut.

<sup>31</sup> Äminu uläpäyätädä Anätule umande wamu kitokngä yakumäläkge, kewu uwomu umanä Berseba† yang inikaying.

<sup>32</sup> Unin tahawät wenä tiwän, Abimelekät Fikol amäk äminäle kuhilä uläpä yangu hipdunä Filistia nanäle kewune kukumäläk. <sup>33</sup> Tixawän Abrahamu pa däkätu Berseba kwayike, Anätu Iwikge Yiwixak Täpäle tumuxu une yakut. <sup>34</sup> Tikengä Filistia nanäle kewune belakngä yiwikut.

## 22

### *Anätutä Abrahamde bänip yake kakut*

<sup>1</sup> Berseba yiwixawängän Anätutä Abrahamde bänip yake kakut. “Abraham,” yawän, Abrahamdä “We!” yang inikut.

† 21:31: Hibru wamune Berseba yangu yäpuli ‘wamu kitokngä yanggä gäpma’.

<sup>2</sup> Tiwänä Anätutä using inikut. “Abraham, wawakga Aisaxu buläkän hikngä uläpä bänipda yangu anatät. Tiwändeyä täpi Moria kewu uwomune kuhon. Tiwänä nätä täwalu däkätu yäwa kakengä, täku undäkäne tänguwi kupän, Aisaxu ofa näle hawi ihikuyok,” yang inikut.

<sup>3</sup> Abrahamu kwepdätä gwäsi hikngä enake, hängäläpä donggi tängäne päko peke, puyä äminä täpälä äwä wawakngä yang päke kukut. Ku däki ofa häwikge wehike päke, kewu Anätutä inikut womune kukut. <sup>4</sup> Axuxawän täpduxu gwenälä gwendu apän, kwayiwän enawänu, kep womu malätä kakut. <sup>5</sup> Kake puyä äminä uläpäyalu using yänikut. “Gilu donggixät ane yiwixätngong. Tixawän Aisakät nitdäkän täku, Anätule sopäsopä puke, tumuk wamu inikengä, hipdunit apsim,” yang yänikut.

<sup>6</sup> Tikengä däki ofa hängenge päkulu, wawakngäle imän gwälamikut. Tiwänä inä däkixwäm äwä musuk yang päpän kukumäläk. <sup>7</sup> Äxuxäwik Aisakgä “Nan” yawän, nanätä “Ina?” yakut.

Tiwänä Aisakgä “Ngä, däkixät däkixwämkälu awämäk. Tiwändeyä sipsip mätexu ina tänguke hahim?” yawän, <sup>8</sup> nanätä using inikut. “Anätutä inä äpme nimik,” yang inikut. Tiwän kukumäläk.

<sup>9</sup> Kuhika täwalu Anätutä inikutdäkäne kondoke, alta tahake, däki päko pekut. Peke wawakngä napdä wamäke, tako alta tängäne däki pekulune, enetängä tekut. <sup>10</sup> Teke musuk täke, wawakngäle guläk matäwikge tändäkngakut.

<sup>11</sup> Tiwändeyä Yaweale ängelatä yekäwunetä using inikut. “Abraham, Abraham,” yawän, Abrahamdä “We! Nä ane,” yakut.

Tiwänä ängelatä using inikut. <sup>12</sup> “Wawakga malänguyo. Tike hängä täkngatu ile malahayo. Gä Anätule naxälake, wamnä gwälamikgaläk yangu anatät, inale wawakga täpätükänu uläpä Anätule imiläkge doxotnaläk,” yang inikut.

<sup>13</sup> Tiwänä Abrahamdä kwayiwän enawän tahakengu, sipsiwu wäwi gwendu songä gitnä tupätuhimune apän, komnäne tapiwän yiwixawän kakut. Kake, wawakngäle tangge ku täkapu, unggwenunin tänguke, häwän ihikukut. <sup>14</sup> Tiwän Abrahamdä kewu uwomu umanä “Yawetä äpme nimik,” yang inikut. Ile tiwän äpmasimkäyä “Yaweale täwal däkäne äpme nimik” yang using yäkaying.

<sup>15</sup> Hipdu Yaweale ängelatä yekäwunetä “Abraham” yake, using inikut.

<sup>16</sup> “Abraham, Yawetä gäle using yak. ‘Wawakga täpätükän tiwändeyä doxotnaläkge, nina umande hiyäkände using yänggat.\*’ <sup>17</sup> Nätä bänip kwikwik gama, bapuka kuminamu yekäwune nanä äwä haluhalu yanggäne nanä yang bimä meyä hikngä äpme tike, iwalnä sipmäke, iwalnäle taunu towikngä däkngake, päke, yiwitning. <sup>18</sup> Gätä näle wam gwälamiläkge, bapukale tiwän, kantri kewune nanä undä bänip kwikwixu äpme päning,’ yang yak, Yawetän,” yang inikut.

<sup>19</sup> Tiwänä Abrahamu Aisak täpän, hipdu puyä äminäle kuwät, hipdunä Berseba kukin. Täku une yiwikut.

### *Nahorde wawak*

<sup>20</sup> Womdu yiwixawänä, Abrahamu using inikin. “Ulapda Naholkät mängätinä Milkaxälu engangu andukngikumäläk. <sup>21</sup> Yakap täpä Us. Tiwänä

\* **22:16:** Äminu tupä nanä wamnä päpä kitokaningge natäkengu, äminu bulämbam täpäläpäle uman yake, “Ile umande yänggat,” yakakin. Tiwändeyä Anätutä inä wam täpän kitokawikge natäkengu, äminu täpätule umande yänangäsändo, inale Anätu enen hikngä, tiwän ämimbamu ayapmikut. Ile tiwän, “Nina umande yänggat,” yangu yakut.

ulapnä Bus, Kemuel, <sup>22</sup> Kesed, Haso, Pildas, Jidla, äwä Betuel yang dukngikut,” yang inikin. Kemuelu Aramde nanä. <sup>23</sup> Tiwänä Betuelu Rebekale nanä. Milka Naholde mängälu engangu using 8 dukngikut. <sup>24</sup> Tiwän puyä äminä mängätnäle täkulu umanä Reuma. Ile wawaxu umanä Teba, Gaham, Tahas, äwä Maka yang.

## 23

### *Saratä kupän, Abrahamu kep uhikut*

<sup>1</sup> Sara krismasnä 127 yiwike kungut. <sup>2</sup> Kenankätanu taunu womdu Hebron\*, uwomune kupän, Abrahamu butayä natäke, kwänäm tixäwik, gwäyäm yiwikut.

<sup>3</sup> Gwämyämde yiwikulunetä ku Hit nanä Hebron yiwixayingu using yänikut. <sup>4</sup> “Nä apuyiwit bä malä nanä. Ge kewu womduhimu täkembä namining, tiwän uhike mängätna une kwayiwit?” yang yänikut.

<sup>5</sup> Tiwän Hit nanätä yäkwäle using inikin. <sup>6</sup> “Abraham bulämbam täpä, Gä nin bänäkänkätanu umanda käyä. Ge ninde mätmälu gwälam hikngä däkätu gika kake yawi, doxotnanim. Tiwän axungäk täpä mätmälu undäkäne kwayiyo,” yang inikin.

<sup>7</sup> Tiwän Abrahamu enake, “Ginde natäpa konggak,” yang natäke, Hit nanä u yiwikinde kayine guläk puke,† <sup>8</sup> using yänikut. “Mängätna kwayiwitde täke natäkengu, näle map päke, Efron Soharde wawaxu gindä täkembä inining? <sup>9</sup> Tiwän Makpela Hupgänangu Efronde kep kwayimune yiwixak däkäle moning namba naniwän, mätmätnale‡ uhiwit,” yang yänikut.

<sup>10</sup> Efronu Hit nanä uläpä notnäle bänäkänkätan yiwikutnä, notnä taunde yämä däkäne u päkapu yiwikinde kayine, Abrahamu using inikut. <sup>11</sup> “Bulämbam täpä, natäxayo. Notnambamde kayine using ganinanggeng-gat. Hupgänanggänu donggamit; tike kewu inä uwomkät gamit. Tiwän axungäk täpä kwayiyo,” yang inikut.

<sup>12</sup> Tiwän Abrahamu hipdu yot towixu u yiwikinde kayine guläk puke, <sup>13</sup> Efronu using inikut. “Gätä täke natäkengu, moningge namba naniwi gama awäyo. Tiwän axungäk täpä une tewit,” yang inikut.

<sup>14</sup> Efrondä Abrahamu using inikut. <sup>15</sup> “Abraham bulämbam täpä, natäxayo. Moning namba kewu uwomdäne silwa meyänä 400 sekel§ usinggä uhinangäsä. Tiwändeyä nit bimäsäle moning namba undäkä bulämbamundo. Ge axungäk täpä täke kwayiwiläk,” yang inikut.

<sup>16</sup> Unin yawän natäpän take tiwän, Abrahamdä silwa Efrondä Hit nanäle kayine yakut using, bisnis ämindä uhikakindäkäne meyänä 400 sekeldä uhikut. <sup>17-18</sup> Uhiwän, Hit nanä taunde yämäne päkapu yiwikinde kayine, Efrondä kepnä Makpela nanä uwosimu Abrahamde imikut. Kep, hupgänang, äwä pa uwomune nanä yangu undä inäle imikut. <sup>19</sup> Imän mängätnä hupgänangu Makpela nanä undäkäne täku tekut. Makpelaxät Mamrexälu wäkngäsim wäkngäsim, tiwän Hebronkätan. Tiwänä Hebronu Kenankätan. <sup>20</sup> Hit nanätä kewu uwom äwä hupgänangu undäkä yangu mätmätnäle tupäkände inäle imikin.

\* **23:2:** Hebronde umanu täkngatu Kiriät Arba. † **23:7:** Äminu uwomune nanä notnäle “Gäle natäpa konggak,” yäningge natäkengu, ile kayine guläk pukakin. ‡ **23:9:** Äminu axupä, hupgänangune päko pekakin. § **23:15:** Hibru wamune 400 sekel yangu 4.5 kilogram.

## 24

### *Abrahamdä puyä äminä wawakngäle mängät ku kake täkapikge inikut*

<sup>1</sup> Abrahamdä inaka pahakulu, Yawetä bänip kwikwik yämän, nomängän tikin. Tixawän Abrahamu äminäläke hikngä damäsım tikut. <sup>2-4</sup> Puyä äminde kuhiläle yiwixäwik hängä täpänä daying yiwixak täpä using inikut. “Wawaknga Aisaxu mängätnä ane Kenan nanä mayangämiyo. Tike kantrinane ku, mängälä ninaxät nanä täpätu täkapu imiläkge natät. Ge kätakga bakanale kematde täxäwik, Anätu Yawe kepkät yekäpkät pahakut täpäle umande ‘Usingu äpme tahawit,’ yangu hiyäkände hikngä naniyo,” yang inikut.

<sup>5</sup> Tiwän puyä äminätä using inikut. “Ngä axu yäwa, mängälä täpätä ane apikge ämbitawänu, dasing? Täkebä apu wawakga une täke kuwit?” yang inikut.

<sup>6</sup> Iniwän Abrahamdä using inikut. “Wawaknga uwomune mahikngä täke kuyo. <sup>7</sup> Yawe Anätu yekäwune nanä täpätä naniwän, kepna äwä kepnatna yang peke ane apa, hiyäkän wamu using nanikut. ‘Bapukambamde kewu awomu äpme yämit,’ yang nanikut. Ge itä ängelanä gämäxu äpme iningyäpiwän kuxawänä kuwi, mängälä uwomune nana täpätutä ‘Täke’ yangu äpme yawän, wawakngale täkapiläk. <sup>8</sup> Mängälä täpä gäxät ane apsimäläkge ämbitawänu, hiyäkän wamu Anätule umande yäwiläkga meyä manggamiyok.\* Tike wawaknga une maläke kuyo,” yang inikut.

<sup>9</sup> Tiwänä puyä äminätä towikngä Abrahamde baki kematde kätäkngätä täxäwik, “Wamu u yänggaläk using hikngä äpme tahawit yangu Anätule umande ganinggat,” yang inikut.

### *Abrahamde puyä ämindä Rebeka kuke kakut*

<sup>10</sup> Abrahamde puyä äminätä hängä gwälamgwälamu Abrahamdäne päke, kamelu Abrahamdäne 10 päke kukut. Kuhika, kewu Mesopotemia kuke, taunu Nahor kundopgut. <sup>11</sup> Kewu alukwäxawän kundoke, yanggä gäpma, taun kwayimune yiwixak däkäne kuke, kamelu ile inälängän yäniwän puku yiwikin. Täpduxu usä womune, mängälätä yanggä uhiningge kukakinunin.

<sup>12</sup> Ge ile tiwän tumuk wamu using yakut. “O Yawe, gä towiknga Abrahamde Anätu. Abrahamu towiknga. Ge Abrahamde gwälam hikngä tahake, gatängamiyo. Tiwän puyä pahawa täke tiwik. <sup>13</sup> Nä yanggä gäpma andäkane yiwäxäwa, mängälä mätexu taunune nanä yanggä uhiningge aapukaying. <sup>14</sup> Ge mängälä täpätu apän, ‘Yänggälumändanetä yanggä uhike nami tängopa,’ yang iniwit. Iniwa mängälä uläpätä yäkwäle wamu ‘Tangop. Tiwän kameldalexäyä uhike yäma,’ yang yawänu, ‘Mängälä uläpä puyä ämindä Aisakge tuwänguläxunin,’ yang natake, ‘Gätä towiknga Abrahamde gwälam hikngä alahaläk,’ yang natäpit,” yang inikut.

<sup>15</sup> Tumuk wamu ayäxawänggän, Rebeka yanggälumänä gwälamike apgut. Mängälä uläpä Betuelde yäpa. Tiwän Betuelu Nahorkät Milkaxätde wawak. Tiwän Nahoru Abrahamde notnä. <sup>16</sup> Rebeka nomnä däkä gwälam hikngä. Tiwän mängälä mätek. Wäwi täpätuxälu doyiwikumäläk. Rebeka yanggä gäpmane puku yanggälumänäne uhike, hipdu akopgut.

<sup>17</sup> Akopän Abrahamde puyä ämindä yupsäng ku using inikut. “Yänggä yanggälumändane täläxu täkebä nami tängopit?” yang inikut.

<sup>18</sup> Iniwän “Täke, bulämbam täpäna,” yang inike, yanggä anggwälamikulu yupsäng täkepuké imän tängopgut.

\* **24:8:** wamu ... meyä manggamiyok. Äminu anätunäle umande hiyäkände hikngä yäkakinu, “Using hikngä tahawit. Tike usingu dolahawa kakengu, itä täke nuwik,” yang natäxäwik yäkakin.’

<sup>19</sup> Tiwän mängälä mätexu uläpätä using inikut. “Yanggä kameldalexäyā uhike yāma inä natäpning using tängopning,” yang inikut. <sup>20</sup> Inike yanggä yanggälumänune nanä kamelde gehanune yupsäng piwän yiwä, hipdu yanggä gäpmane ihapmäke täku uhipäkapu pingyäminggawän, kamelu undä tängopä, täke tikut.

<sup>21</sup> Tixawänu puyä äminu uläpä wamu doyake axupitang yiwikut. Yiwixäwik “Nätä natäke apulu, Yawetä äpmembä tahawän, nomänu tiwän kawit,” yang natäxäwik kang yiwikut.

<sup>22</sup> Tiwän kamelu tängopäyā, puyä ämindä nomtäpänäle goldä pahakinu gutonggu äwä kätahiwu goldä pahakinu gutongalä yangu yäkngänetä sikut. Nomtäpänäle goldä pahakinu unggutongu meyänä 5 grem. Tiwän kätahiwu goldä pahakinu unggutongalu meyänä 100 grem. Tiwän moningu inulunggä uhinangäsä. <sup>23</sup> Sikengä using inikut. “Täkembä naniwiläk? Ngä gä iminde yäpa? Nanggale yotkätanu awetnangäsä käyā? Tiwänä äminu näxät apumängu une täke bä petnim?” yang inikut.

<sup>24</sup> Iniwän “Nä Betuelde yäpa. Nana Betuelu Nahorkät Milkaxätde wawak,” yang inikut. <sup>25</sup> Inike unetäkänu using inikut. “Kameldale nakngä äwä awetnangäsä† yangu käyā. Tiwän yolu gindä petningge käyā,” yang inikut.

<sup>26</sup> Iniwän puyä äminu uläpätä Yaweke sopäsopä puke, däme kepkätan täpu temäke, tumuk wamu using yakut. <sup>27</sup> “Yawe towiknga Abrahamde Anätu uläpäle uman tängenäkgat. Yawetä towikngale iwikge natäxäwik, gwälam hikngä tahanggak. Ile tahanggak usinggän, näxäyā towikngale notnäle yolune hikngä nanitäkapuk,” yang yakut.

*Abrahamde puyä äminkät Rebekale mingänanäxätdä wam yakin*

<sup>28</sup> Tiwän mängälä mätexu uläpätä ihapmäke, mingäle yolune ku hängä dasingga apän kakulu undä yänikut.

<sup>29-30</sup> Rebeka haminä täpätu käyā. Umanä Laban. Rebekatä apän, Labandä nomnäne nomtäpänäle tekut gutongkät kätahiwu kätakngäne pekut gutongatkät dayipgut. Tiwän Rebekatä “Äminu täpätutä using nanik,” yang yäniwän natäke, haminä Labanu äminu uläpäle yupsäng kukut. Kungu kamelnäxät yanggä gäpma däkäne inälängän yiwixäwä dayipgut. <sup>31</sup> Dayike äminu uläpä using inikut. “Gä Yawetä bänip kwikwik gaminggaxunin. Kepmänu inale yiwixaläk? Yotna aländäkngake, kameldä petnangäsä womkäyā aländäkngat. Ge api kukana,” yang inikut.

<sup>32</sup> Iniwän äminu uläpä, puyä ämin notnä, kamel yangu Labande yolune kukin. Kuwä hängäläpä kamelune päko pekinu päkepu pekin. Tiwän kamelde nakngä, gras yang yämike, äminu uläpäxät puyä ämin notnäxätdä bälängä hälutningge yanggä päkapu yämikin. <sup>33</sup> Tikengä naxu päkapu yämä, äminu uläpätä using yakut. “Nä naxu yupsängu donäpit. Tike wamu natälunin gämäk danikengä näpit,” yang yakut.

Yawän Labandä “Täke niniwiläk,” yang inikut.

<sup>34</sup> Tiwän äminu uläpätä using yakut. “Nä Abrahamde puyä ämin. <sup>35</sup> Yawetä towiknga bänip kwikwik imän, hängänämbamgän tikut. Sipsip, towiyä gämän, silwa, gol, puyä äminu mängälä wäwi, kamel, donggi yang imikut. <sup>36</sup> Towikngale mängälu Sara äminäläke hikngä alikengä, engangä wäwi täpätu dukngikut. Tiwänä towiknga Abrahamdä hängä täpänä undä wawakngä uläpälekän imikut.

† 24:25: Kamelde nakngä äwä awetnangäsä Wilu bulä päxäwik, kwätälä täpäläpä päkapu yolune pexakinunin. Tiwän kamelnä ulängäne pekakin. Tixawän nakngäle naxu tämbam salin bimä yämä näkakin.



37-38 “Tikengä wamu kitokngä hikngä tākngä using nanikut. ‘Anätule umande “Usingu äpme tahawit,” yangu hiyäkände hikngä naniyo. Wawakngale mängälu ane Kenan nanä mayangämiyo. Tike nanale notnāmbamde kuke, mängälä mätexu ninaxät nanä täpätu takapu wawakngale imiyo,’ yang nanikut.

39 “Naniwän using inikum. ‘Ngä axu yäwa, mängäla täpätä ane apikge ambitäwänu, dasing tahawit?’ yang iniwa, using nanikut.

40 “‘Nä Yawele wam gwälaminggatde, itä ängelanä äpme iningyäpiwän, ixät kuhimäläk. Tiwän itä gatänggamän, mängälä kepnotna tiwän ninaxät nanä hikngä täpätu äpme takapu wawakngale imiläk. 41 Tike kepnotnale kuwi, axotnake mängälä täpätu donggamä kakengu, wamu Anätule umande hiyäkände hikngä u nanningaläk tākngatä meyä donggamik,’ yang nanikut,” yang yänikut, Abrahamde puyä ämindän.

42 Unetäkänu using yänikut. “Äpmanu yanggä gäpma dākäne apukengu, Yawe using init. ‘O Yawe, towiknga Abrahamde Anätu. Malätä hikngä apunggat. Ge nätä ahikngä natäke apulu, gätä gatängamiyo. Tiwän puyä pahawilu nomän tiwik. 43 Nä yanggä gäpma andäkane yiwixawit. Tixawän mängälä mätexu täpätutä yanggä uhiwikge apänu, “Yanggälumändanetä yanggä uhike nami tängopa,” yang iniwit. 44 Iniwa mängälä uläpätä yäkwäle wamu “Tängop. Tiwänä kameldalexäyä uhike yäma,” yang naniwänu, “Mängälä aläpä Yawetä towikngale wawakge tuwänguxunin,” yang natäpit,’ yang init.

45 “Tumuk wamu bänipnane ayäxäwakän, Rebeka yanggälumänä gwälamike apuk. Apuke yanggä gäpmane puku yanggälumänäne uhiwän, using init. ‘Yanggä tākembä nami tängopit?’ yang init.

46 “Iniwa yanggä anggwälamixu yupsäng takepu namike, using nanik. ‘Tängop. Tiwän kameldalexäyä uhike yäma,’ yang nanik. Tiwän tängopa, kameldexäyä uhike yämän tängoying.

47 “Tiwänä ‘Gä iminde yäpa?’ yang init.

“Iniwa ‘Nä Betuelde yäpa. Nana Betuelu Nahorkät Milkaxätde wawak,’ yang nanik.

“Naniwän, nomnäne nomtäpänäle tengämike, kätakngäne kätahiwu pengämit. 48 Tikengä sopäsopä puke, dämänä kepkätan täpu temäke, Yawele tumuk tahat. Towiknga Abrahamde Anätu uläpäle uman yatängenat, inale itä towikngale daknotnäle yäpa nätä towikngale wawakge täku imitde nanitäkakupuk,” yang yakut.

49 Yänike using yänikut. “Ge gindä towikngale natäke, gwälam tahaningge natäkengu, take nanining. Tike gwälamu dolahaningge natäkengu, ixäyä take nanining. Tiwän nä dasingga tahawit yangu natäpit,” yang yänikut.

50 Tiwänä Labankät Betuelkätdä yäkwäle wamu using inikumäläk. “Hängä aläknga Yawetä tahanggak. Ge nindä take bä tākendo yangu yänangäsändo. 51 Take, take take kuwiläk. Yawetä natäk using, täku towikngale wawakge imi, mängätnäle täpik,” yang iniwät, 52 natäke Abrahamde puyä äminu uläpätä Yawele sopäsopä puke, dämä kepkätan täpu temgut.

53 Tikengä hängä gol silwa yanggä pahakinu Rebekatä pahanangäsä äwä täwik yangu Abrahamde puyä ämindä yäkngänetä sike imikut. Imikengä bänip gwalängge haminäxät mingäxätde hängä moningu kopsä hikngätä uhikayingunin yämikut. 54 Tiwänä äminu uläpaxät notnä apginkälu naxu nake, kupilä unggwenune däpmunä une pekin.

Kwepdätä enake, äminu uläpätä using yakut. “Nä äpmanu towikngale tākembä kungawit?” yang yäniwän, 55 mängälä uläpäle haminkät

mingäxätdä yäkwäle wamu using yakumäläk. “Mängälä täpä nihäxät yiwixätna, täpduxu 10 usä apuxuwänä kunong,” yang inikumäläk.

<sup>56</sup> Iniwät deyä using yänikut. “Nätä natake apgumu, Yawetä gatängamän, puyä pahalü nomänu alik. Ge mananindäkngänong. Tewä tokwikngale kunggäwa,” yang yänikut.

<sup>57</sup> Yäniwän using inikumäläk. “Mängälä uläpä inina inä mapdä hikngä yäwik,” yang inike, <sup>58</sup> Rebeka yatäwambät apän “Äminu aläpaxälu äpmanu axuhimäläk?” yang iniwät, “Täke. Äpme kuhim,” yang yakut.

<sup>59</sup> Tiwänä Rebeka, mängälä Rebeka kang yiwixak täpä, äwä Abrahamde puyä äminä apgin yang axuningge tahaxawä, <sup>60</sup> Rebeka wam gwalängu using imikin. “O Rebeka, gä engangu meyä hikngäle apekngä däkungawiläk. Tiwän bapukambamdä enake, iwalnä sipmäke, yot gäpanggäpangu päning,” yang inikin.

### *Aisakgä Rebeka mängätnäle täkut*

<sup>61</sup> Iniwäyä Rebeka äwä mängälä puyä äminäle päpän pahangämikaying täkwäk yang u kamel tängäne päko yiwä, yolu uwomu teke, Abrahamde puyä äminätä gämäk kuxawän kukin. Abrahamde puyä äminu uläpä using tahake, Rebeka täke kukut.

<sup>62</sup> Aisaxu kewu Negep uwomune † päku yiwikutnä, Käluk Yiwäxäwik Nanduxak Täpäle Yanggä§ teke, hipdu apgut. <sup>63</sup> Gwendune tukwatde hikngä, songäxätan ku moyo tihikuhika, \*\* kwayiwän enawän tahakengu, kamelu apunggäwä kakut.

<sup>64</sup> Tixawän Rebekaxäyä kwayiwän enawänu, Aisaxu tupäkände kakut. Kakengu kamel tängänetä pälängepeke, <sup>65</sup> “Äminu ätuläpä nin nindupikge apunggaxu imin?” yang inikut, Abrahamde puyä äminun.

Iniwänu “Näle towiknga, Aisak,” yang inikut. Tiwän Rebeka täwikngä täke, nomnä omik umukut.

<sup>66</sup> Tiwänä Aisaxu puyä äminätä hängä dasinggä tahakulu, undä une inikut.

<sup>67</sup> Tiwänä Aisakgä Rebeka mingä Sarale selyolune initäke koke, mängätnäle täkut. Täke Rebekale täke hikngä natäpgut. Mingätä kupänu butayä täkngane yiwikulu, Rebekata apungä, Aisakge bäniwu tänguwän epgut.

## 25

### *Abrahamu engangu täkwäkguxäyä hipdu towikengä kumgut*

<sup>1</sup> Sara kupänä, Abrahamu mängätnä hipdu täpätuxäyä äläkut. Umanä Keturä. <sup>2</sup> Tiwän itä dukngikulu, wawakngä 6. Umanä Simran, Joksan, Medan, Midian, Isbak äwä Sua yang. <sup>3</sup> Joksandä täkake, wawakngä itä towikulu Seba Dedan yang. Tiwänä Dedandä täkake Asu, Letus, äwä Leum yang towikut. Tiwän unetä sakngälake Asu, Letus, äwä Leum yangge bapunä yaxäwik yiwikin. <sup>4</sup> Tixawänu Midianu, wawakngä 5 towikut. Umanä Epa, Eper, Hanok, Abida äwä Elda yang. Äminu aläkwäxu Abrahamde mängälu Ketulale ayinä.

<sup>5-6</sup> Abrahamu mängätnä Sarale mehene päkutde wawakge hängä bänip gwalängge doxungäxäwik uhike yämikut. Yämike Aisaxu inäkän yiwikge natake yäninyäpiwän, uwomu teke, kewu gusitdä akonggak käwut päku yiwikin. Tiwänä hängänä undä wawakngä Aisakgekän pengämikut.

† **24:62:** Negep Gatäkgatäk wamu Yakap 12:9-de temginune känangge. § **24:62:** Käluk Yiwäxäwik Nanduxak Täpäle Yanggä Yakap 16:14 une känangge. \*\* **24:63:** moyo tihikuhika Wamu Hibru wamune temginu aläknga yäpuli kätak hikngä donatäxaying.

<sup>7</sup> Abrahamu krismasnä unekänu 175 yiwikut. <sup>8</sup> Bänip kwikwixune krismasu naxälä yiwixäwik, äminäläke hikngä tikut. Tike kungäke, bapunä tupä kumginde kukut.

<sup>9</sup> Tiwänä wawakngä Aisakät Ismaelkätdä nanäle guwu täku, hupgänangu Makpela nanä däkäne tekumäläk. Makpeläxät Mamrexälu wäkngasim wäkngasim. Tiwän hupgänangu undäkä Epronde kewune yiwixakut. Epronu Hit nanä, tiwän Soharde wawak. <sup>10</sup> Kep, hupgänangu undäkä yangu mängätnä Sara tewikge natäkengu, Abrahamdä Hit nanäle kätaxune tupä auhike, mängätnä Sara hupgänangu undäkäne tekut. Ge inä kupänkäyä, wawakngätä undäkänäkän tekumäläk.

<sup>11</sup> Abrahamu kupänä, wawakngä Aisaxu Anätutä bänip kwikwik imixawän, Käluk Yiwixäwik Nanduxak Täpäle Yanggäle\* wäkngäsim yiwikut.

### *Ismaelde wawak täkwäk*

<sup>12</sup> Wamu aläknga Abrahamkät Hagarkätde wawaxu Ismaelde wam. Hagaru Isip nanä uläpä Sarale puyä äminde yiwikulunin. <sup>13</sup> Wawakngä Ismaelde wawakge umanu yakap täpänetä ku wasekngä täpäne using. Yakap täpä Nebaiot, ile mehene Kedar, ile mehene Adbel, ile mehene Mipsam, <sup>14</sup> ile mehene Misma, ile mehene Duma, ile mehene Masa, <sup>15</sup> ile mehene Hadad, ile mehene Tema, ile mehene Jetur, ile mehene Napis, tiwänä wäsekngä täpä Kedema.

<sup>16</sup> Ismaelde wawaxu 12 uläkwäxu yolu inäinä gäpanggäpang ku pahake yiwitäke kukin. Tikengä yolu unggäpanggäpang pahakinde kuhiläle inä yiwitäke kukin. Yolu u ku pahake yiwikin wopwomu bapunä mahande alake yiwikindä yot umanu bapunä yakawu u yiwikinde uman yänikin.

<sup>17</sup> Ismaelu krismasnä 137 yiwike kumgut. Kungäke bapunä tupä kumginde kukut. <sup>18</sup> Tixawän bapunä mahande alakindä kewu Hawilaxät Surkätde bänäkängän päku yiwikin. Hawila Sur yangu Isipkät Asurkätde bänäkän yiwikumäläk, tiwän Isipde wäkngäsim. Ismaelde bapunätä Aisakge bapunä tokngä dayipä yäkwälexäyä usinggän pahawä yiwixakin.†

### *Aisakgä Isoxät Jekopkät towikut*

<sup>19</sup> Wamu alakngä Abrahamde wawaxu Aisakge wam.

Abrahamdä wawakngä Aisak towimbän, <sup>20</sup> Aisaxu krismasnä 40 yiwikengä, mängätnä Rebeka täkut. Rebekale nanäle umanu Betuel. Tiwän haminäle umanu Laban. Betuel yänggwälu Aram nanä. Tiwän kewu Mesopotemia yiwixakin. Ge ile yäpa Aisakgä täkut.

<sup>21</sup> Täkutnä engang hongge yiwän, mängätnäle natäke, Aisakgä Yawe tumuk wam inikut. Iniwän Yawetä gatängämän, tängene kayä tikut. <sup>22</sup> Rebekale bäniwune engangu täpäyalatä yiwike, mingäle bänipkätan amgumäläk. Tiwän “Usingu inaleka tinggak?” yake, Yawele yawänyak tahakut.

<sup>23</sup> Tahawänu Yawetä using inikut.

“Tängäkane engangu täpäyalä. Tiwän uläpäyalu kantri gäpangalä äpme upuke yiwisimäläk.

Tikengä gäpanggutä äpme kitokake, notnä yapmitning.

Tiwän payänä ulapnäle gepbine äpme yiwik,” yang inikut.

<sup>24</sup> Ge täpduxu engang dayike päkut gwenune wawakngä ukgatäp dayike päkut. <sup>25</sup> Wawakngä yakap apgut täpäle guwu gämänä, tiwän dänggämnämbängän. Tiwän umanä Iso yang inikin. <sup>26</sup> Tiwänä mahande

\* **25:11:** Käluk Yiwäxäwik Nanduxak Täpäle Yanggä Yakap 16:14 une känangge. † **25:18:** tokngä dayipgin Wamu aläknga yäpulinä kätak hikngä donatäxaying.

apgulu payänäle bäläng tänggängänuxäwik apän, umanä Jekop† yang inikin. Aisaxu krismanä 60 yiwixawän, mängätinä Rebekätä wawakngä uläpâyalu une dukngikut.

*Isotä ulapnä “Hängä nätä pängängäsä, gätä täke päpiläk” yang inikut*

<sup>27</sup> Tiwänä yiwitake kuhika, wawakngä uläpâyalu inulung täpâyat tike, Iso songäne tihikuxäwik, kälawu buläkän sipmäkakut. Tixawän Jekowu selyot däkändäkäne säkge yiwixakut. <sup>28</sup> Aisaxu kälaptuk näpikge täke hikngä nätäxakut. Ge wawakngä Isole ilakngä hikngä natängämikakut. Tixawänu Rebekätä Jekopde ilakngä hikngä natängämikakut.

<sup>29</sup> Gwendune Jekowu nak haxawän, Iso songänetä nakngäle hikngä tixawä apgut. <sup>30</sup> Apu Jekowu using inikut. “Nakgnale hikngä tikaying. Ge gapek salinu gämänä uhanggaläxu notnä yupsäng nami nänggäwa,” yang inikut. (Ile tiwän Iso umanä tängatu Idom§ yang inikin.)

<sup>31</sup> Iniwän Jekopdä using inikut. “Gätä gämäk alakuläk. Ge nanitdä kupänu, ile hängäläpä meyä päpiläxunin. Tike gätä ‘Hängä wawakngä yakap täpätä päkoyingu gätä täke päpiläk,’ yang naniwi, naxu äpme gamit,” yang inikut.

<sup>32</sup> Iniwän Isotä inikut. “Nä nakngale hikngä tiwä axumnanggenggat. Hängä uläkwäke inale natäpit?” yang inikut.

<sup>33</sup> Iniwän Jekopdä using inikut. “‘Anätule umande wamu hiyäkände hikngä yänggat’ yang naniwiyä gamit,” yang iniwän, Isotä “Hängä uläkwäxu täke päpiläk,” yangu Anätule umande inikut.

<sup>34</sup> Iniwänä Jekopdä bret gapek salin yang imän naxäwik, yanggä tängopgut. Tikengä enake, teke kukut. Unin tahake, Iso wawaxu yakap täpätä pänängäsä hängä hapduke, ulapnätä päpikge inikut.

## 26

*Aisakät Abimelekät*

<sup>1</sup> Kewu uwomkätanu gusit täpduk tiwän, naxu wenä hikngä tikut. Gusit täpduxu Abrahamdä yiwixawän tikut usinggän tikut. Tiwän Aisaxu kantri Filistiale kewune, taunu Gerar unggäpangune päku yiwikut. Täpduxu uwomune Fisilitia nanäle kingge Abimelekgä yiwikut.

<sup>2</sup> Tiwänä Yawetä apu Aisaxu using inikut. “Isiwu mawäpu yiwiyo. Tike kewu nätä ganiwit womune yiwiyo. <sup>3</sup> Täpduxu womduhimu kewu awomune yiwixayo. Tixawän nä gäxät gatäke yiwixäwik, bänip kwikwik gamit. Wamu nina umande Abrahamu kitokngä inikumde, gä bapuka mahande alatning yangge kewu awopwomu undä äpme damit <sup>4-5</sup> Abrahamdä wamu imikum, mämä wamna imikum yangu undä hikngä täwakut. Ge ile natake, nätä pahawa, bapuka kuminamu yekäwune nanä bimä meyä hikngä tiwä, kewu awopwomu undä damit. Tiwän bapuka mahande alatningge tiwänu, kantri kewune nanä undä bänip kwikwik päning,” yang iniwän, <sup>6</sup> Asaixu Gerar yiwikut.

<sup>7</sup> Tiwän äminu uwomune nanätä Rebeka kake, “Mängälä aläpä däsäka?” yang iniwä, Asaixu using natäpgut. “Rebeka gwälam hikngä. Ge ‘mängätinä’ yäwa, Rebekale tahakengu, wäwi ane nanätä änuwä kungäxäwa täningunin,” yang natake, “Hamina,” yang yänikut.

† 25:26: Hibru wamune ‘Jekop’ yangu yäpuli ‘Bälängä tänggängänukgak’. Hibru nanätä “Äminu uläpä kem tahanggak” yäningge natäkengu “Bälängä tänggängänukgak,” yang yäkakin. § 25:30: Hibru wamune ‘Idom’ äwä ‘gämänä’ yangu guläknä usäkän bimä.

<sup>8</sup> Tikengä Aisaxu uwomune belakngä womsim yiwikut. Ge gwendune Filistia nanäle kingu Abimelegkä winduane hapäpu kaxawänu, Aisakgä mängätinä Rebeka tänggawän kakut.

<sup>9</sup> Kake Abimelegkä Aisaxu yatäwämbän apän, “Mängälä uläpä mängätäda tiwändeyä ‘Hamina’ yangu kemu inale yakuläk?” yang inikut.

Iniwän Aisakgä, “‘Rebekale tahake nutnäng,’ yake yakum,” yang inikut.

<sup>10</sup> Iniwän “Gä ninde usingu dasingge tahakuläk? Wäwi täpätutä mängätädxälu äyiwikin gämu, gätä tahake meyä nimim,” yang inikut.

<sup>11</sup> Tikengä Abimelegkä äminbamde mämä wamu using yatewän kukut. “Äminu täpätutä wäwi aläpä bä mängätinä meyä imänu, uläpä kupsäle tängutning,” yakut.

<sup>12</sup> Kewu uwomune Aisakgä nak puyä pahakut.\* Tiwän Yawetä bänip kwikwik imän, krismasu unggwenu naxu meyä hikngä alakin. <sup>13</sup> Tiwän Aisaxu hängänämbamgän tiwä, hängänä meyä tinggawä, hängänämbamgän hikngä tikut. <sup>14</sup> Aisakge towiyä gämän, sipsip, äwä puyä ämin yangu meyä hikngä tiwä, äminu Filistia nanätä “Hängä uläpäläpä nihä pänangäsä,” yang natäke, Aisaxu mähe natängämikin. <sup>15</sup> Mähe natängämixäwik, yanggä gäpma undä nanä Abrahamde täpduxune puyä äminätä kwayikin däkändäkä, Filistia nanätä kepdä kwayipänguhikin.

<sup>16</sup> Tiwän Abimelegkä Aisaxu using inikut. “Gä kitokngäka inulung hikngä alik. Ge nipmake kunggayo,” yang inikut.

<sup>17</sup> Tiwän Aisaxu uwomu teke, Gerar Kupi päku selyotnä täpikē yiwikut.

<sup>18</sup> Tikengä yanggä gäpma nanä Abrahamde täpduxune kwayikinä, Abrahamdä kungäxawän, Filistia nanätä kwayipänguhikinu, Aisakgä hipdu kwayipäpän täkawä, umanä inäinä nanätä yänikut using yänikut.

<sup>19</sup> Tiwänä kupi unggwenune Aisakge puyä ämindä kep kwayike, yanggä akondokayingu däkätu kakin. <sup>20</sup> Tiwändeyä äminu Gerar nanä kälap daying yiwixaying äwä äminu Aisakge kälap daying yiwixaying yanggä yanganike, Gerar nanätä “Yanggä gäpma undäkä nindäne,” yang yakin. Ge Aisakgä yanggä gäpma undäkä umanä Esek† yang inikut, inale ile tahake yanganikin.

<sup>21</sup> Tiwänä hipdu yanggä gäpma däkätu kwayiwä teyä ilexäyä äyanganikin. Tiwän umanä Sitna‡ yang inikut. <sup>22</sup> Tikengä uwomu teke päku womdune yiwike, hipdu yanggä gäpma däkätu kwayiwä, undäkäle doyanganikin. Tiwän Aisakgä “Yawetä kewu wangga womdu animinggakngä, engangu meyä dukngitna sakngälatning,” yake, umanä Rehobot§ yang inikut.

<sup>23</sup> Tiwänä uwomunetä Berseba koptut. <sup>24</sup> Tiwän Yawetä kupilä unggwenune apu inikut. “Nä nangga Abrahamde Anätu. Manaxäläyo, inale nä gäxät yiwixamäk. Puyä äminä Abrahamde tiwän, äpme bänip kwikwik gama, bapuka meyä yiwitning,” yawän, <sup>25</sup> Aisakgä alta tahake, Yawele tumuk inikut. Inikengä selyotnä une tapikut. Tiwän puyä äminätä yanggä gäpma däkätu une kwayikin.

<sup>26</sup> Tixawänu King Abimelek, Ahusat inä kingge natändetdet iminggaxu uläpä, äwä Fikol amäk äminäle kuhiläle yiwixaxu uläpä yangu Gerar teke, Aisakge apgin. <sup>27</sup> Apä Aisakgä “Näle mähe natäke, nawämbä apgum. Tiwändeyä näle inale apukaying?” yang yänikut.

\* **26:12:** Naxu tämbäm salin bimäle salinu mumbän kukin. † **26:20:** Esek yangu yäpuli ayanganizing. ‡ **26:21:** Sitna yangu yäpuli iwaliwal. § **26:22:** Rehobot yangu yäpuli wanggä wom.

<sup>28</sup> Yäniwän, using yakin. “Yawe gäxat gatäke yiwimäläxu alänggämän hikngä kamäng. Ge using yamäng. Anätule umande hiyäkän wamu kitokngä yänim, nitkät, gäxälun. Kontrak tahana, <sup>29</sup> gindä ninu manihipnong. Nindäxäyä gä donggukumäng. Tike gäle täkekän tahake, bänip kwikwixune tena apguläk. Tiwän äpmanu Yawetä bänip kwikwik gaminggaxunin,” yang inikin.

<sup>30</sup> Tiwänä Aisakgä naxu meyä hängyämän, naxu naxäwik, wainkät tängoppin.

<sup>31</sup> Kwepdätä gwäsi hikngä, Abimelek Aisak yanggä “Amäxu dolahakahim” yangu Anätule umande yawät kitokakut. Tiwänä Aisakgä bänip kwikwixune pewän kukin.

<sup>32</sup> Täpduxu unggwenunekän, Aisaxu puyä äminätä apu yanggä gäpma kwayikindäne using inikin. “Gäpma kwayike yanggä axamäng,” yang iniwä, <sup>33</sup> umanä Siba yang inikut. Tiwän äpmasimkäyä taunu unggäpangu umanä Berseba.\*\*

### *Aisakge wawaxu Iso mängätnä malä nanä päkut*

<sup>34</sup> Iso krismanä 40 yiwixäwixu, mängälä Hit nanä täpäyalä päkut. Beerile yäpa Judit äwä Elonde yäpa Basemat yang päkut. <sup>35</sup> Mängälä uläpäyatde tahake, Aisakät Rebekaxälu tokngä natäp gumäläk.

## 27

### *Wam gwalängu Isotä tänangäsä, Jekopdä kukäle täkut*

<sup>1</sup> Aisaxu äminäläke hikngä tiwän, kayi kupilakin. Tiwän, wawakngä yakap täpä Iso yatäwakut. Yatäwambän apän, “Wawaknga,” yang iniwän, Isotä “Nan, nä äna an. Inale yänggaläk?” yang inikut.

<sup>2</sup> Tiwän Aisakgä “Natäpso. Nä äminäläke alit. Unggwenune kupit yangu donatät. <sup>3</sup> Ge kwälemdaxät käsimakaxälu päke, songäne ku, kälaptuk tängutäkapu namiyo. <sup>4</sup> Alänguke täkapungu, naxu kxälä hikngä nätä näpitde natäxat using häke, päkapu nami näpit. Tikengä wam gwaläng gamikengä, kupit,” yang inikut.

<sup>5</sup> Wamu Aisakgä wawakngä Iso inikulu Rebeka änatäng yiwixawän inikut. Ge Iso kälaptuk ku sipmäpapakipke songäne kuhinggawänä, <sup>6</sup> Rebekatä wawakngä Jekowu using inikut. “Natäpso. Nanggatä notda Iso using inihiwän kat. <sup>7</sup> ‘Kälaptuk tänguke, naxu kxälä hikngä nätä näpitde häke, päkapu namiyo. Tiwän Yawele kayine wam gwaläng gämäk gamikengä kupit,’ yang inik,” yang inikut.

<sup>8</sup> Tikengä unetäkänu using inikut. “Wawaknga, kätak hikngä natake, wamu angganiwit using hikngä tahayo. <sup>9</sup> Meme dämänune ku, meme mätexu nomän hikngä gwenälä päkapu namiyo. Tiwän naxu kxälä hikngä nanggatä näpikge natäxak using hikngä hängämit. <sup>10</sup> Tiwänä nanggatä näpikge täku imiyo. Tiwän wam gwalängu gamikengä, kupik,” yang inikut.

<sup>11</sup> Iniwändeyä Jekopdä mingä Rebeka using inikut. “Notna Iso dänggämnämbamgän, tike nä usä wenä. <sup>12</sup> Nanatä gupna täpän tiwän, ‘Kem tahanggak,’ yake, wam gwaläng namikge pahawit deyä, wam wäyi namiyäk,” yang iniwän, <sup>13</sup> mingätä using inikut. “Wawaknga, meyä using täknga apänu, nätä täke täpit. Gä manaxälayo. Tike wamu ungganinggat using hikngä täwayo. Meme ku päkapu namiyo,” yang inikut.

<sup>14</sup> Tiwänä Jekopdä ku päkapu mingäle imän, itä naxu kxälä hikngä Aisakgä näpikge natäxak using hikngä hakut. <sup>15</sup> Tikengä Rebekatä

\*\* 26:33: Siba yangu yäpuli wamu kitokngä, tiwän Berseba yangu yäpuli wamu kitokngäle yanggä gäpma.

wawakngä yakap täpäle täwixu nomän hikngä kwämbälu yolune yiwikulu täke, wawakngä Jekopde pahangämikut. <sup>16</sup> Pahangämike, Jekopde kätak guläkngä yangu meme gup päke, wamäng umukut. <sup>17</sup> Tikengä naxu käxälänä käyä häkut äwä brelu häkut yangu Jekopde kätaxune pekut.

<sup>18</sup> Tiwän Jekopdä nanäle ku “Nan,” yang iniwän, nanätä “Wawaknga, apunggaläk. Gä imin?” yang inikut.

<sup>19</sup> Tiwän Jekopdä “Nä Iso, wawakga yakap täpänin,” yang inikut. “Wamu naniläxu awahat. Gwaxu ahake päkapulu enake nayo. Tikengä wam gwalängu namiläk,” yang inikut.

<sup>20</sup> Iniwän “Wawaknga, yupsäng hikngä sipmäläk,” yang iniwän, “Anätuka, Yawetä gatängamän sipmät,” yang inikut.

<sup>21</sup> Tiwänä Aisakgä using inikut. “Wawaknga, wäkngasim apso. Gä wawaknga Iso hikngämbä? Ge gupda tapa tiwik,” yang inikut.

<sup>22</sup> Tiwän Jekowu nanäle inälängän kuwän, nanätä kätakngä päke, “Guläkngä natäpa, Jekopde guläk tik. Tiwändeyä kätakngä päpa, Isole kätak tikaying,” yakut. <sup>23</sup> Jekopde kätaxu dänggämnämbamgänu payänä Isole kätak bimä tiwä, nanätä “Wawaknga aläpä Jekop,” yangu doxatäp gut. Tixäwik wam gwalängu imikut. <sup>24</sup> Wam gwalängu doimixäwixu yawänyaxu hipdu using inikut. “Wawaknga Iso, gika hikngä?” yang iniwän, Jekopdä “Nä unin,” yang inikut.

<sup>25</sup> Tiwänä Aisakgä inikut. “Wawaknga, kälawu usipmäläxu käwutdu päkapu namiyo. Tiwän nake, wam gwalängu gamit,” yang yawän, päkapu imän nakut. Tixawän wainkät päkapän tängop gut. <sup>26</sup> Nakengä inikut. “Wawaknga, wäkngasim apu kis tahangamiyo,” yang iniwän, <sup>27</sup> Jekopdä apu kis tahangämikut.

Tixawän Aisakgä täwixu Jekopdä tahakutde kápäng natäxäwik, wam gwalängu using imikut.

“Hiyäkän. Wawakngale kápängu

kewu Yawetä bänip kwikwik imikut womde kápäng bimä tinggak.

<sup>28</sup> Anätutä kepda yekäpiot imän,

naxu meyä alatning.

Tämbäm salin bimä äwä wainu käluk yangu meyä hikngä gamik.

<sup>29</sup> Äminu kantri womduyine nanä puyä ämindale yiwitning.

Äminbamdä sopäsopä gäle puke, kuhilä kep däkäne päpu yamning.

Notdale bulämbam täpäle yiwi,

minggale äyinatä sopäsopä gäle puke, kuhilä kep däkäne päpu yamning.

Imin ämindäka tokngä däkä gaminingu, inäxäyä tokngä däkä päning.

Tike äminu bänip kwikwik gaminingu, inäxäyä bänip kwikwik päning,” yang imikut, Aisakgä, wam gwalängun.

<sup>30</sup> Aisakgä wam gwalängu imipuluwänä, Jekowu nanä teke epuxukut. Tixawänu päyänä Iso kälapde kukulu ap gut. <sup>31</sup> Täkapu ixäyä naxu käxälä hikngä nanäle tändäkngake päkap gut. Päkapuke nanä using inikut. “Nan, gwaxu asipmäke hake päkapunggalu enake nayo. Tikengä wam gwalängu namiläk,” yang inikut.

<sup>32</sup> Tiwän nanätä “Gä imin?” yang iniwän, “Nä Iso, wawakga yakap täpänin,” yang inikut.

<sup>33</sup> Iniwän natake, Aisaxu äanaxäläxawän, kwätäläkwätälä duksäng yamuxawä, using inikut. “Kälawu imindä sipmäke päkapu namik? Gä ane doapuxawi nake, wam gwalängu äimit. Tiwän hiyäkände, hängä wam gwalängu imilu Anätutä pahawän bulä alawik,” yang inikut.

<sup>34</sup> Tiwänä Iso nanätä unin yawän natake, butayä hikngä natake, kwänämu bulämbam hikngä yangotikut. Yangotixäwik “Nana, näxäyä wam gwalängu änamiyo,” yang inikut.

<sup>35</sup> Iniwän nanätä “Wenä. Notdatä kem yake, wam gwalängu gäle gamitde natälu awäk,” yang inikut.

<sup>36</sup> Tiwän Isotä using yakut. “Umanä Jekop\* yangu hiyäkände inikayin-gunin. Täpduxu gwenälä kem tahake, näle tängge yiwike, hängä nätäne päk. Nä wawaxu yakap täpänin, tiwändeyä kem tahake, wawaxu yakap täpä däkngakut. Ge hängä nätä pänangäsa, itä päpik. Ge äpmankäyä hipdu kem tahake, wam gwalängu nätäne itäkän päk. Nana, wam gwalängu täkngatu äleläkngä naminangge tinggaläk?” yang inikut.

<sup>37</sup> Iniwän Aisakgä wawakngä Iso using inikut. “Gäle bulämbam täpäle yiwän, notnämbamkäyä ile puyä ämin däknganingge ainit. Tiwän tämbam salin bimä wain yangu meyä päpikge wam gwalängu ile aimit. Ge wawaknga, gäle inaka gamit? Täkngatu wenä,” yang inikut.

<sup>38</sup> Iniwän Isotä using inikut. “Nana, wam gwalängu täkngatu käyä? Nälexäyä nam,” yang inike, kwänämu hipdu bulämbam tikut.

<sup>39</sup> Tiwän nanätä using inikut.

<sup>40</sup> “Kewu naxu meyä alakaying womune doyiwiläk.

Kewu yekäpiyot epukaying womune doyiwiläk.

Amäk tahakengä, naxu näpiläk.

Notdale puyä äminde yiwiläk.

Tiwändeyä mähe natäkengu, wamnä upukengä,

gika kitoxune yiwike, ile gepbine doyiwiläk,” yang inikut.

### *Jekowu okngä Labande datäkukut*

<sup>41</sup> Nanätä wam gwalängu Jekopde imikutde, Isotä notnä mähemähe kakut. Kake bäniyäne using yakut. “Nandä kupikge däpi alinggak. Ge kupän gwäyäm yiwitdäkngakengä, notna Jekowu älänguwa kupik,” yang yakut.

<sup>42</sup> Tiwänä wamu wawakngä yakap täpä Isotä yakulu iniwä natake, Rebekatä wawakngä Jekowu yatäwämbän apän, using inikut. “Notda Isotä gä kupsäle guwikge natäk. <sup>43</sup> Ge wamu angganiwit using pahayo. Yupsäng enake, hamina Labande Haran kunggayo. <sup>44</sup> Kuwi womduhimu ixät yiwixawät, notda bäniptoxu u natäxaxu bäniyä kwikawän, <sup>45</sup> gätä ile u pahaläkge bulämdawik. Tiwän wamu tewa kuwänä apiläk. Tike notdatä guwän kupi, täpduxu inä gwenunekänu täpäyale natäpitde mähe,” yang inikut.

<sup>46</sup> Tikengä Rebekatä Aisaxu using inikut. “Mängälä Hit nanä Isotä päkulu uläpäyatde mähe hikngä natake, käluk yiwitdexäyä mähe natäxat. Tiwän Jekopkäyä mängälä Hit nanä ane yiwixayingu täpätu täpänu, yiwikyiwiknga wäyi hikngä tiwixunin,” yang inikut.

## 28

<sup>1</sup> Tiwänä Aisakgä Jekowu yatäwämbän apän, wam gwaläng imike, mämä wamu using inikut. “Mängälä Kenan nanä mahikngä tayo. <sup>2</sup> Tike Mesopotemia minggale nanä Betuelde yolune kunggayo. Ku okga Labande yäpa täpätu mängätale tayo. <sup>3</sup> Anätu Kitokngänä Käyä Täpätä bänip kwikwik gamän, engangga naxälä towimbi, sakngälake, kantrinä inätä täke yiwitnong. <sup>4</sup> Anätutä wam gwalängu Abrahamde imikulu, gä bapuka yangge damän, äminde kewu awom yiwixaläxu, gihäle täning. Kewu awomu

\* **27:36:** Gätakgätak wamu 25:26-une temginu kendeyo.



Anätutä Abrahamde imikut. Ge unin täning,” yang inikut. <sup>5</sup> Inikengä Aisakgä Jekowu Labankät yiwisimäläkge Mesopotemia iningyäpiwän kukut. Labanu Aram nanä tiwän Betuelde wawak, tiwän Jekop, Iso yangge okngä.

*Isotä mängätnä täpätu hipdu täkut*

<sup>6</sup> Jekowu kuxawänä, Iso using inikin. “Nansätä Jekowu wam gwaläng imike, mängätnä Mesopotemia nanä täpätu täpikge iniwän kuk. Tiwän wam gwaläng imixäwik, mämä wamu ‘Mängälä Kenan nanä malayo,’ yang inik. <sup>7</sup> Tiwän Jekowu mingänanäle wam gwälamike, Mesopotemia axuk,” yang inikin, Ison.

<sup>8</sup> Unin iniwä Isotä “Nanu mängälä Kenan nanäle mähe hikngä natäxakngä tinggak” yang natäpüt. <sup>9</sup> Tikengä Isotä ku, Abrahamde wawaxu Ismaelde yäpa Mahalatkäyä, mängätnäle täkut. Mahalalu Nebaiotde hamin.

*Jekopdä dambu tike, ängela dayipüt*

<sup>10</sup> Aisakgä Jekowu Mesopotemia kuwikge iniwän, Jekowu Berseba teke, Haran kuwikge kukut. <sup>11</sup> Kuhika, kewu womdune kundoke, gusilu awukukutde, une pewikge yiwikut. Tikengä petnä pewikge, huwu uwomune nanä gwendu täke, uwänenatnäle kuhiläne teke pekut. <sup>12</sup> Peke dambu tike kaxawänu, bäläng yayixu kewunetä gäkngälunekänu kwämbätdune, Anätule ängelatä epuxäwik kopä kakut.

<sup>13</sup> Tixawän Yawetä enetängä\* yiwike, using yakut. “Nä Yawe. Nä bapuka Abraham, nangga Aisak yangge Anätu. Nätä kewu awekgaläxu awomu, gikaxät bapukaxätde äpme damit. <sup>14</sup> Bapuka naxälä hikngä haluhalu bimä tining. Tixäwik uhike, gusitdä akonggak käwut, gusitdä pukunggak käwut, not käwut, äwä saut käwut yang päku yiwitning. Gäxät bapuxätde tiwän, yotyolu kewune nanä undä bänip kwikwik päning. <sup>15</sup> Natäpso. Nä gäxät yiwike, sawomuneka kuwiläxu, anggandung yiwit. Tikengä kewu awomune gä hipdu täkapit. Gä donggäpmakuwit. Tike hiyäkän wamu ängganit usingu äpme pahawit,” yang inikut.

<sup>16</sup> Tiwänä Jekowu petnä pekulu enake, using natäpüt. “Hiyäkände, Yawe ane yiwixak. Tiwändeya nä usingbä yangu donatät,” yake, <sup>17</sup> anaxälake, “Kewu awomu inätä hikngä. Awomu Anätule yot, gäkngätde yämä hikngä,” yakut.

<sup>18</sup> Kwepdätä gwäsi hikngä, huwu kupiläne uwänenatnäle kuhiläne tekut gwenu täke, mahande kaxäwik natäpningge däm täpän enawän, olip yanggätä huwu unggwenu pingyapmikut.† <sup>19</sup> Tikengä kewu uwomu umanä Betel‡ yang inikut. Tupä taunu ile wäkngäsim yiwixaxu unggäpangu Lus yang inikakin.

<sup>20</sup> Tikengä Jekopdä Anätule umande hiyäkän wamu using inikut. “Anätu, gä näxät yiwike, kahilu belakngä aläpä kuwilu, nandung yiwike, naxu änäpitde äwä täwixu äwahawitde yang namixawi, <sup>21</sup> nä meyä dowäke, nanale yolune hipdu apitnä kakengu, Yawe, Anätunale gätä yiwiläk. <sup>22</sup> Tiwän huwu däm tängenake texalu unggwenu yotdale yiwik. Tiwän hängäläpä gätä namiläxu, nätä upuke 9-u ninale pexäwik, 1-u gäle gamit,” yang yakut.

\* **28:13:** enetanga bä ‘Jekopde inälängän’ † **28:18:** ‘Olip’ yangu pa uman. Hängä täpätu olip yanggätä pingyapmimbä, Anätule hängä hikngä däknagakakin. ‡ **28:19:** Hibru wamune ‘Betel’ yangu yäpuli Anätule yot.

## 29

<sup>1</sup> Jekowu hipdu unetä enake kuhika, gusitdä akonggak käwut nanäle kewune kundopgut. <sup>2</sup> Kundokengu yanggä gäpma gwendu kakut. Sipsiwu yanggä unggwenunetä yämä tängokakin. Ge ile inälängänu sipsiwu täkwäkgu inätä pexawä, täkwäkgu inätä pexawä, täkwäkgu inätä pekgawä dayipgut. Huwu yanggä unggwen tewä umukakulu kwälängä, tiwän meyä hikngä. <sup>3</sup> Ge sipsiwu undä unekän päkapukengä, huwu uhanu sipsip daying yiwixayinggä tekwämbä kuwän, sipsipde yanggä yämikakin. Tikengä hipdu tekwämbä apu umukakut.

<sup>4</sup> Jekopdä sipsip daying yiwixaying äminu using yänikut. “Not, ginu säne nanä?” yang yäniwän, “Ninu Haran nanä,” yang inikin.

<sup>5</sup> Iniwä “Nahorde bapunä Labanu axäxayingunin?” yang yäniwän, “Hii, axäxamängunin,” yang inikin.

<sup>6</sup> Iniwä “Labanu domalik?” yang yäniwän, using inikin. “Hii, domalik. Ätuxa. Yäpanä Reselu sipsip päke ane aapunggak,” yang inikin.

<sup>7</sup> Iniwä using yänikut. “Kanong. Gusilu dowukuk; bänäkängän yiwixak. Tiwän sipsiwu dämänäne päku penangäsä täpdukäyä dolik. Ge yanggänä yämike, hipdu päku pewä, nakngä näkänong,” yang yänikut.

<sup>8</sup> Tiwändeyä using inikin. “U. Usingu tahanangäsändo. Tike sipsiwu undä päkapuke, hup hanu tekwämbä kuwänä, yanggä yäminim,” yang inikin.

<sup>9</sup> Tixawänu Reselu sipsip daying yiwixakutde, nanäle sipsip päke apundopgut. <sup>10</sup> Tiwän okngä Labande sipsip äwä yäpanä Resel yang dayike, Jekopdä ku, hup hanu yanggä gäpmale mawunetä tekwämbän kuwän, yanggä okngäle sipsipde yämikut. <sup>11</sup> Yämikengä Reselu kis tahangämike, kwänämnä initikut. <sup>12</sup> Tike “Nä nanggale haminu Rebekale wawak,” yang iniwän, Reseldä ihapmäke, ku nanä inikut.

<sup>13</sup> Tiwän Labanu tälänä Jekopde yawän natäke, axäwikge ihapmäke kukut. Ku betake, kis tahangämike, yotnäne initäke kukut. Kuwän wamu undä Jekopdä natäpögu inikut. <sup>14</sup> Iniwän Labandä “Gä nina gup. Tiwän daknotna hikngä,” yang inikut.

### *Jekopdä Leaxät Reselkälu mängätnäle päkut*

Jekowu Labande yolune kuwän, yekäwu gwendu une yiwikumäläk. <sup>15</sup> Yiwihika Labandä using inikut. “Hiyäkän, gä daknotna. Tiwändeyä puyä moyo dowahawiläk. Tike puyä pahaxawi, hängä inaka äpme gamit? Ge ‘Unin namiyo,’ yangu täke yäwiläk,” yang inikut.

<sup>16</sup> Labanu yäpanä täpäyalä. Payänäle umanu Lea, tiwän ulapnäle umanu Resel. <sup>17</sup> Lea kayi gwälam.\* Tiwän Reselu nomnä gupnä yangu gwälam hikngä. <sup>18</sup> Tiwän Jekowu Reselde täke hikngä natäke, Labanu yäkwäle wamu using inikut. “Krismasu 7 puyä ane pahaxäwa apik. Tiwän yäpaka wasekngä täpä Reselu, mängätnale namiyo,” yang inikut.

<sup>19</sup> Iniwän Labandä “Womdune nanäle doyämät. Tike gäle täke. Ge näxät yiwisim,” yang inikut. <sup>20</sup> Tiwän Jekowu Resel täpikge Labande puyä krismasu 7 pahakut. Jekowu Reselde hikngä natäpögutde, krismasu 7-de natäpänu, täpduxu gwenaläkän däpi hikngä bimä tikut.

<sup>21</sup> Krismasu 7 gwenu apuxuwänä, Jekopdä Labanu using inikut. “Täpduxu namikuläxu awahat. Ge mängätna namiyo, tiwän täpit,” yang inikut.

\* **29:17:** kayi gwälam Wamu aläknga yäpulinä kätak hikngä donatäxaying. Täpätuyitä yäpulinä “kayi wäyi” yang natäxaying.

<sup>22</sup> Iniwän Labandä naxu bulämbam hikngä gwen häke, äminu uwomune nanä undä yangyāwambän, apu nakin. <sup>23</sup> Tiwändeyä kupilä unggwewune, Labandä yāpanä Lea tākapu, Jekopde imän pekumäläk. <sup>24</sup> Mängälä täpätuxäyā, umanä Silpa, Labandä Leale puyä äminäle imikut.

<sup>25</sup> Kwepdätä tembänä enakengu, Lea kake, Jekopdä Labanu using ku inikut. “Gutongä uläknga näle inale tahakuläk? Puyäka Reselde natäke pahakum. Tiwändeyä kem yake, Lea namikuläk,” yang inikut.

<sup>26</sup> Iniwän Labandä yäkwäle wamu using inikut. “Ninu ane nanä, ulapnä gämäxu doyamikamangunin. Payänä gämäk yämikamangunin. <sup>27</sup> Lea takuläkge, sande anggwen yiwitna puluwänä, ulapnä Reselkäyā gaminim. Tiwänä ile yäkwäle krismasu 7-u hipdu pahawiläk,” yang inikut, Labandän.

<sup>28</sup> Tiwän Jekopdä täke yawän, sande unggwenu yiwä puluwän, Labandä yāpanä Reselu mängätnäle imikut. <sup>29</sup> Imike Labandä Reseldexäyā mängälä täpätu umanä Bilha uläpä puyä äminäle yiwikge imikut. <sup>30</sup> Tiwän Jekowu Reselkät yiwike, Reselde täke hikngä natäpगत. Tike Leale using hikngä donatäpगत. Tikengä Labande puyä krismasu 7-u hipdu pahakut.

<sup>31</sup> Jekopdä iläkngäkänu Reselde tahakut usingu, Leale dolahawän kake, Yawetä Lea gatängämike tahawän, engangu dukngikut. Tixawänu Reselu engang hongge yiwikut. <sup>32</sup> Lea tängene käyā tiwän, wawakngä täpätu dukngikut. Dukngike “Yawetä meyä pälu axak. Ge äpmanu Jekopdä näle täke natäpik,” yake, umanä Ruben† yang inikut.

<sup>33</sup> Tiwänä hipdu tängene käyā tiwän, wawakngä täpätuxät dukngikut. Dukngike “Jekopdä näle täke donatäkge Yawetä natäke, wawaknga aläpaxäyā namik,” yake, umanä Simeon‡ yang inikut.

<sup>34</sup> Tiwänä hipdu tängene käyā tiwän, wawakngä täpätuxät dukngikut. Dukngike, “Wawakngilu täpälälä täpätu dukngikgat. Ge Jekowu näxälu äpme gatäke yiwisim,” yake, umanä Livi§ yang inikut.

<sup>35</sup> Tiwänä hipdu tängene käyā tiwän, wawakngä täpätuxät dukngikut. Dukngike, “Äpmanu Yawele uman yatängenawit,” yake, umanä Juda\*\* yang inikut. Tikengä täpduxu womsimu engangu hipdu dondukngikut.

## 30

<sup>1</sup> Reselu inäle natäpänu, engangu dukngitnangäsä dolikut. Tiwän “Ninaxäyā engangu andukngitnangäsä,” yake, payänä mähemähe kakut. Kake Jekowu using inikut. “Engang namiyo. Tike donamiläxu axupit!” yang inikut.

<sup>2</sup> Iniwän Jekopdä tokngä natäke, using inikut. “Nä Anätundo. Bänipda nätä umumba engangu dondukngiläk?” yang inikut.

<sup>3</sup> Iniwän Reseldä using inikut. “Puyä ämina Bilha äna an. Ixät peson, tiwän itä enganga äpme dukngiwik. Tiwän näxäyā engangge mingä däknawit,” yang inikut. <sup>4</sup> Inikengä puyä äminä Jekopde imän, mängätnä däknawän, ixät pekumäläk.

<sup>5</sup> Tiwän Bilha tängene käyā tiwän, wawakngä dukngikut. <sup>6</sup> Dukngike imän Reseldä using yakut. “Anätutä uhinggike nandupän, nä ämin nomän tiwän, tumuk wamu yäwa natäke, wawaknga namik,” yang yake, umanä Dan\* yang inikut.

† 29:32: Hibru wamune ‘Ruben’ äwä ‘meyä pälu axak’ yangu guläkngä usäkän bimä. ‡ 29:33: Hibru wamune ‘Simeon’ äwä ‘natäke’ yangu guläkngä usäkän bimä. § 29:34: Hibru wamune ‘Livi’ äwä ‘gatäke’ yangu guläkngä usäkän bimä. \*\* 29:35: Hibru wamune ‘Juda’ äwä ‘yatängenawit’ yangu, guläkngä usäkän bimä. \* 30:6: Hibru wamune ‘Dan’ äwä ‘uhiknggike nandupän nä ämin nomän’ yangu, guläkngä usäkän bimä.

<sup>7</sup> Tiwänä puyä äminä Bilha hipdu tängene käyä tiwän, wawakngä täpätuxät dukngikut. <sup>8</sup> Dukngike imän Reseldä using yakut. “Payänaxät amäxu bulämbam tahake, nätä yapmit,” yake, umanä Naptali† yang inikut.

<sup>9</sup> Lea inäle natäpänu, engangu hipdu dukngitnangäsä dolikut. Tiwän puyä äminä Silpa Jekopde imän, mängätinä däknagakut. <sup>10</sup> Tikengä Silpatä wawakngä dukngikut. <sup>11</sup> Dukngiwän kuläkake, Leatä “Näle usingu tinangäsändo teyä alinggak,” yake umanä Gad‡ yang inikut.

<sup>12</sup> Tiwänä Leale puyä äminä wawakngä täpätuxät hipdu dukngikut. <sup>13</sup> Dukngiwän Leatä using yakut. “Axuläkänggat. Ge mängälä notnatä nandukengu ‘Axuläkänggaxunin,’ yang nanining,” yake, umanä Aser§ yang inikut.

<sup>14</sup> Wit pänangäsä dändan tiwän, Rubendä songäne ku, songäsongä awäke napä tängene käyä tikayingu kwämbätdule salin päke päkapu, mingä Leale imikut. Rubendä mingäle unin imän kake, Reseldä Lea using inikut. “Songäsongä salinu notnä takembä namiläk?” yang iniwändeyä, <sup>15</sup> payänätä using inikut. “Äpna aläkuläxunekän, songäsongä salinu wawakngatä namikäyä täpiläkge yänggaläk?” yang inikut.

Iniwän Reseldä using inikut. “Songäsongä salinu wawakngatä gamixu notnä namixawi, yäkwäle kupilä anggwenune pesimäläkge, Jekowu äpme gamit,” yang inikut.

<sup>16</sup> Tukwatde tiwän, Jekowu puyänetä apuxawän, Leatä ku using inikut. “Äpmanu gäxät yiwisim, inale gä songäsongä salinu wawakngatä namikgä auhit,” yang inikut. Ge kupilä unggwenune ixät pekumäläk.

<sup>17</sup> Tiwän Anätutä Leale natake tahawän, tängene käyä tiwän, wawakngä 5 täpä dukngikut. <sup>18</sup> Dukngike using yakut. “Puyä ämina tupä apnale ima, ixät pekumäläkge, Anätutä ile natake, yäkwäle wawaknga namik,” yang yake, umanä Isakar\*\* yang inikut.

<sup>19</sup> Tikengä hipdu Lea tängene käyä tiwän, wawakngä 6 täpaxäyä dukngikut. <sup>20</sup> Dukngikengä using yakut. “Anätutä bänip gwalängge hängä gwälam hikngä naminggak. Ge äpmanu Jekopdä natäpänu axopit, inale wawakngilu 6 dukngikgat,” yang yake, umanä Sebulun†† yang inikut.

<sup>21</sup> Tikengä womduhim yiwihikangu, yäpanä täpätu dukngikut. Dukngike umanä Daina yang inikut.

<sup>22</sup> Tiwänä Anätutä Reselde natake, gatängämike tahawän, engang alätnangäsä take tikut. <sup>23</sup> Tiwänä tängene käyä tiwän, wawakngä dukngike, using yakut. “Anätutä mayäkngä nätäne taknga awahawän hopikaying.

<sup>24</sup> Ge wawaknga täpätuxäyä anamikge natäxat,” yang yake, umanä Josep‡‡ yang inikut.

### *Jekowu hängänämbamgän tikut*

<sup>25</sup> Reseldä Josewu dukngiwänä, Jekopdä Labanu using inikut. “Nä kantrinane yotnane kunggäwitde natäxat. Ge yawi kunggäwa. <sup>26</sup> Mängätina enganga yangge natake, puyä awahanggमित. Ge nami, päke kunggäwa, inale puyä bulämbam hikngä pahalü, gika änanduläk,” yang inikut.

† 30:8: Hibrü wamune ‘Naptali’ äwä ‘amämäk’ yangü, guläkngä usäkän bimä. ‡ 30:11: Hibrü wamune ‘Gad’ yangü yäpuli ‘tinangäsändo teyä alinggak.’ § 30:13: Hibrü wamune ‘Aser’ yangü yäpuli ‘axuläkänggak’.

\*\* 30:18: Hibrü wamune ‘Isakar’ äwä ‘yäkwäle namik’ yangü, guläkngä usäkän bimä. †† 30:20: Hibrü wamune ‘Sebulun’ äwä ‘nandupän kopik’ yangü, guläkngä usäkän bimä.

‡‡ 30:24: Hibrü wamune ‘Josep’ äwä ‘pahawän hopiying’ yangü, guläkngä usäkän bimä. Tiwän takngatu ‘Josep’ äwä ‘täpätuxäyä äpme namik’ yangü guläkngä usäkän bimä.

<sup>27</sup> Iniwän Labandä yäkwäle wamu using inikut. “Nä ilakngä nandux-aläkngä kakengu, manäpmake kuyo. Gäle tiwän, Yawetä bänip kwikwixu namixu, tuwängune apä andayitapmät. Ge maxuyo. <sup>28</sup> Tike inaleka natäkengu, täke yäwiläk, tiwän inä using gamit,” yang inikut.

<sup>29</sup> Iniwän Jekopdä using inikut. “Puyä bulämbam hikngä pahaxäwik, kälapda daying yiwixäwa, nomängän yiwiyingu, gika änanduläk. <sup>30</sup> Nä ane doapuxäwa, kälapda mätekngä yiwikin. Tiwändeyä nätä ane apuke, kälapda sänesäneka päke tihikuxäwa, Yawetä bänip kwikwik gamixawän, kälapda meyä hikngä asakngälak. Ge äpmanu nä hängäläpä nihä yänggwätsimdäne daying yiwitnangäsä,” yang inikut.

<sup>31</sup> Iniwän Labandä “Hängä ina bimä gamit?” yang inikut.

Iniwän Jekopdä yäkwäle using inikut. “Nä hängä täpätu manamiyo. Tike gätä täke yawi, hipdu sipsipda daying yiwitake kuwit. <sup>32</sup> Tewi nätä ku kälapda undä dayixäwik, sipsip mätexu dänggämnä kupilä äwä sipsip meme yangu dänggämnä tolokngä käyā yang dayike päke, ninale pewit. Puyä hipdu gäle u pahawitde bimä unin päpit. <sup>33</sup> Hiyäkände yatnä kakengu, mahande yupsäng katapiläk. Puyä pahakumde hängä u namiläxunin dayipiläkge apukengu, u namiläkätanu meme tolokngä wenä gwendu bä sipsip mätexu dänggämnä kwaxu gwendu kakengu, ‘Kukäle täkut,’ yang natäpso,” yang inikut.

<sup>34</sup> Iniwän Labandä “Täke. U yänggaläk using tahahim,” yang inikut.

<sup>35</sup> Inike teyā, täpduxu inä unggwenunekän, Labandä meme wäwi tolokngä käyā, äwä meme mängälä tolokngä käyā, äwä sipsip mätexu dänggämnä kupilä yangu undä Jekopdä inäle päpikge yakutdeyā päke, wawakngätä daying yiwitningge yänikut. <sup>36</sup> Tikengä unin päke, Jekowu une teke, kewu womdune kuxawä, täpduxu gwenälä gwendu apuxuwän, undan yiwikin. Tixawän sipsiwu notnä Labandäne peke kukinu, Jekopdä daying yiwikut.

<sup>37</sup> Tixäwik Jekopdä pa gupnä kupilä däkätuyile kätaxu käluk matäke, gupnä matäwän amixawä, päpän enaxawä, gupnä käwutdu using pekut. Tiwän awäpän enakinu bäniyä kwak yiwikin. <sup>38</sup> Tiwän pa uläpäläpä memetä yanggä tängokayingune apuke dayipningge yake, gehanune wäkngasim päkapu pekut, inale meme yanggä tängopningge apuxäwixu, wäwitä mängälä une yäwäxakin. <sup>39</sup> Ge meme mängälä, meme wäwitä pa uläpäläpäle inälängän yäwäxakinde, mätekngä pexakinu tolokngä käyā.

<sup>40</sup> Tiwän sipsip äwa meme yangu dayixäwik uhinggike, sipsiwu inätä peke, meme inätä petäke kukut. Tikengä meme dänggämnä kupilä äwä meme tolokngä käyā yangu uläkwäkge nomune sipsiwu pexawän, une tahakakin. Jekopdä meme sipsip yangu using pahanggawän, meyä hikngä sakngälakakut. Tiwän kälawu inäle dayike pewän, inätä yiwä, Labande kälawu dayike, inätä pewän yiwikin.

<sup>41</sup> Kälawu kitokngänä käyätä tahaxawä, Jekopdä pa uläpäläpä kälapde kayi tängän päkapu, gehanune wäkngasim pexawän, pa uläpäläpäle inälängän tahakakin. Ge engangä tolokngä käyā pexakin. <sup>42</sup> Tiwän kälawu kitokngänä wenätä tahaxawä, pa uläpäläpä ile kayi tängänu dowexakut. Ge engangä tolokngä wenä pexakin. Ge engangä kitokngänä wenä u pexakinu Labandäne, tiwän kälawu kitokngänä käyā Jekopdäne. <sup>43</sup> Jekowu using pahanggawän, memenä sipsipnä yangu meyä tiwän, puyä äminä, kamelnä, äwä dongginä yangkäyā äwänggawän, hängänämbängän hikngä tikut.

## 31

*Jekopdä Laban teke datäkukut*

<sup>1</sup> Labande wawakgä Jekopde using yakin. “Naninde hängäläpä undä hikngä Jekopdä päke pahawän, hängänämbamgän hikngä alik,” yang yäxawä, Jekowu natäpğut. <sup>2</sup> Natake Jekopdä kaxawänu Labanu tupä ilakngäkän pahakut usingu, dolahawän kakut.

<sup>3</sup> Tiwänä Yawetä Jekowu using inikut. “Awomu teke enake, hipdu notdambamde nanggale kewune kuyo. Tiwän nä gäxät kuhim,” yang inikut.

<sup>4</sup> Tiwänä Jekopdä Reselkät Leaxälu sipsipnätä näkaying womune apät dayipikge natake, wam täkngä tewän kuwän, une apgumäläk. <sup>5</sup> Une kuwät dayike, Jekopdä using yänikut. “Nansä tupä näle täke natäpğut deyä, äpmanu kawa, näle usingu donatak. Tiwändeyä nanale Anätu näxät yiwixamäk. <sup>6</sup> Nansäle puyä pahake, kitokngäna mumba kuwä, gihä anandumäläk. <sup>7</sup> Tiwändeyä nansätä ‘Hängä usingusingu äpme gamit,’ yangu kem nanike, ayakulune hikngä donamikulu, täpduxu meyä. Tiwändeyä Anätutä dolewän tahawän malit. <sup>8</sup> Nansätä ‘Kälawu tolokngä käyä gäle gamit,’ yang naniwänu, mätekngä tolokngä käyäkän pekin. Tiwän ‘Kälawu guläkngä kwaxu gäle,’ yang naniwänu, mätekngä inä usäkän pekin. <sup>9</sup> Using tahake, nansäle kälawu Anätutä päxäwik, nälekän namikut.

<sup>10</sup> “Kälawu wäwitä mängälä yäwäxaying täpduxune peke, dambu täkngatu using kakum. Meme mängälä, wäwi tolokngä käyätäkän yäwakin. <sup>11</sup> Tixawän Anätule ängelatä dambu tängänekänu using yakut. ‘Jekop,’ yawän, ‘We!’ yäwa, using nanikut. <sup>12</sup> ‘Dayixäyo. Meme mängälä, wäwi tolokngä käyä gwenggwendäkän yäwäxaying. Nätä using tahaningge tahat, inale wäyi täkngaläkngä Labandä gäle u pahanggaxu andayit. <sup>13</sup> Nä Anätu, gäle Betel apgum täpänin. Uwomune huwu gwendu däm tängenake, olip yanggätä huwu unggwenu pingyapmike, näle gepbine yiwiläkge hiyäkän wam yakuläk. Ge kewu awomu teke, kewu alakuläk womune hipdu kuyo,’ yang nanikut,” yang yänikut.

<sup>14</sup> Yäniwän Reselkät Leaxätdä using inikumäläk. “Nanitdä hängä täpätu nitde hikngä niminangäsändo, <sup>15</sup> inale itä nindupänu, nilu malä nanä tinggaxunin. Nilu moningge pewän uhiwi, moningu u päkulu undä amumbän kukin. <sup>16</sup> Hängä täpä undä nanitde kätaxune Anätutä päkulu, nit äwä engangit yangge hängä. Ge Anätutä dasingga ganikulu using tahayo,” yang inikumäläk.

<sup>17</sup> Tiwän Jekowu tändäkngake, mängätnä engangä yangu päko kamel tängäne peke, <sup>18</sup> kälapnä äminsak, hängänä Mesopotemia päkut yangu undä yäning yäpiwän kuxawä, nanä Aisake, Kenan kuningge kukin.

<sup>19</sup> Labanu sipsip dänggäm matäwikge kuxawän, Labandä ‘anätuna’ yake ämindäkän kwätäluke yotnä pexakut täpäläpä, Reseldä kukäle päkut. <sup>20</sup> Jekopdä Laban Aram nanä uläpä axanghopike, “Using kukamäng” yangu doinixäwik, <sup>21</sup> hängä täpänä undä wepdäkän päke, Labanu teke, datäkuhika, ku Yanggä Yupretis Dupi yayike, Gileadkätanu täwalnä käyä womune kuningge kukin.

### *Labandä Jekop täwakut*

<sup>22</sup> Täpduxu gwenalä gwendu apuxuwän, “Jekowu using datäkukut,” yang iniwä natake, <sup>23</sup> Labandä notnämbam yapäpän, Jekowu täwäläke kukin. Kuxawä täpduxu 7 apuxuxawän, kungu Gileadkätanu täwalnä käyä uwomune kakin. <sup>24</sup> Tiwän kupiläne Labanu petnä peke, dambu tike kaxawän, Anätutä apu using inikut. “Yäko. ‘Jekowu tokngä wamu mainiyo,” yang inikut.

<sup>25</sup> Jekopdä selyotnä Gileadkätanu täwalnä käyā uwomune täpikutnä kake, Labande notnāmbamkäyā uwomunekān päkapu, selyotnä tapike yiwikin. <sup>26</sup> Tiwän kwepdätä Labandä ku, Jekowu using inikut. “Amäk ämindä amäk tahake, iwalnä kalabusde päke kukaying usingu, yäpana inale nandunghopike päkapguläk? <sup>27</sup> Wepdäkānu inale datāngapguläk? Ananikuläk gāmu, gita hikwak yang päke tayike kuläkake, galak wamu ganinayā apim. <sup>28</sup> Yäpana bapuna yangu kisu dolahangyämike, galak wamu doyanixāwa, päke apguläk. Wäyi täknga tahakuläk. <sup>29</sup> Nätä meyä täknga andaminangāsā. Tiwāndeyä kupilāne nanggale Anätutä using nanik. “Yäko. Jekowu tokngā wamu mainiyo,” yang nanik. <sup>30</sup> ‘Nanäle yolune kuwikge alahambānipdake kukut’, yangu anatät. Tike teyā anätuna kukäle inale päkapguläk?” yang inikut.

<sup>31</sup> Iniwän Jekopdä yäkwäle wamu using inikut. “Yäpanā inale pāyäk,’ yake naxälake, päke apgum. <sup>32</sup> Tike anätuka uläpäläpä imindäka päkutnä kakengu, uläpä axupik. Ge hängä gätāne näle hängä täpāxātan yiwixawā kakengu, notnitde kayine gikale pāyo,” yang inikut. “Reseldä Labande anātu uläpäläpä awäkut,” yangu donatāxāwik yakut.

<sup>33</sup> Tiwänä Labandä Jekopde selyot, Leale selyot, äwā mängälä puyā äminu uläpāyatde selyot yangune ko dengwāsike, yāwambān malikin. Tiwän Reselde selyolune kopgut. <sup>34-35</sup> Nanä Reselde selyolune doxoxawān, Reselu pilo kamel tängāne teke puku yiwixakulu, yotnāne täko tekutnä, anātu uläpäläpä ile kematkätan peke, ulängāne puku yiwikut. Ge nanätä ko yāwambānu, Reseldä nanä using inikut. “Bulāmbam täpāna, tokngā manatāngamiyo. Nā yekāp iwat titde, kayikane dām hikngā enatnangāsāndo,” yang inike, ulängāne puku yiwixawān, yāwambān maliwā, teke epuxukut.

<sup>36</sup> Tiwänä Jekowu tokngā natäke, Labanu using inikut. “Ngā nä māmā wamu dasā täknganin upukum? Ngā wäyi ina tahakumde näwälākāpguläk? <sup>37</sup> Gätä näle hängäläpä undä hikngā dengwāsike dayiläk. Tikengu, gäle hängä täpātu undanu, ina bima kake täläk? Using kakengu, ane gāxāt nanä äwā näxāt nanä yangge bānäkān täkapu teng. Tiwän itä yanguhinggixut.

<sup>38</sup> “Nā gāxālu krismasu 20 yiwikumäk. U yiwikumkätanu sipsiwu mängälä meyä dowäke, engangā täkekān pekin. Memexāyā usäkān. Tiwän gäle sipsiwu wāwi gwendu donāpa tikut. <sup>39</sup> Kälapda kälap tukgā sipginu, gäle dowākapu tahawa dayipguläk. Tike ninane nanä päke ile tangge pekum. Tike kälapda kwakāpāne bā kupilāne päkindexāyā, usinggān yāxawi, tangäle gamikum. <sup>40</sup> Using yiwikum. Kwakāpāne gusilu pälängä hikngā nahikakin. Tixawān kupilāne kwāman hikngā tixawā gākāxāwik, petna dowekakum. <sup>41</sup> Krismasu 20 gāxāt yiwikumāxu using hikngā tahaxāwik yiwikum. Yāpaka päpitde, puyāka krismasu 14 pahanggamikum. Tikengā sipsip meme yang päpitde, krismasu 6 pahanggamikum. Tiwāndeyä ‘Unin pahawi, usingusingu ämpe gamit,’ yang nanikulāxu, ayakulāxune donamikulāxu täpduxu meyä. <sup>42</sup> Bapuna Abraham äwā nana Aisak yangge Anātu, Aisakgā ānaxälākakulu Anātu uläpä, näxālu doyiwxamäk gāmu, gätä hängä täpātu donamixāwik, moyo anāwambi kuwam. Tiwāndeyä tokngāmbamu u päke, puyā kitokngā u pahakakumu, Anätutä andayipgut. Ge kupilāne ile tiwän, Anätutä ganinggāmatak,” yang inikut, Jekopdän.

### *Jekopkät Labankätdä kontrak tahakumäläk*

<sup>43</sup> Tiwän Labandä Jekowu yäkwäle wamu using inikut. “Mängälä aläpāyalu, näle yäpa. Tiwän engangu aläkwāxu näle bapuna. Tiwän sipsip meme yangkäyā nātāne. Hängä andayixalāxu, undä nātānekān. Tiwāndeyä

yäpāna, bapuna yangge, dasingga alahawa teyā, näxälu doyiwitnimnä tinggak. <sup>44</sup> Using tiwānu kontrak tahahim. Ge mahande ile natake, ‘Wamu kitokngä using yakumäk,’ yangu anätäpsim,” yang inikut.

<sup>45</sup> Tiwän Jekopdä huwu gwendu take, däm täpän enakut. <sup>46</sup> Tiwän, notnä hup päkapningge yänikut. Yäniwän huwu päkapu unekändäkä pekin. Peke une yiwike, naxu unekän nakin. <sup>47</sup> Huwu unekändäkä u pekinu, Labandä umanä Jegar Sahaduta yang iniwän, Jekopdä Galet yang inikut.\*

<sup>48</sup> Labandä “Huwu aläkwäxunin dayixäwik, ‘Labankät Jekopkätä wamu kitokngä yakumäläkgäne’ yang natäpna kuwik,” yang yakut. Ile tiwän umanä Galet yang inikin. <sup>49</sup> Umanä täkngatuxäyā Mispa† yang inikin, inale Labandä using yakut. “Nilu nihänihä yiwisim tiwändeyä dasingga pahahimu, Yawetä äpme ninduxäwik. <sup>50</sup> Gä yäpāna päke päku, kätaxu dondaying yiwiläk, bä mängätä käluk täpambä täpiläkge natäpiläk. Tike ‘Kepämindä donanduying,’ yang natäpiläk. Tiwändeyä Anätutä anindupik,” yang inikut.

<sup>51</sup> Tikengä unetäkānu using inikut. “Dayipso. Huwu däm yiwixak gwen äwä huwu nit bänäkängän pelu aläkwäk yang dayipso. <sup>52</sup> Huwu anggwen äwä huwu aläkwäk yangu, wamu kitokngä yäkamäk täkngale tuwängge yiwitning. Nätä huwu aläkwäxū doypmike, ku tahawa maliwiläk. Tiwän gätäxäyā usinggän. Huwu aläkwäxū doypmike, apu tahawi maliwit. <sup>53</sup> Abrahamde Anätu, Nahorde anätu, äwä ile nanäle anätu yanggäyā gäxat näxälu uhinggitning,”† yang inikut.

Tiwänä Jekowu wamu kitokngä Anätu nanä Aisakgä naxälakakulu uläpäle umande yakut. <sup>54</sup> Yake täwalu undäkāne kälap tänguke, käwutdu Anätule ofa tahake, käwutdu häke, notnämbamu yangyāwambän apä nakin. Tikengä täpduxu unggwenune däpmunä täwalu undäkāne pekin.

<sup>55</sup> Tiwän kwepdätä gwäsi hikngä enake, Labandä yäpanä bapunä yangu kis tahangyämike, galak wam yänikengä, äminu unuxät kukinu hipdu päpän, yotnäle kukin.

## 32

### *Jekowu Iso kawikge tändäkngakut*

<sup>1</sup> Labanu yotnäle kuxawānu, Jekopkäyā äenake kukut. Kahit täpäne kuhikangu, Anätule ängela dayipgut. <sup>2</sup> Dayike “Kewu awomu Anätule ämindä yotde äpmandähimdekän päkapu yiwixaying,” yang yake, kewu uwomu umanä Mahanaim\* yang inikut.

<sup>3</sup> Tikengä Jekopdä puyä äminä kantri Idomkätanu kewu Seir uwomune ku, payänä Iso yawä natäpikge yänikut. <sup>4</sup> Using yänikut. “Bulämbam täpäna Iso wamu using ininong. ‘Puyä äminda Jekopdä using yak. Labankät yiwihika aapunggat. <sup>5</sup> Nä towiyä gämāna, donggina, sipsipna, memena äwä puyä ämina yangu käyā. Ge bulämbam täpäna, wamu aläknga gäle tewa apunggak, inale gätä bänip gwaläng natängamiläkge natät, yang ninik, tiwän apumäng,” yang ininong, Ison,” yang yänikut. Yänike yäning yäpiwän kukin.

\* **31:47:** Aram wamune, ‘Jegar Sahaduta’ yangu yäpuli ‘huwu aläkwäxū mahande dayixäwik natäpna kuwikge.’ ‘Galet’ yangkäyā yäpuli uläknganinggän, tiwändeyä Jekopdä Hibru wamune inikut. † **31:49:** Hibru wamune ‘Mispa’ äwä ‘andayixak’ yangu guläkngä usäkän bimä. ‡ **31:53:** Abrahamde Anätu, Nahorde anätu yangu buläkän täpä, bä inänä yangu kätak hikngä donatäxamäng. Abraham, Nahor yangge nanä Tera anätunä meyä ile tumuk yänikut. Josua 24:2 kendetnangäsä. Ile tiwän ‘Anätunätä äpme uhinggitning,’ yang temgumäng. \* **32:2:** Hibru wamune ‘Mahanaim’ yangu yäpuli yolu gäpangalä, tiwän äpmandehimdekän.



<sup>6</sup> Ku inike, Jekopde hipdu apgin. Apu using inikin. “Payäka Iso axu inikumäng. Tiwän änggandupikge, äminu 400 päpän ixät using apäyak.” yang inikin.

<sup>7</sup> Tiwän änaälake, meyä hikngä päxäwikgän, äminu ixät kukin, sipsipnä, memenä, towiyä gämänä äwä kamelnä yang upuke, täkwäkgu inätä päku peke, täkwäkguxäyä inätä päku pekut, <sup>8</sup> inale using natäpगत. “Isotä apu yakap täkwäk sipänu, mahan yiwitning täkwäxu andatäkuwä, dosipik,” yang natäpगत.

<sup>9</sup> Tikengä tumuk wamu using yakut. “O Anätu bapuna Abraham äwä nana Aisak yanggäne, O Yawe, gätä using nanikuläk. ‘Kantrika alakuläk womune kuwi, nätä gatänggama, täkekän yiwiläk,’ yang nanikuläk. <sup>10</sup> Nä puyä äminda, tiwän umana wenä. Tiwändeyä gätä näle iwikge natäxäwik, gwälam hikngä tahanggaläxunin. Yanggä Jodan Dupi tupä yayike apgumkätanu, hängäna wenä; hiputnatäkän hanggike yayike apgum. Tiwändeyä äpmanu hangäna meyä hikngä tiwän, inäinä pet; täkwäkgu inätä peke, täkwäkgu inätä pet. <sup>11</sup> Ge gatängamiyo. Gatängamike, payäna Isole kätaxune maleyo. ‘Itä apu mängätäna, enganga, äwä nina yangu undä nihipän kumnäm,’ yake naxäläkgat. <sup>12</sup> Wamu using nanikuläk. ‘Nätä äpme pahawa täkekän yiwiläk. Tikengä bapuka pahawa, meyä hikngä haluhalu bimä tiwä, kendetnangäsä doliwik,’ yang nanikuläk. Ge gatängamiyo, tiwän Isotä donihipik,” yang inikut.

<sup>13</sup> Inike, kupilä uggwenune, une yiwikut. Une yiwixäwik, kälawu gwenduyi bänip gwalängge payänäle imikge tuwängukut. <sup>14</sup> Using tuwängukut. Meme mängälä 200, meme wäwi 20, sipsiwu mängälä 200, sipsiwu wäwi 20, <sup>15</sup> kamelu engangä käyä 30xät engangäxät, towiyä gämänu mängälä 40, towiyä gämänu wäwi 10, donggi mängälä 20, äwä donggi wäwi 10 yang imikge tuwängukut. <sup>16</sup> Kälap tuwängukengu, inäinä upuke, puyä äminu täpätu täpätule kätaxune pekut. Peke puyä äminä using yänikut. “Gindä gämäk kunong. Axunanggengu, unekän hikngä maxunong. Täkwäkgutä gämäk kuwä, bänäkänu wangga äyiwiyok. Tiwänä täkwäkgu une. Tiwän une kuningkäyä, usinggän,” yang yänikut.

<sup>17</sup> Tikengä puyä äminä yakap kuwikge täpä using inikut. “Axuwi payäna Isotä ganduke, ‘Gä towikga imin? Kälawu imindäne yäwäxawi apukaying? Tiwän säne päke kunggaläk?’ yang bä ganiwän kayo. <sup>18</sup> Tiwänu using iniyo. ‘Kälawu aläkwäxu puyä äminda Jekopdäne. Itä bulämbam täpänä Isole yake namän, bänip gwalängge gamikge päkapunggat. Tixäwixu inä Jekowu äpmäxälä apänak,’ yang iniyo,” yang inikut.

<sup>19</sup> Tikengä puyä äminä kälawu yakap täpäle mehene päke kuwikge täpä, äwä uläpäle mehene päke kuwikge täpä, äwä une päke kuning ämin yangu usinggän yänikut. “Iso kakengu, <sup>20</sup> wamu undaninggat usinggän ininong. Tikengu using ininong. ‘Puyä äminda inä Jekopkäyä mahaninkätan apänak,’ yang ininong,” yang yänikut, Jekopdän, inale using natäpगत. “Hängä bänip gwalängge imitde pewa kuwä kakengu, bänip kwikwixu äpmembä natängamik. Ge nina kuwa nandukengu, äläkuläkawik,” yang natäke, <sup>21</sup> hängäläpä gämäk pewän päke kuxawä, kupilä unggwenu Jekowu yolu äpmandekän tahake yiwikut womune inäkän yiwikut.

<sup>22</sup> Kupilä unggwenunekänu Jekopdä mängät täpäyatnä, mängälä puyä äminäle yiwixamäläxu uläpäyat, äwä wawakngä 11-u uläkwäk yang päpän, Yanggä Jabok Dupi ayayikaying womune yayike, käwutdu yänipäko pekut. <sup>23</sup> Päko peke ako, hängä täpänäxäyä yawän, puyä äminä kukindä päke, atusikäwut päko pekin. <sup>24</sup> Tixawänu Jekowu käwutdu inäkän yiwikut.

### *Jekopkät Anätuxät amgumäläk*

Tixawän äminu täpätutä apän, “Imindäka betake, kewune täpän pimapan?” yake usinggän pahaxawät, axwakawikge tikut. <sup>25</sup> Using betäxäwik, äminu uläpätä kawänu, Jekowu yapmitnangäsä doliwän, yemiyiwilune tepän, golängä wakäwakälune dekut. <sup>26</sup> Tiwän äminu uläpätä Jekowu “Tewi kunggäwa. Axwakawikge alinggak,” yang iniwändeyä, Jekopdä “Wam gwaläng gämäk namiyä, tewa kuwiläk,” yang inikut.

<sup>27</sup> Tiwän äminu uläpätä “Ngä gä umanda imin?” yang iniwän, “Nä umana Jekop,” yang inikut.

<sup>28</sup> Iniwänu äminu uläpätä using inikut. “Gä umanda Jekop yangu dongganikaning. Tike umanda käluk täkgna Israel yang ganikaning, inale gä ämin äwä Anätu yangu amäke yapmiläk†” yang inikut.

<sup>29</sup> Iniwän Jekopdä “Äwä gäle umanu täkembä naniwiläk?” yang iniwän, uläpätä “Umana ganiwitde inale hikngä yänggaläk?” yang inike, wam gwaläng imikut.

<sup>30</sup> Tiwän Jekopdä “Anätule nomu axake teyä doxungwät,” yake, kewu uwomu umanä Peniel‡ yang inikut.

<sup>31</sup> Gusitdä akoxawänu, golängä andekutde, Peniel teke kukulu, amandotäke kukut. <sup>32</sup> Jekopde yemiyiwilune tepän, golängä wakäwakälune dekutde, Israel nanä äpmandehimkäyä, kälap hakengu, hikngwämu goläng wakäwakälune nanä donäkayingunin.

## 33

### *Jekopdä payänä Iso kuke kakut*

<sup>1</sup> Jekowu Peniel teke kuhika, kwayiwän enawänu, Iso äminä 400 päpän apunggäwä dayipgut. Dayike engangä upuke pekut. Leale engangu inä Leaxät peke, Reselde engangu inä Reselkät peke, puyä äminä uläpätatde engangkäyä usinggän pahakut. <sup>2</sup> Puyä äminä uläpätatkät engängäxät gämäk pewän yiwä, ile mehene Leaxät engängäxät pewän yiwä, wäsekngä Reselkät wawakngä Josepkät pekut. <sup>3</sup> Tikengä inä Jekopdä gämäk täku Isole kayine kuhilä kep däkäxätan täpu temgut. Tikengä usinggän pahanggäwän, 7 tikut.

<sup>4</sup> Tixawän Isotä ihapmäke, apu Jekowu betake, kis tahangämike, kwänämnä initiwän, kwänämnä une tikumäläk. <sup>5</sup> Tiwäl matäwän, Isotä hilakengu, mängälä engangä yang yiwikinä dayike, Isotä “Äminu aläkwäk yiwiyingu imindäne?” yang inikut.

Iniwän Jekopdä “Näle engang aläkwäxun, Anätutä puyä ämindale näle bänip gwaläng natake namikulunin,” yang inikut.

<sup>6</sup> Tiwän puyä äminä uläpätatkät engängäxätdä Isotä yiwikulune hikngä päku sopäsopä puke, kuhilä kep däkäxätan täpu yangin. <sup>7</sup> Tiwän ile mehene Lea engangä yanggä päku, sopäsopä puke, kuhilä kep däkäxätan täpu yangin. Tiwän wäsekngä Josepkät mingä Reselkätdä päku, usinggän pahakumäläk.

<sup>8</sup> Tiwänä Isotä Jekowu using inikut. “Kälawu uläkwäxu dasingge päkapuläkngä dayit?” yang iniwän, Jekopdä using inikut. “Bulämbam täpäna, gätä ilakngä hikngä nandupiläkge, gäle tiwän päkaput,” yang inikut.

<sup>9</sup> Tiwändeyä Isotä “Notna, nä usä käyä. Ge u gikale,” yang inikut.

† **32:28:** Hibru wamune ‘Israel’ yangu yäpuli Anätuxät amänggaxunin. ‡ **32:30:** Hibru wamune ‘Peniel’ yangu yäpuli Anätule nom.

<sup>10</sup> Iniwändeyä Jekopdä yäkwäle wamu using inikut. “Bulämbam täpäna, usingu mayäyo. Gäta ilakngä nanduläkngä kakengu, hängäläpä bänip gwalängge gamilu äwayo. Nätä nomda gandulu, Anätule nomune bima kat, inale gätä näle bänip kwikwik nataläk. <sup>11</sup> Anätutä bänip gwaläng natängamike namikut. Tiwän nä hängänambamgän hikngä tikut. Ge hängäläpä bänip gwalängge päkapulu äwayo,” yake kitokänggawän, Isotä “Hii, take,” yang inikut.

<sup>12</sup> Unetäkänu using inikut. “Nä ginkät kunim,” yang iniwändeyä, <sup>13</sup> Jekopdä using inikut. “Bulämbam täpäna, enganga kälapna yangu andayiläk. Enganga yupsängu kitokake kunangäsändo. Tiwän sipsip towiyä gämän yangkäyä usäkän. Engangä mämnä näkayingu yupsängu kunangäsändo. Äyawämba ihapmäke, täpduxu gwendunekänu malä hikngä kuhikangu, kälawu undä axumning. <sup>14</sup> Ge bulämbam täpäna, gätä gämäk kunggayo. Tixawänä puyä äminda kälapkat engangkättdä wepdä älukukaying using kuxawä, apuhikangä, bulämbam täpänale, Seir uwomune apundopnim,” yang inikut.

<sup>15</sup> Tiwänä Isotä using inikut. “Gäxät apningge äminu näxät apumängu täpätuyi yäniwa yiwixakut,” yang iniwändeyä, Jekopdä “Usingu inale tahawiläk? Gäta nä ilakngä nandupiläkgekän natät,” yang inikut.

<sup>16</sup> Tiwänä täpduxu inä unggwenunekän, Iso hipdu täpän täkwämbän, Seirle kukut. <sup>17</sup> Tiwändeyä Jekowu Iso doläwaläke kukut. Tike Sukot kukut. Täku yotnä tahake, kälapnäle gepmä pahakut. Ile tiwän kewu uwomu umanä Sukot\* yang inikaying.

<sup>18</sup> Jekopdä Mesopotemia teke apgulu, meyä dowäxäwik apuhika, kewu Kenan uwomune taunu Sekem apundopgut. Täkapu selyotnä taunde wäkngäsim tapikut. <sup>19</sup> Tikengä kewu selyotnä tapikulu uwomde, moningu 100 silwa, Sekemde nanä Hamor yänggwätde yämikut. <sup>20</sup> Kewu uwomune alta Anätule tahake, umanä El-Elohe-Israel† yang inikut.

## 34

### *Jekopde wawakgä Dainale tahake, äminu sipgin*

<sup>1</sup> Gwendune Jekopkat Leaxätde yäpa Daina mängälä kewu uwomune nanä dayipike kukut. <sup>2</sup> Hamoru, Hiwi nanä uläpä kewu uwomune näle kuhiläle yiwixakut. Ile wawaxu Sekem. Uläpätä Daina kambutake, tänggängänuke tahawän malikut. <sup>3</sup> Tiwän Dainale natänggämätake, wamu ilakngäkän inikut. <sup>4</sup> Tikengä Sekemdä nanä Hamoru using inikut. “Mängälä aläpä näle yängamiyo. Tiwän mängättnale täpit,” yang inikut.

<sup>5</sup> Jekopde wawaxu kälawu äminsak daying yiwitningge songäne päku yiwikin. Tixawän Jekowu “Sekemdä yäpaka Daina tahawän malikut,” yawä natäpgut. Tikengu wamu täkngatu doyakut. Tike wawakngäle yiwixakut.

<sup>6</sup> Tixawän Hamor äwä wawakngä Sekem yangu Jekopkat wam yäningge, taun teke, Jekopde kukumäläk.

<sup>7</sup> “Hängä womdu using tahakin,” yangu yawä natäkengä, Jekopde wawaxu kewu uwom kukinu teke, hipdu yolune apgin. Sekemdä Daina tänggängänuke tahawän malikulu, Israel\* yänggwätde kayine gutongä hikngä. Hängä dolahanangäsa täknga tahakut. Ge haminätä haminäle butayä natake, Sekemde tokngä hikngä natäxäwik apgin.

\* **33:17:** Hibiru wamune, ‘Sukot’ yangu yäpuli gepmä. † **33:20:** Hibiru wamune ‘El-Elohe-Israel’ yangu yäpuli Anätu, Israelde Anätu. \* **34:7:** Jekopde umanu käluk täknga Israel.

<sup>8</sup> Ge yolune apä, Hamordä Jekowu using inikut. “Wawaknga Sekemu yäpakale hikngä natäxak. Täkebä mängätnäle imining? <sup>9</sup> Tiwän mängälä ninkätan nanä damixätna, yäkwäle nimining? <sup>10</sup> Tiwän ninkät gatäke using yiwitnim. Kewu sawomuneka yiwitningge natäkengu, gihä kake, kewu uwomune yiwitnong. Tixäwik kewu awomkätanu täkekän tihikuning. Tixäwik kewu nindäne womduyi täke päning,” yang inikut.

<sup>11</sup> Tiwänä Sekemdä Dainale nanä äwä häminä yangu using yänikut. “Gindä wamu u yäwilu ‘Täke’ yaningä kakengu, inaleka naniningu äpme damit. <sup>12</sup> Mängälä uläpäle moningu dasingdasingga damitde natäkengu, täke tuwängutning. Hängä gwälamu dasäka damitde natakengu, täke yäning, tiwänu äpme damit. Inale mängälä uläpä ahikngä naminingge natäxat,” yang yänikut.

<sup>13</sup> Haminä tahawän malikutde natäke, Jekopde wawakgä Sekemkät nanä Hamorkälu yäkwäle wamu kem yäniningge natäke, using yakin. <sup>14</sup> “Using dolahanim. Hamininu gupnä domatäkin äminde yäminangäsando. Using tahakengu, mäyäkngä hikngä natäpnimunin. <sup>15</sup> Tike hängä täkngatukän alahangäsän. Nindä gupnin matäkumäng usinggän, ginkäyä wäwi undä gupsä matänong. Tiwänä ‘Täke,’ yangu daninim. <sup>16</sup> Tikengä mängälä mätexu damixätna, yäkwälexäyä nimining. Tiwän ninkät ginkälu u äminuninggän däkngake yiwitnim. <sup>17</sup> Tike gupsä matäningge ‘Täke’ yangu doyawä, hamininu äläke kunim,” yang yänikin.

<sup>18</sup> Tiwän Hamorkät Sekemkätä natäpälu, wamu uläknga täke tikut. <sup>19</sup> Tiwän wäwi mätexu uläpä Jekopde yäpale hikngä natäpogutde, wamu yänikin using yupsäng pahakut. Äminu taunune nanätä kawä, äminu Hamorde yolune yiwixayingkätanu, Sekemu bulämbam täpä tikakut. <sup>20</sup> Ge Hamorkät wawakngä Sekemkät taun yiwixaying notnä wam yänihimäläkge, taunde yämä däkäne kukumäläk.

<sup>21</sup> Ku using yänikumäläk. “Äminu uläkwäxu notnin däkngäningge tahakaying. Kewu awomu inulung. Ge täke pena, ane tihikuxäwik yiwitning. Tixawän mängälä itäne nanä päxätna, yäkwäle nindäne päning. <sup>22</sup> Tiwändeyä using niniying. ‘Nindä gupnin matäkumäng usinggän, ginkäyä wäwi undä gupsä matänong. Using tahawäyä, ninkät ginkälu u äminuninggän däkngake yiwitnim,’ yang niniying. <sup>23</sup> Ge using tahakengä, ile kälap äwä hängäläpä itäne yangu, ninkäyä towikngä däknganim. Ge ‘Täke’ yangu yänina. Tiwän ixät ninkät yiwitnim,” yang yänikumäläk.

<sup>24</sup> Yawät äminu undä yämä däkäne yiwikinü ‘Täke’ yake, wäwi taunune nanä undä gupnä matäkin.

<sup>25</sup> Täpduxu 3 gwendä apän, wäwi undä tokngä däkä päke, ‘Ämindä ämbänhipning?’ yangu donatäke yiwixawä, Jekopde wawaxu, haminä Dainale natäke, Simeonkät, Livaixätä dä sänggwanä päke, taunune ko, wäwi undä sipät kumgin. <sup>26</sup> Hamor, wawakngä Sekem yangkäyä sänggwatä matäwät kungäxawät, ko Daina Sekemde yolunetä täke, epuxukumäläk.

<sup>27</sup> Tiwänä Jekopde wawakgä using natäpgin. “Sekemdä hamininde gutongä täknga taunu anggäpangune tahakut,” yake, ko äminu axumginä dayike, taunune nanäle hängäläpä undä päkin. <sup>28</sup> Sipsipnä, memenä, towiyä gämänä, dongginä äwä hängä undä taunune yiwikin, äwä songäne yiwikin yang päkin. <sup>29</sup> Tixäwik hängä nomän täpäläpä, mängälä, engang, äwä hängä yotkätan yiwikinunin yangu undä päkin.

<sup>30</sup> Tiwänä Jekopdä wawakngä Simeonkät Livaixälu using yänikut. “Gitdä meyä täknga namikamäläk. Peres nanä, Kenan nanä yangu kewu awomune

yiwixayinggä nandupä, nä wäyi ämin tinanggenggak. Ninu äminu meyändo. Undätä anihipningge yanggatake apungu, ninu undä nihipä kumnimunin,” yang yänikut.

<sup>31</sup> Tiwän yäkwäle using inikumäläk. “Haminilu Sekemdä kukäle täke tihikukulu täke?” yang inikumäläk.

## 35

### *Jekowu hipdu Betel kukut*

<sup>1</sup> Anätutä Jekowu using inikut. “Gä payäka Iso teke datäkuxawi, nä Anätu Betel apuke gandupgum. Ge awomu teke, une päko yiwixäwik, alta gwendu näle tahayo,” yang inikut.

<sup>2</sup> Tiwänä Jekopdä inäxät nana äwä ixät yiwixaying yangu undä using yänikut. “Hängä womdune nanätä ‘anätunin’ yake, ämindäkän kwätälukinä päkinu uläpäläpä amumbä kunong. Tiwän gutongä täkngalänga teke, käluk däknge, u tahananngge tuwängge, täwiksä käluk pahanong. <sup>3</sup> Tiwänä Betel kopnim. Ko alta Anätule tahawit. Sänesäneka tihikukumune, meyä päkum gwengwenune yangu Anätu näxät tihikuxäwik, gatängamikut,” yang yänikut.

<sup>4</sup> Ge hängä womdune nanätä “anätunin” yake ämindäkän kwätälukinä päkinu uläpäläpä äwä mäläkäpä mäläkngäne pekin yangu undä, Jekopde imikin. Imä, Jekopdä pa kupäha bimä Sekemde wäkngäsim yiwixaxu undäkäle kematde kwayipekut.

<sup>5</sup> Tikengä kewu uwomu teke kukin. Kuxawä Anätutä pahawän, äminbamu yotyolu uwomune nanä naxäla hikngä natake, doxu yäwakin. <sup>6</sup> Tixawän Jekop äwä äminu undä ixät kukin yangu kuhika, taunu Lus kondopgin. Lus taunu unggäpangu Kenankätan yiwikut. Äpmanu unggäpangu Betel yang inikaying. <sup>7</sup> Lus taun kondoke, Jekopdä alta gwenu tahake, kewu uwomu umanä El-Betel\*, yang inikut, inale payänä teke datäkuxawänu, Anätu uwomune apän kakut.

<sup>8</sup> Tiwänä Jekopde mingä Rebekale puyä äminu Debora une kupän, pa kupäha bimä Betelde amusikäwut yiwixak däkäne kwayikin. Kwayike pa undäkä umanä “Alon-Bakut” † yang inikin.

### *Anätutä Jekopde wam gwalängu hipdu imikut*

<sup>9</sup> Jekowu Mesopotemia teke apänä, Anätutä hipdu apu, wam gwalängu using imikut. <sup>10</sup> “Gä umanda Jekop. Tiwändeyä äpmanu Jekop yangu dongganikaning. Tike Israel yang ganikaning,” yang inikut. Using yake, umanä Israel yang inikut.

<sup>11</sup> Tikengä unetäkänu using inikut. “Nä Anätu Kitokngäna Käyä Täpä. Nätä äpme tahawa, gäle bapuka meyä sakngälake, kantri inäinä päke yiwitning. Tixäwik bapuka täpätuyi kingge yiwitning. <sup>12</sup> Tixawän kewu Abrahamkät Aisakätde yämitde yänikumu, gäle äpme gamit. Tikengä bapukalexäyä uwomuningänu äpme yämit,” yang inikut. <sup>13</sup> Inike, Jekowu wam inikulu uwomune yiwixawän, teke kukut.

<sup>14</sup> Tiwän kewu Anätutä wam inikulu uwomune, Jekopdä huwu belängä gwendu täke, mahande kaxäwik natäpningge, däm täpän enakut. Täpän enawän, huwu unggwenu ofale wain yanggätä pingyapmike, olip yanggätäxäyä hipdu pingyapmikut. <sup>15</sup> Kewu Anätutä wam inikulu uwomu, Jekopdä umanä Betel yang inikut.

\* **35:7:** Hibu wamune ‘El’ yangu yäpuli Anätu. Tiwän ‘Betel’ yangu yäpuli Anätule yot. † **35:8:** Alon-Bakut yangu yäpuli pa kwänäm tikin däkänin.

### *Reselu Bensamin dukngixäwik kumgut*

<sup>16</sup> Tiwänä Betel teke kuhika, taunu Eprat kuningge kukin. Kuxäwik Reselu engang kake täpikge tahawän malixawän, tokngä däkä päkut. <sup>17</sup> Tinggawän mängälä anggatängämikge yiwixak täpätä using inikut. “Manaxälayo. Wawakga täpätu dukngikgaläk,” yang inikut. <sup>18</sup> Tiwän Reselu axupikge tixäwik, mepme wäsekngä pexäwik, umanä Benoni yang inikut. Tiwändeyä nanätä umanä Bensamin yang inikut.†

<sup>19</sup> Reselu axupän, Epratde kahit kwayimune kwayikin. (Eprat yangu Betlehemde umanu tupä nanä täknganin.) <sup>20</sup> Tiwän Reselde mätmälune, Jekopdä huwu gwendü däm täpän enakut. Huwu unggwenu Reselde mätmätde tuwängge äpmankäyä ayiwixak.

<sup>21</sup> Israelu§ hipdu kuhika, Migdal-Eder ku yapmike täku, selyotnä tapike, une yiwikut. <sup>22</sup> Kewu uwomune yiwihika, Rubendä nanäle puyä äminu mängälä Bilha uläpaxät kopän yiwikumäläk. Tiwänä Israelu yawä natäpugut.

### *Jekopde wawak*

Jekopde wawaxu unekänu 12. <sup>23</sup> Leale wawaxu Ruben, Simeon, Livai, Juda, Isakar, äwä Sebulun yang. Jekopde wawaxu yakap täpä Ruben. <sup>24</sup> Tiwän Reselde wawaxu Josepkät Bensaminkät. <sup>25</sup> Tiwän Bilha, Reselde puyä äminde yiwikut täpäle wawaxu Dankät Naptalixät. <sup>26</sup> Tiwän Silpa, Leale puyä äminde yiwikut täpäle wawaxu Gatkät Aserkät. Wawaxu aläkwäxu undä, Jekopdäne, Jekowu Mesopotemia yiwixäwik towikulunin.

### *Jekopde nanä Aisakgä kumgut*

<sup>27</sup> Jekowu nanä Aisakge Mamre kukut, Abrahamkät Aisakät tupä yiwikumäläk womune. Mamre Kiriati Arba taunde wäkngäsim. (Kiriati Arba yang taunu Hebronde umanu tupä nanä täknganin.) <sup>28</sup> Aisaxu krismasnä 180 yiwikut. <sup>29</sup> Äminäläke hikngä tikengä kungäke, bapunä tupä kungäke päku yiwixakinunekän kukut. Tiwän wawakngä Isoxät Jekopkätde kwayikumäläk.

## 36

### *Isole bapunä*

<sup>1</sup> Wamu aläknga Isole bapunätäne. Isole umanu täkngatu Idom. <sup>2</sup> Iso mängätnä Kenan nanä päkut. Täpätu umanä Ada, Hit nanä Elonde yäpa. Tiwän täpätu umanä Oholibama, Anale yäpa tiwän Hiwi nanä Sibeonde bapunä. <sup>3</sup> Tikengä Basemat, Ismaelde yäpa, tiwän Nebaiotde haminu mahandeyä täkut.

<sup>4</sup> Adale wawaxu Elipas. Tiwän Basematde wawaxu Ruel. <sup>5</sup> Tiwänä Oholibamale wawaxu Jeus, Jalam, äwä Kora yang. Wawakngä uläkwäxu, Isotä Kenan yiwixäwik towikulunin.

<sup>6</sup> Isotä mängätnä, wawakngä, yäpanä, äwä ixät yiwixaying ämin, kälapnä äminsak, äwä hängäläpä Kenan kep womune yiwixäwik päkulunin yang undä päke, notnä Jekowu teke, kewu malä womdune päku yiwikut. <sup>7</sup> Isoxät Jekopkätde kälawu äminsaxu meyä hikngä tinggäwä, kewu itä yiwikumäläxu uwomu, songäsöngä kälawu undätänetä nänangäsä dolikut. Tiwän kewu uwomunekänu yiwitnangäsä dolikut. <sup>8</sup> Tinggäwän Iso bä Idomu hängänä undä päke, Seirkätanu täwalnä käyä womune päku yiwikut.

† **35:18:** Benoni yang yäpuli wawaknga meyä namik. Tiwän Bensamin yang yäpuli wawaknga aläpä bänipna. § **35:21:** Israel yang Jekopde umanu käluk täknganin.

### *Isole bapunä kewu Seir yiwikindäne*

<sup>9</sup> Wamu aläknga Isole bapunä kewu Seirkätanu täwalnä käyä uwomune alakin täkwäkgäne. Äminu uläkwäxu äpmanu Idom nanä yang yänikaying. <sup>10-13</sup> Isole mängälu Adatä wawakngä Elipas dukngikut. Tiwänä Elifasde wawaxu Teman, Omar, Sepo, Gatam äwä Kenas yang. Elipasda mängätinä täpätuxäyä hipdu täkut. Umanä Timna. Tiwän itä Amalek dukngikut.

Isole mängälu Basematda wawakngä Ruel dukngikut. Tiwänä Ruede wawaxu Nahat, Sera, Sama äwä Misa yang.

<sup>14</sup> Isole mängälu Oholibama, Anale yäpa, tiwän Sibeonde bapunä uläpätä wawakngä dukngikulu Jeus, Jalam, äwä Kora yang.

<sup>15-16</sup> Isole bapunä täpätuyi yakap äminde Idom yiwikinde wam. Elipasu Isole wawaxu yakap täpänin. Wawaxu itä towimbän, yakap äminde yiwikinu umanä Teman, Omar, Sepo, Kenas, Kora, Gatam, äwä Amalek, yang. Äminu aläkwäxu Isole mängälu Adale ayinä.

<sup>17</sup> Isole wawaxu täpätu Ruel. Ile wawaxu yakap äminde Idom yiwikinu umanä Nahat, Sera, Sama, äwä Misa yang. Äminu aläkwäxu Isole mängälu Basematde ayinä.

<sup>18</sup> Isole mängälu Oholibamale wawaxu yakap äminde yiwikinu umanä Jeus, Jalam, äwä Kora yang. Oholibama Anale yäpa. <sup>19</sup> Äminu aläkwäxu, Iso bä Idomde bapunä inäinäne yakap äminde yiwikin äminunin.

### *Seirle Bapunä*

<sup>20</sup> Äminu kewu uwomune yakap yiwikinu, Seir Hor nanä uläpäle bapunä. Seirde wawaxu Lotan, Sobal, Sibeon, Ana, <sup>21</sup> Dison, Eser, äwä Disan yang. Seirde wawaxu uläkwäxu Idomkätanu inä bapunäle yakap äminde yiwikin.

<sup>22</sup> Lotande wawaxu Horixät Hemamkät. (Lotande haminu Timna.)

<sup>23</sup> Sobalde wawaxu Alwan, Mahanat, Ebal, Sepo, äwä Onan yang.

<sup>24</sup> Sibeonde wawaxu Aixät Anaxat. Ana uläpätä nanäle donggi songäsongä näningge päke kuke, yanggä tokngä akokayingu däkätu kakut.

<sup>25</sup> Anale wawaxu Dison, tiwän yäpanä Oholibama.

<sup>26</sup> Disonde wawaxu Hemdan, Esban, Itran, äwä Keran yang.

<sup>27</sup> Eserde wawaxu Bilhan, Sawan, äwä Akan yang.

<sup>28</sup> Disande wawaxu Uskät Arankät.

<sup>29-30</sup> Ge Hor nanä uläpäle wawaxu Seirkätanu bapunä inäinäne yakap äminde yiwikinu, Lotan, Sobal, Sibeon, Ana, Dison, Eser, äwä Disan yang.

### *Kingu Seir bä Idom nanä daying yiwikinde uman*

<sup>31</sup> Israel nanä kingge doyiwikin gwenggwenkätanu, Idom nanäle kingge yiwikinu umanä using. <sup>32</sup> Bela Beorde wawakngä Idomde kingge yiwikut. Taunäle umanu Dinhaba.

<sup>33</sup> Yiwihika Belatä kungäxawänu, kingge Jobap Serale wawakngä yiwikut. Sera taunu Bosra nanä.

<sup>34</sup> Jobapda kungäxawänu, kingge Husamu Teman nanä uläpätä yiwikut.

<sup>35</sup> Ge Husamda kungäxawänu, kingge Hadat Bedatde wawakngä yiwikut. Hadalu Midian nanä Moap ku sipgut täpänin. Taunäle umanu Awit.

<sup>36</sup> Ge Hadatda kungäxawänu, kingge Samla, Masareka nanä uläpätä yiwikut.

<sup>37</sup> Ge Samlatä kungäxawänu, kingge Saul, taunu Rehobot nanä uläpätä yiwikut. Taun Rehobolu yanggä dupine inälängän.

<sup>38</sup> Ge Saulda kungäxawänu, kingge Balhanan, Akborde wawakngä yiwikut.

39 Balhananu, Akborde wawakgä kungäxawänu, kingge Hadardä däknge taunu Pau yiwikut. Hadarde mängälu umanä Mehetabel. Mehetabelu Matretde yäpa. Matrelu Mesahapde yäpa.

*Isole bapunä kuhiläle yiwikinde uman*

40-43 Isole bapunä sakngälake, kewu Idomkätanu inäinä päke yiwikin. Bapunä inäinä yakap äminde yiwikinu umanä using: Timna, Alwa, Jetet, Oholibama, Ela, Pinon, Kenas, Teman, Mapsa, Makdiel äwä Iram yang. Äpmanu äminu Idom nanä yang yänikayingu, Isole bapunä.

## 37

*Notnä täkwäkgä Josepde mähe natäpgin*

<sup>1</sup> Jekowu kewu nanätä yiwikulune Kenan yiwikut.

<sup>2</sup> Jekopde wawakge wam. Josewu krismanä 17 using tixawän, Josepkät notnä täkwäkguxät nanäle sipsip daying yiwikin. Notnä uläkwäxu nanäle mängälu Bilha, Silpa yangge wawak. Tixäwik notnäta gutongä dasingga pahawä dayipgulu, nanä apu inikut.

<sup>3</sup> Israelu\* äminälake alikengä, Josewu une towikutde, ile bänip gwaläng hikngä natäxäwik, täwixu gwälam hikngä kwämbätdu tahake imikut. Tike notnäle using hikngä donatäpगत. <sup>4</sup> Nanätä Josepdekän bänip gwaläng hikngä natäpän kake, notnäta Josewu mähemähe kaxäwik, wamu kätaxu doinikakin.

<sup>5</sup> Gwendune Josepdä dambu täknge tike enake, notnä yäniwän natake, mähemähe hikngä une kakin. <sup>6</sup> “Dambu täknge using tit,” yake using yänikut. <sup>7</sup> “Ninu undä puyä tängätune wit† matake wamähikanayä, näta wamät tupä däm enake yiwän, gindä wamäyinggä apu, nätäne tupä yiwitäpä gwahawän, sopäsopä puke, däm kepkätan päpu yamäying,” yang yänikut.

<sup>8</sup> Tiwänä payänätä inikin. “Gä ninde yakapde yiwike, nindung yiwiläk?” yake, dambu ulike yänikutde, mähemähe hikngä kakin.

<sup>9</sup> Josewu dambu täknge tuxäyä hipdu tike, payänä using yänikut. “Äpmanu dambu täknge kaxäwa, gusit, yekäp äwä kuminamu täkwäkgu 11 yanggä näle sopäsopä puke, däm kepkätan päpu yamäying,” yang yänikut.

<sup>10</sup> Tiwänä nanätä natake, “Ina dambu tiläk?” yake ininggämätake, “Mingga, nä äwä notda yanggä gäle apuke, sopäsopä puke, dämäninu kepkätan päpu yamnim?” yang inikut. <sup>11</sup> Tiwän payänä täkwäxu tokngä natäpgin. Tiwändeyä nanä dambu uläkngä iwikge natäng yiwikut.

*Josewu notnäta äminde yämixäwik, moning päkin*

<sup>12</sup> Josepde payänä taunu Sekem uwomde wäknge sim päku yiwixäwik, nanäle sipsip daying yiwikin. <sup>13</sup> Tixawän Israeldä Josewu using inikut. “Payäka sipsiwu Sekem daying yiwayak. Ge une kuyo,” yawän, Josepdä “Hii, äpme kuwit,” yang inikut.

<sup>14</sup> Tiwän nanätä “Kuke dayipso. Payäka äwä sipsip yangu nomängänbä yiwayak. Tikengä apu naniwiläk,” yake ining yäpiwän, Hebron Kupi teke Sekem kukut.

<sup>15</sup> Une ku payänä yawahikungawän, äminu täpätutä kake, “Gä ina yäwäxaläk?” yang inikut.

<sup>16</sup> Iniwän Josepdä “Nä payäna sipsiwu, säneka daying yiwayak yake yäwaxat. Ge gätä andayiläkngä kakengu, täkembä naniwiläk?” yang inikut.

\* 37:3: Israelde umanu tupä nänä Jekop. † 37:7: Wilu rais bimä.



<sup>17</sup> Iniwän “Dotande kuningge yawäxakumnä, ane yiwikinu aleke, une kukin,” yang inikut. Iniwän Josewu payänä yawatäke ku, taunu Dotan uwomde wäkngäsim kuke dayipgut.

<sup>18</sup> Payänätä yiwikinune doxundoxawän, malä kuwän kake, kupsäle tängutningge wepdä wamu using yakin. <sup>19</sup> “Dambukän tinggaxu ane täpä aapunggak. <sup>20</sup> Ge tänguke, gäpma hopä yanggätä yiwikge kwayikinu däkätune mutna pukuwik. Tiwän ‘Kälaptukgä tänguke nakin,’ yang ku yänim. Tiwänä dambunä tikulu bulä ämbä alawä känim?” yang yakin.

<sup>21</sup> Unin yawä, payänä Rubendä anggatängämikge natake, “U! Kupsäle hikngä dolängutnim,” yang yänikut. <sup>22</sup> Unetäkänu using yänikut. “Dolängutna kupik. Dolänguke tokngä däkäxäyä doiminim. Tike gäpma kewu moyo womune yiwäxayingu andäkaxätan mutna pukuwik. Tiwän tokngä däkäxäyä doiminim,” yang yänikut. U yänikulu Josep gatängämike, nanäle täke kuwikge natake yänikut.

<sup>23</sup> Ge Josewu inälängän apänu, alänggänggänuke, täwikngä gwälam hikngä uxwämbät tahakulu äläpä dopgut. <sup>24</sup> Tiwän täke täku gäpma undäkaxätan mumbä pukukut. Gäpma undäkä yanggänä wenä.

<sup>25</sup> Tikengä päku nakngä nake kaxawä, Ismael nanä äminu täkwäkgu Giliatkätandä apgin. Pa inuxu kápängänä käyä kamelu meyä gwenalune Isip päke kuningge päkappin.

<sup>26</sup> Tiwän Judatä notnä täkwäxu using yänikut. “Ina gwaläng pänimde uläpninu tängut täkohopinim? <sup>27</sup> Undanä. Ismaelde bapunäle yäna, moning nimixäwik täxut, inale uläpninu uläpä daknotnin, tiwän nan notnin. Ge dolängutnim,” yang yänikut.

<sup>28</sup> Tixawänu Midian nanä une hikngä apä dayike, Josewu gäpmanetä tuliwä akopgut. Tiwän 20 sekel silwale yawä, Ismaelde bapunätä uhike, Isipde täke kukin.

<sup>29</sup> Täke kuxawäyä, Rubenu gäpma däkäne apu, Josewu wenä kake, butayä hikngä natake, inä täwik wehikut. <sup>30</sup> Tikengä apu notnä using yänikut. “Josewu wenä xat. Ngä nanu dasing täknganin ku iniwit?” yang yänikut. <sup>31</sup> Yawän meme gwendu guläkngä matäwä, daxu apä, Josepde täwixu daxune täpä mahakut.

<sup>32</sup> Tikengä täwixu täpä mahakulu uxwämbälu nanäle täku imike, using inikin. “Täwixu axwämbät kake tämängu kätak kayo. Wawakgatänembä?” yang inikin.

<sup>33</sup> Iniwä täwixu uxwämbälunin kake “O, wawakngale täwik tinggak. Kälaptukgä alänguke yahandeke nakin,” yakut. <sup>34</sup> Yake Jekowu inä täwik wehike, täwixu butayä täkngatäne pahake, wawakngale butayä natäxäwik, gwayamu belakngä yiwikut.

<sup>35</sup> Tinggawän wawak yäpanä undä apu “Wamwambä inina, butayä täknga natäxu bulämdawik,” yake, wamwam inikin.

Tiwändeyä “Dombulämdawit. Tike butayä natähika, ninaxäyä kungäke, axumgin amindä yiwäxayingune wawakngale kuwit,” yaxäwik, Jekowu wawakngale kwänämu iwikge tikut.

<sup>36</sup> Tixawänu Midian nanätä Josewu Isip täke kukin. Täke kuwä, Potipatä uhikut. Potipa kingge kulä tahakaying äminde kuhiläle yiwäxakut.

## 38

*Judaxät Temaxätdäne wam*

<sup>1</sup> Tãpduxu uwomkãtanu Juda\* notnã peke, Adulam pukuwãn, une nanã wãwi tãpãtu umanã Hira, ixãt yiwikumãlãk. <sup>2</sup> Une yiwihika, Kenan mãngãlu tãpãtu kake tãkut. Mãngãlã ulãpãle nanã umanã Sua. Juda mãngãtnãxãt yiwãt, <sup>3</sup> tãngene kãyã tikut. Tiwãn wãwi tãpã dukngikut. Dukngiwãn umanã Er yang inikumãlãk. <sup>4</sup> Tiwãn hipdu tãngene kãyã tiwãn, wãwi tãpã dukngike, umanã Onan yang inikut. <sup>5</sup> Tikengã wãwi tãpãtuxãyã Kesip yiwixãwik, dukngike, umanã Sela yang inikut.

<sup>6</sup> Judatã wawakngã yakap tãpã inulung tiwãn, mãngãlã tãpãtu yangãmikut. Mãngãlã ulãpãle umanu Tema. <sup>7</sup> Tiwãndeyã Judale wawaxu yakap tãpã Yawele kayine gutongã hikngã pahakut. Pahawãn Yawetã kupsãle tãngukut.

<sup>8</sup> Tiwãnã Judatã wawakngã mahan tãpã Onanu using inikut. “Payãkale natãke, kombãtã pahangãming. Tiwãn wawaxu yakap tãpã payãkale nomde dukngiwik,” yang inikut.

<sup>9</sup> Using iniwãndeyã, Onanu “Engangu towimbilu ninanendo,” yang natãpgut. “Ge payãnale kombãtkãt yiwixãwixu, engang alãyãk,” yake, yanggãnã kewune moyo pexawãn kukin. <sup>10</sup> Unin pahawãn, Yawetã kawãn, gutongã hikngã tikut. Tiwãn ixãyã kupsãle tãngukut.

<sup>11</sup> Tiwãnã Judatã “Wawaknga Selaxãyã Tema tãke kumsãk,” yang natãke, ayinã Tema kemu using inikut. “Ayina, nangga minggale yolune pãku yiwixayo. Tikengu wãwi kãluxu tãpãtuyi mawãyo. Tixawãn wawaknga Sela inulung tãpã tikengã tãpik” yang iniwãn, Tema nanã mingãle kuwãn yiwikin.

<sup>12</sup> Belakngã womdu yiwihikangã, Judale mãngãlu Suale yãpa axumgut. Kupãn Juda mãngãtnãle gwãyãm yiwikdãkngake, notnã Hira Adulam nanã ulãpãxãt Timna koptumãlãk. Timnã uwomune Judale puyã aminu sipsip dãnggãm matãxawã koptumãlãk

<sup>13</sup> Tixawãnu Tema using inikin. “Bapuka sipsipnãle dãnggãm matãwikge Timna kopãnak,” yang inikin.

<sup>14</sup> Tiwãn natãke, kombãtde tãwixu pahanggaxu pãpeke, tãwixu kwãmbãtduhimdã kuhilãne wapãn, nomnã epu umukut. Tikengã taunu Enaimde yãmã dãkãne kahilu Timnale kokaying tãpãne tãku puku yiwikut. Tema using natãpgut. “Sela inulung tãpã alik. Nã itã tãpãn, engangu dukngitnangãsä. Tiwãndeyã nãle wamu doyak,” yang natãpgut.

<sup>15</sup> Tixawãn Judatã apu, nomnã umukulunin kake, “Mãngãlã alãpã yumdekãn tãke tihikukayingunimbã?” yang natãpgut. <sup>16</sup> Tikengã “Bapunambã?” yang donatãxãwik, Tematã yiwikulune kuke, “Tãkembã yiwisim?” yang inikut.

Iniwãn “Uyiwikengu, ina namilãk?” yang inikut.

<sup>17</sup> Tiwãn Judatã “Meme mãteknga gwendu äpme gamit,” yang inikut.

Iniwãn Tematã “Hãngãka tãpãtu äpmasimdekãn äpme nami tengyiwixawa, meme mãtexu namixãwikngã tãpilãk?” yang inikut.

<sup>18</sup> Tiwãnã Judatã “Ina hãngã gamit?” yang inikut.

Tiwãn Tematã “Hãngã umanda tuwãngge matãkinã gulãkgane mapi epunggaxu ulãpã,† napnã bulak namike, hiputdaxãyã namiyo,” yang inikut. Iniwãn hãngã inã natãpgut using ulãpãyalu imãnã yiwikumãlãk. U yiwikumãlãk gwende engang muhip pãkut.

\* **38:1:** Juda ulãpã Jekopde wawaxu tãpãtu. † **38:18:** Aminu uwomune nanãtã using tahakakin. “Wamu alãknga nãtã temãnggat,” yakengu, hãngã umanãle tuwãngge matãkakin tãpãlãpã tãke, pepane tãpu tepã, tuwãngã dãkã une alakakin. Ge undãkãnin kakengu, itã temãk yangu une natãxakin.”

<sup>19</sup> Judaxälu yiwikengä, Tema täku, täwixu nomnä umukulu uxwämbälu utdoteke, kombät täwikngä hipdu tahakut.

<sup>20</sup> Tixawänu Juda meme mätexu gwendu mängälä uläpäle imixäwik, hängä täpänä hipdu päpikge natäke, notnä Adulam nanä täpäle imän, täke kukut. Täke kuke teyä mängälä uläpä aläwämbän malikut. <sup>21</sup> Tiwän Hiratä wäwi taunune yiwäxayingu using yänikut. “Mängälä yumdekän täke tihikukayingu, Enaimde kahit täpäne yiwikulu sändanda?” yawän, “Andanu mängälä using bimä tihikunggaxu täpätu wenä,” yang inikin.

<sup>22</sup> Tiwän hipdunä apu, Juda using inikut. “Axu tawämba maliwän, wäwi taunune yiwixayinunin yäniwa, ‘Andanu mängälä using tahanggaxu wenä,’ yang naniying,” yang inikut.

<sup>23</sup> Iniwän Judatä using inikut. “Yahikukata ninimitnäng. Ge undanä. Hängäläpä nätäne päkulu, undanä peke yiwixäwik. ‘Wamu inikum using meme mätexu ambä imit,’ yake gama, täke ku tawämbi malik. Ge using kakengu, undanä,” yang inikut.

<sup>24</sup> Yekawu gwenälä gwendu using yiwikengä, apu Juda using inikin. “Ayika Tema yumdekän täke tihikukinä, tängene käyä alik,” yang iniwä, Judatä using yakut. “Kepmän tulitakepu däkiné hawä ihikuyok,” yang yänikut.

<sup>25</sup> Yawän tängutningge kepmän täke epuxuwä, Tematä bapunäle hängäläpä yämike, wamu using tewän kukut. “Nä hängä aläpäyatde towikngätä engang muhiwu namikut,” yake, unetäkänu using yakut. “Guläkngäne mapä epunggak äwä hiput yangu imindäneka? Ge kätak dayipso,” yang yäniwän, ku inikin.

<sup>26</sup> Iniwä Judatä hängä uläpäyalunin dayike, using yakut. “Gutongä nätä tahakum. Tike Tema gutongänä wenä, inale nätä kem inike, wawaknga Selale doimikum,” yawän, Tema dolängukin. Tiwänä hipdu doyiwikumäläk.

<sup>27</sup> Täpduxu engang kake täpikge natäpget gwenune, “Ukgatäp tinggak,” yang natäpgin. <sup>28</sup> Andayike päkut gwenune engangu täpätu kätakngä tewän epgut. Tiwän mängälä anggatängämikge yiwikut täpätä kake, “Andä gämäk apunggak,” yake, trelu gämänä täkngahimdä kätakngäne wamgut.

<sup>29</sup> Tiwändeyä kätakngä hipdu tuliwän koxawänu, notnä täpätä gämäk apgut. Tiwän mängälä uläpätä kake “Waxang! Gätä gämäk kitokake apunggaläk?” yawän, umanä Peres yang inikin. <sup>30</sup> Tiwänä notnä trelu kätakngäne wamgut täpä mahande apgut. Tiwän umanä Sera yang inikin.

## 39

### *Josepkät Potipale mängätkätdäne wam*

<sup>1</sup> Josewu Ismaelde bapunätä Isip täke pukukin. Tiwän Isipde kingge kulänä äminde kuhiläle yiwäxaxu Potipa uläpätä Ismaelde bapunäle kätaxune uhikut.

<sup>2</sup> Josewu Yawetä gatängämixawän, puyä towikngäle yolune pahaxawänu, nomängän tikin. <sup>3</sup> Potipatä kaxawänu, Yawe Josepkät yiwixäwik gatängämixawän, puyä nomängän pahakut. <sup>4</sup> Tiwän Potipatä Josewu ilakngä hikngä kake, gatäkgatäkgäle tuwänguke, puyä äminä äwä hängäläpänä yangge kuhiläle yiwikge inikut.

<sup>5</sup> Täpduxu Potipatä Josepde puyä imikut gwenunetä, Yawetä Josepde natäke, Potipale hängäläpä bänip kwikwik yämikut. Potipale hängäläpä yolune nanä awä puyäne nanä yangu undä bänip kwikwik yämikut. <sup>6</sup> Tiwän hängä täpänä undä Josepdä daying yiwikge inikengu, Potipa dasingga donatäpget. Tike teyä “Naxu gätä hangamiyo,” yangu doinikut.

Josewu tänge täpä, nomnä yangu ilakngä hikngä yiwikut. <sup>7</sup> Womsim yiwihikangä, Potipale mängätdä Josep kambutake, “Ai, api pekata,” yang inikut.

<sup>8</sup> Iniwän Josepdä “U. Usingu dolahawit,” yake using inikut. “Natäpso. Kuhitnale yiwixakgä nandupän, nä ämin nomän, tiwän hängänä nätä undä daying yiwitde nanikut. Tikengä hängä täpänäle meyä dowänggaxunin. <sup>9</sup> Yolu anggwende kuhiläle yiwitde näkän tuwängukut. Tikengu “Hängä täkekän päke pahayo,” yake teyä, gäle usingu donanikut, inale gä mängätnä. Anätule kayine gutongä hikngä uläknga, dasing tahawitde yanggaläk?” yang inikut.

<sup>10</sup> Tiwändeyä mängälä uläpätä kwep äpman iniinilikut. Tiwän Josewu ‘Täke,’ yangu doyake, ile wäkngasimkäyä doxukut.

<sup>11</sup> Gwendune puyä äminu okopi doxoxawä, Josewu puyä pahawikge kopgut. <sup>12</sup> Tiwän Potipale mängätdä apu, täwikngäne tänggänggänuke, “Api pekata,” yang inikut. Inike, täwikngäkän täxawän, Josewu epu datäkukut.

<sup>13</sup> Täwikngäkän täxawän epu datäkuwän kakengä, <sup>14</sup> puyä äminä une pahakayingu yang yawämbän apä, kem wamu using yänikut. “Täwixu axwämbälu känong. Potipatä Hibru nanä ane täpä täkapu tekutdä tängänane wahike, mayakngä täknga nimikge tahawän, yangot. <sup>15</sup> Anggatängamingingge yangopa natake, täwikgnä nätä yiwilune teke, epu datäkuk,” yang yänikut, kemun.

<sup>16</sup> Yake Josepde täwixu teng yiwixawän, ayä une apän, <sup>17</sup> using inikut. “Puyä äminu Hibru nanä täpä täkapu tekuläkngä mayäkngä namikge tahak.

<sup>18</sup> Tiwändeyä anggatängamingingge yangopa, täwikngä nätä yiwilune teke, epu datäkuk,” yang inikut.

<sup>19</sup> “Puyä ämindatä näle using tahak,” yang iniwän, ayä tokngä hikngä natäpgut. <sup>20</sup> Natake, Potipatä Josewu kalabus yolu kingge puyä ämindä gutongä pahawä pexaying gwenune täku tekut.

Tiwändeyä Josewu kalabusune yiwixawänu, <sup>21</sup> Yawe ixät gatäke yiwixawik, ile nomän hikngä tahakut. Yawetä pahawän, kalabus ämin daying yiwixak täpätä Josewu ilakngä kakut. <sup>22</sup> Kake Josewu kalabus äminde kuhiläle tuwängukut. Tiwän kalabuskätanu inaka pahakinu, itä yäxawän pahakin. <sup>23</sup> Yawe Josepkät yiwike gatängämixawän, kalabuskätanu ina puyäka pahakulu nomängän tikin. Tiwän kalabus daying yiwixak täpätä puyä Josepde imikengu, meyä dowäkut.

## 40

### *Josepdä dambu tikindäne yäpulinä yakut*

<sup>1</sup> Josewu kalabusune yiwixawängän, täpduxu gwendune Isipde kingge wain pahake iminggak täpä äwä bret hängäminggak täpä yangu kingge kayine gutongä pahakumäläk. <sup>2</sup> Pahawät, Isipde kingu uläpäyatde tokngä hikngä natäpgut. <sup>3</sup> Tikengä kalabus yolu Josepdä yiwixak gwenunekän päku, kalabus daying yiwixaying äminde kuhiläle yolune pekin. <sup>4</sup> Tiwän kuhiläle yiwixak täpätä Josepde imän, daying yiwikut.

Kalabusune belakngä womdu yiwihikangä, <sup>5</sup> wain pahakakut täpä äwa bret hakakut täpä yangu dambu täpduxu inä unggwenunekän inäinä tikumäläk. Dambu ulikumäläxu yäpulinä inäinä.

<sup>6</sup> Kwepdatä tembänä Josepdä apungu, anatänatälike yiwixawät dayipgut. <sup>7</sup> Dayike “Gilu inale natänatälikamäläk?” yang yänikut.

<sup>8</sup> Yäniwän, “Nilu dambu inäinä dayimäk. Tiwändeyä dambu ulimäkge yäpuli nininangäsä äminu wenä,” yang inikumäläk.

Tiwän Josepdä “Dambule yäpuli Anätütäkän yäminggaxunin. Ge dambuhä undan yähon,” yang yänikut.

<sup>9</sup> Tiwän kingge wain pahakakut täpätä Josewu using inikut. “Dambu tängäne wainu täkngatu kat. <sup>10</sup> Wainu uläknga kätakngä täkngayalä täkngatu. Tiwän gwäkgwäkngäne salinä yupsänggän alaxäwik galaying. <sup>11</sup> Tiwän kingge käwu nätä tätnä, unggalayingunin päke sasapa, kingge käwune pukuwä, inäle imit,” yang inikut.

<sup>12</sup> Tiwän Josepdä “Dambu uläknga yäpuli using,” yake using inikut. “Katakngä täkngayalä täkngatu dayiläxu täpduxu gwenalä gwendu. <sup>13</sup> Täpduxu gwenalä gwendu yiwikengu, Gä kalabusde yiwiläxu, kinggä yawän epuxuwiläk. Tiwän puyä yakap pahakakuläk täknga hipdu äpme gamän, wainu pahaxäwik, kingge imiläk.

<sup>14</sup> “Gäle using tahawän kakengu, gätä näle butayä natäpso. Natäke, kingu ainiyo. Tiwän kalabusunetä napmambän epuxuwit. <sup>15</sup> Nä Hibrule kewunetä ämindäkän nanitäkäpgin. Ngä anexäyä gutongä täkngatu dolahakum. Tiwändeyä kalabusde yumdekän täkapu napmambä yiwixat,” yang inikut, Josepdän.

<sup>16</sup> Wain pahakakut täpäle dambu yawän natake, Josepdä yäpuli nomän hikngä iniwän kake, bret hakakut täpäxäyä Josewu using inikut. “Näxäyä dambu täkngatu using tit. Baskelu bretnänäxäyä gwenalä gwendu kuhitnane gwäpit. <sup>17</sup> Enetängä gwenune brelu inäinä kingge pä. Tiwändeyä anggwäpilune kwäwitdä apu päku naying,” yang yakut.

<sup>18</sup> Yawänä Josepdä natake “Dambu uläknga tiläxu yäpuli using. Baskelu gwenalä gwendu dayiläxu täpduxu gwenalä gwendu. <sup>19</sup> Täpduxu 3 gwenune kinggä yawän, kalabusunetä epuxuwi, guläkga pahandäkngake, däki täpäne täko mapä wukuwi, kwäwitdä gupda näning,” yang inikut.

<sup>20</sup> Täpduxu 3 unggwenu kinggä alakutde täpduk. Ge kinggä naxu puyä äminäle kuhiläle inulung hängyämikut. Tikengä wain pahakakut täpä äwä bret hakakut täpä yangu kalabusunetä pewän epuxuke, puyä äminu uläkwäke kayine kukumäläk. <sup>21</sup> Tiwän wain pahakakut täpä puyä tupä pahakakut using imän, kingge käwu hipdunä täke imikut. <sup>22</sup> Tiwänu bret hakakut täpä kinggä yawän, puyä äminätä täku, däki däkäne mapä pukukut. Hängä ulikulu inä dambu tike yawät, Josepdä yänikut using tikut.

<sup>23</sup> Tiwändeyä wain pahakakut täpä puyänä hipdu täkengu, Josepdä iniwän kakutde bulämnä hikngä natäpगत.

## 41

### *Josepdä kingge dambu yäpuli yakut*

<sup>1</sup> Krismasu gwenalä apuxuwänä, Isipde kingu dambu täkngatu using tikut. Yanggä Nail Dupine yiwike kaxawän, <sup>2</sup> towiyä gämänu 7 bulämbam, tiwän tänge ilakngäkän gwenggwenu yanggäxätandä akoxuke, songäsongä une nanä naxäwik yiwikin. <sup>3</sup> Tixawän towiyä gämänu tänge wenäxäyä 7 yanggäxätandä akoxuke, tänge käyä gwenggwendä yiwikinunekän päkapu yiwikin. <sup>4</sup> Tikengä tänge käyä gwenggwenu, tänge wenä uläkwäkgä apu yähake napulukin. Tiwän kingu unin kake naxälake enakut.

<sup>5</sup> Tikengä hipdu peke, dambu täkngatuxäyä using tikut. Wilu dupitunetäkän bulä inulungu 7 alake galakin. <sup>6</sup> Tiwän dupituxäyä bulä 7 alawä, gusitdä akonggakätandä wawuwawungu tokngä täkngatutä apu ihiwän, bulä mätekngä hikngä tikin. <sup>7</sup> Alake, wilu bulä inulung alakinu,

mäteknä alakindä guläk päkin. Tiwän kingu unin kake naxälake enake teyä, dambu tikutnä kakut.

<sup>8</sup> Tembänä enake, dambu ulikutde natänatälikut. Tikengä dambu natake yäpuli yäkaying äminunin äwä natändetdet ämin yang undä yawän apä, dambu tikulu yänikut. Tiwändeyä u yiwikinu täpätutä dambu ulikutde yäpuli donatake initagin.

<sup>9</sup> Tiwänä kingge wain pahanggak täpätä kingu using inikut. “King, gutongä tahakumu\* using ganiwit. <sup>10</sup> Gätä näxät bret pahanggak täpaxätde tokngä natake, kalabus daying yiwixayingge kuhiläle yolune kalabusde nipmakuläk. <sup>11</sup> Kupilä gwendune dambu inäinä tikumäk. Ulikumäxu yäpulinä inäinä. <sup>12</sup> King kang yiwixayingge kuhiläle puyä äminu wawakdäkä Hibru nanä täpätuxät yiwikumäng. Ngä dambu tikumäxunin inita natake, yäpuli inäinä ninikut. <sup>13</sup> Tiwän hängä itä ninikut using hikngä tikin. Nä puyäna hipdu namixäwik, bret hakakut täpä tänguwä kumgut,” yang inikut.

<sup>14</sup> Iniwän kinggä puyä äminä yäniwän, Josewu kalabusune yiwikulu yupsäng takapgin. Takapä kuhit dänggämnä äwä gen dänggämnä yang matake, täwixu käluk pahake, kingge kukut.

<sup>15</sup> Tiwänä kinggä Josewu using inikut. “Dambu takngatu titnä yäniwa, äminu täpätutäkänkäyä yäpuli donanik. Tike gäle using yaying. ‘Dambu iniwä natakenğu, yäpuli nomängän yänggaxunin,’ yang naniying,” yang inikut.

<sup>16</sup> Iniwän Josepdä kingu using inikut. “King, hängä uläknga nätä dola-hanggalunin. Tike gätä nataläxu, Anätutä äpme ganiwik,” yang inikut.

<sup>17</sup> Iniwän kinggä Josewu inikut. “Dambu tängäne using kat. Yanggä Nail Dupile kwayimune yiwike kaxawa, <sup>18</sup> towiyä gämänu 7 bulämbam, tiwän tänge ilakngäkän gwenggwenu yanggaxätandä akoxuke, songäsongä une nanä naxäwik yiwiying. <sup>19</sup> Tiwän ile mähene towiyä gämänu 7 tänge wenä, tiwän wäyi hikngä gwenggwenkäyä yanggaxätandä akoxuying. Isipde kewune towiyä gämänu usä bimä gwendunekänkäyä dohikngä dayipgum. <sup>20</sup> Akoxuke tänge wenä unggwenggwendä apu, tänge käyä yakap akoxuying yahake napuluying. <sup>21</sup> Tiwändeyä ämindä dayikengu, ‘Usingbä naying’ yangu natäpnangäsändo, inale tänge wenä. Tiwän yakap yiwiying usinggän yiwiying. Tiwän unin dayike enat.

<sup>22</sup> “Tikengä hipdu peke, dambu takngatuxäyä using tit. Wilu dupitunetäkän bulä inulungu 7 alake galaying. <sup>23</sup> Tiwän hipdu 7 alawä, gusitdä yähawän, mätekngä hikngä tiying. <sup>24</sup> Tike ako wilu inulung alayingu, mätekngä alayinggä guläk päying. Tiwän unin dayike enakengä, dambu natake yäpuli yäkaying äminunin yäniwa, täpätutäkänkäyä yäpuli donanik,” yang inikut.

<sup>25</sup> Tiwänä Josepdä kingu using inikut. “Dambu tiläxu usäkän, tiwän yäpuli takngatukän. Anätutä dasingga tahawikge natäxu, unin tahawän kaläk. <sup>26</sup> Towiyä gämänu nomänu 7 dayiläxu krismasu 7. Tiwän wilu bulä nomänu 7 dayiläkäyä krismasu 7. Dambu uläkngayalu usäkän, tiwän yäpuli buläkän. Naxu meyä äpme alaxawä, krismasu 7 apik.

<sup>27</sup> “Tiwän ile mähene towiyä gämänu tänge wenä, tiwän wäyi hikngä 7-u dayixawi akoyingkäyä, krismasu 7. Tiwän wilu gusitdä yähawän bulä 7-u wäyi alayingkäyä krismasu 7. Yäpulinä krismasu 7 nakge äpme dapmäke yiwitning.

\* **41:9:** Gutongä u tahakulu kingu Josepde tupä ininangäsä teyä doyakut.

<sup>28</sup> “Ayat usinggän Anätutä dasingga tahawikge natäxu, unin tahawän kaläk. <sup>29</sup> Isipkätanu naxu meyä hikngä alaxawä, krismasu 7 apik. <sup>30</sup> Tiwänä ile mähene nakge dapmäke yiwixawä, krismasu 7 apik. Apän Isipkätanu naxu meyä hikngä yakap alatningge äpme bulämdaning, inale naxu wenä hikngä tixawän, kep gomu wäyi tiwik. <sup>31</sup> Naxu wenä hikngä tiwän, naxu yakap alawä meyä näning gwenggwende äpme bulämdaning. <sup>32</sup> Anätutä dambu uläkngayat gamixu, yäpulinä buläkän usingge gamik. Inä Anätutä ‘Using hikngä tahawit,’ yangu anatakengä gamik. U natäk using hikngä tinanggenggak.

<sup>33</sup> “Ge äpmanu äminu natändetdetnä kayä, tiwän natändetdet wam yänggaxu täpätu tuwänguyo. Tiwän Isip kewu awomu itä kang yiwik. <sup>34</sup> Ile gepbine yiwitningge äminu täkwäkguxäyä tuwänguyo. Tiwän itä yiwike yäxawä, puyä pahaningune nanä undä, naxu 5 päningune nanä aupuke, 4 inäle pexäwik, 1-u puyä äminu uläkwäke yämixawä pening. <sup>35</sup> Krismasu naxu nomän alatning gwenggwenune nanä, wilu kingge umande päke, nak yolu taunune nanä gwengwenune mahande näningge peke daying yiwitning. <sup>36</sup> Naxu uläkwäxu mähande Isip nanätä takgä yiwixäwik päke näningge pening. Ge kantri awomu nakge dondapning,” yang yänikut, Josepdän.

<sup>37</sup> Josepdä wamu uläknganin yawän, kingkät puyä äminäxätdä natäpä, nomän tikut. <sup>38</sup> Tiwän kinggä puyä äminä using yänikut. “Anätule wawungu äminu aläpäle tängäne yiwixak bimä käyä? Ngä uläpä tuwängutnim,” yang yänikut.

<sup>39</sup> Tikengä kinggä Josewu using inikut. “Wamu uläknga yäläxu, Anätutä gäle gamän yänggaläk. Tiwän natändetdet äminu gä bimä täpätu wenä. <sup>40</sup> Ge gä kantrinale kuhiläle yiwiläk. Tiwän äminu undä gäle wam gwälamike yiwitning. Tiwändeyä nä king. Ile tiwän, näle kematde yiwiläk,” yang inikut.

#### *Josewu kinggä Isipde bulämbam täpäle yiwikge tuwängukut*

<sup>41</sup> Kinggä Josewu using inikut. “Nätä gä bulämbam täpäle tuwänguwa, Isip kewu undä awomunin kang yiwiläk,” yang inikut. <sup>42</sup> Inike ringu tuwängge matakinä kinggä kätakngäne täpän pukukulu utdoke, Josepde kätaxune täpän pukungämikut. Tiwänä hipdu täwixu kwikwikngätä bupginu belakngä kwämbätdu imän tahakut. Imän tahawänä, uhixu täkngatu goldä tahakinu Josepde guläxune mapän pukukut. <sup>43</sup> Tiwän kinggä Josewu äminbamde yakap täpäle tuwänguwän yiwikutde, kalisu kwämbätdu† imän, une päko yiwike kukut. Kuxawän kingge puyä äminätä yakap kuxäwik, “Kundäkngake yapmitnong,” yang yakin. Kinggä Josepde using pahakut. Tiwän Isipde bulämbam täpäle yiwikut.

<sup>44</sup> Tiwän kinggä Josewu using inikut. “Nä king. Tiwändeyä using yänggat. Isipkätanu inaka yumdekänu dowahaning. Tike gätä ‘Using pahanong,’ yang yäxawikänä, pahaning,” yang inike, <sup>45</sup> Josewu umanä käluk täknga Sapanet-Panea yang inikut. Tikengä Onde prisu‡ umanä Potipela, tiwän yäpanä umanä Asenat uläpä, kinggä Josepde imän, mängätnäle takut. Tikengä Isipde kewu undä tihikuke kakut.

<sup>46</sup> Josewu krismasnä 30 using yiwixawän, Isipde kinggä puyä bulämbam däkä yawän takut. Täke kingu teke, Isipde kewu undä tihikuke kakut.

† **41:43:** Täpduxu uwomune kalisu hosdä tulipäke tihikukakin. ‡ **41:45:** Onu miti yolu gwendule uman. Miti yolu unggwenune Isip nanätä tumuxu gusitde yäkakin.

<sup>47</sup> “Krismasu 7 naxu meyä alatning,” yakut using, krismasu unggwenggwenu naxu meyä hikngä alakin. <sup>48</sup> Isipkätanu naxu meyä alakin gwenggwenu Josepdä yawän, naxu undä taunu yiwixayingune äpmele inäinä petäke kukin. Naxu puyä taun kwayimune pahakinunin päxäwik, päku yämixawä, nak yolu taunune nanä gwenggwenu petäke kukin. <sup>49</sup> Wilu duksäng päkapu pexawä, meyä hikngä haluhalu yanggä gwenu nanä bimä tikut. Tinggawän axendekinu kendetnangasändo tiwän, undan tekin.

<sup>50</sup> Krismasu nakge dapningge gwenggwenu doapuxawän, Josepde mängälu Asenat, Onde prisu Potipelale yäpatä wawakngä täpälä dukngikut. <sup>51</sup> Tiwän Josepdä “Anätutä gatängamän, meyä apgin äwä yotna nanä yangge ambulämdat,” yake, engangä yakäp täpä umanä Manase yang inikut. <sup>52</sup> Tikengä wawakngä maha täpä “Äminde kewune meyä bulak yiwit deyä, Anätutä tahawän, engangu towikggat,” yake, umanä Epraim yang inikut.

<sup>53</sup> Naxu meyä alakinu äalaxawäkän, krismasu 7 apuxuwän pulukut. <sup>54</sup> Josepdä “Krismasu 7 nakge dapning” yakut using, krismasu yakap gwenu une apän, kepkewu sänesäneka yiwihikukayingu nakge undä dapgin. Tiwändeyä Isipkätanu naxu käyä tikut. <sup>55</sup> Yiwihikangä Isip nanäxäyä nakge dapmäke, ku kingu nakngäle inikin. Tiwän kinggä using yänikut. “Josepde kuwä, itä dasingga pahaningge daniwänu, using pahanong,” yang yänikut.

<sup>56</sup> Nakgäne täknga, kantri Isiwu undä gwen dapgin. Tiwänä Josepdä yolu wit pekin gwenggwenu yämä siwän, Isip nanätä apu, naxu moninggä uhikin, inale Isipkätanu naxu wenä hikngä tikut. <sup>57</sup> Kewu undä gwen naxu wenä hikngä tiwän, Isipgän apu, wilu Josepde tängäne moninggä uhikin.

## 42

### *Josepde payänä täkwäxu Isip kukin*

<sup>1</sup> “Isipkätanu wilu käyä,” yawä natake, Jekopdä wawakngä yänikut. “Ginu ina nänimde nakge wamu doyake yiwixaying? <sup>2</sup> Isipkätanu wilu käyä yawäxakum. Ge une puku uhike päkakopnong. Tiwän unin nakengu, doxumnim,” yang yänikut.

<sup>3</sup> Tiwän Josepde payänä 10 täkwäkgäkän wit uhiningge Isip pukukin. <sup>4</sup> Tiwändeyä Josepde ulawu Bensaminu “Täke kuwä tängutnäng,” yake, nanätä äinindäkngakut. <sup>5</sup> Äminu nakge dapmäke, wit uhiningge kuxawä, Israelde wawakäyä pukukin, inale Kenankätänkäyä naxu wenä tikut.

<sup>6</sup> Isip kepkatanu Josewu kuhiläle yiwixawän, äminbamdä wilu ile tängäne apu uhixäwik, päke kukin. Tixawän payänäxäyä wit päningge apuke, Josepde nomune sopäsopä puke, däme päpu, kewune yamgin. <sup>7</sup> Axuwä Josepdä dayikengu, “Payäna,” yangu anatäpगत. Tike teyä “Womdune nanä yäning,” yake, “Ginu sänetä apukaying?” yangu kitokngäkän yänikut.

Tiwän “Ninu Kenandä nak uhinimde apumäng,” yang inikin.

<sup>8</sup> Josepdä dayike, “Payäna,” yangu anatäpän deyä, payänä täkwäkgä “Äminu aläpä, Josepbä,” yangu donatäpgin. <sup>9</sup> Tixawänu dambu yakap tike dayipgut täkngale une natäpän kukut. Tiwän “Ginu amäk tahanangge wepdä apuke nindutapningge apuying. ‘Isipde yolu womduyi dämanu wenämbä,’ yang yake katapningge apuying,” yang yänikut.

<sup>10</sup> Yäniwän, payänätä “O bulämbam täpänin, usinggendo. Tike nak uhinimde apumäng. <sup>11</sup> Ninu täpätule wawakgän. Tiwän wamu hiyäkängän yäkamängunin. Ninu wepdä apuke dandutapnimde doapumäng,” yang inikin.



<sup>12</sup> Iniwä Josepdä “Ginu kem yäkaying. ‘Isipde yolu womduyi dämänu wenämbä,’ yang yake katapningge apuying,” yang yänikut.\*

<sup>13</sup> Tiwänä yäkwäle wamu using inikin. “Ninu Kenan yiwixamangunin. Tiwän ninu täpätule wawakgän. Nanindä ulapninu täpäyaläxät towikut. Tiwän ninu unekänu <sup>12</sup>. Tiwändeyä ulapninu täpätu wenä. Tike wasekngä täpä naninkät yiwixawät apgumäng,” yang inikin.

<sup>14</sup> Tiwän Josepdä using yänikut. “Ginu wepdä apuke, nindutapningge apuying yangu andanit. <sup>15</sup> Hiyäkändembä yäkayingge using tahake dandupit. Ane yiwixawäkän, ulapsä wasekngä täpä apik. Tike doapanu, kingu käluk yiwixakge umande, wamu kitokngä yänggat. Yolu awomu doleke kuning. <sup>16</sup> Ginu undä kalabusune pexawä, täpätutäkän ku ulapsä takapsok. Tiwänä wamu hiyäkände yaying yangu natäpit. Tike wenä tiwänu, kingu käluk yiwixakge umande yänggat. Ginu wepdä apuke, nindutapningge apuying yang natäpit,” yang yänikut. <sup>17</sup> Yake kalabus yolune päku pewän yiwixawä, täpduxu gwenälä gwendu tukwake kwakakut.

<sup>18</sup> Täpduxu 3 gwenune Josepdä using yänikut. “Nä Anätule anaxaläkgalunin. Ge nätä daniwit using tahakengu, doxumning. <sup>19</sup> Ginu hiyäkändekän yäkayingä kakengu, notsä täpätu kalabus yolune tewä yiwixawän, täkwäkgutäkän wilu yotsäle päke kunong, inale notsäbamu takgä yiwayak. <sup>20</sup> Tiwändeyä ulapsa wasekngä uläpähimu aläkapä kayot. Tikengä wamu hiyäkände yakinä tinggak yangu natake, doyäwa dahipning,” yang yäniwän, “Uyänggaläk usingu äpme tahanim,” yang inikin.

<sup>21</sup> Tikengä inäkänu using yiwikyakin. “Ulapnin tahana malikutde, äpmanu meyä nihä päkamäng. Kwänämkat tixäwik ‘Manutnong,’ yang yakwakäxawängän, tahana malikut. Itä päkut bimä, meyä nihä päkamäng,” yang yakin.

<sup>22</sup> Yawä Rubendä yänikut. “Nätä dasing danikum? ‘Josewu dolahana maliwik,’ yangu andanixawayä tahawäxakum. Unin tängutna kumgutde, ile yäkwäle taknga Anätutä meyä unin nimminggak,” yang yänikut.

<sup>23</sup> Josewu Isip wam yäxawän, puyä äminä täpätutä Hibru wamune päpän täkwaxawä, yänikut. Tiwän “Nihä wamu u yamängu dombä natäk,” yang natäpgin. Tiwändeyä wamu yakinu Josewu anatäpगत. <sup>24</sup> Unin yawä natake, Josewu kepmän täpu kwänämnä tiwän takawänä, hipdu ako wamu yänikut. Tikengä puyä äminä yäniwän, Simion tänggänggänuke, bälängä äwä kätakngä yangu, notnä axang yiwixawäkän, napdä wamgin.

<sup>25</sup> Tikengä Josepdä puyä äminä wepdäkän using yänikut. “Wit äwä naxu kahitde näningge yang inäinä kekngälukyäminong. Tikengä moningä inä päkapginu, wit kekngälutningunekän inäinä kekngälukyäminong,” yang yäniwän, inä u yänikut using kekngälukyämikin.

<sup>26</sup> Tiwäna yäkngä donggi päkapu pekinune päko peke, päke kukin. <sup>27</sup> Axuxawä tukwawän, awetningge yiwikin womune, notnä täpätutä dongginäle nak imikge yäkngäxätan sikengu, moningä hipdu yäkngäxätan kekngälukinä kakut. <sup>28</sup> Kake “Mäte kanong. Nä moninga hipdu yäkngäxätan kekngäluyingä tinggak,” yang yänikut.

Yäniwän meyä hikngä natäxäwik, kwätälä yamuxawä, kawäkawän tahake, “Anätutä awomu dasingge tahanggak?” yang yakin.

<sup>29</sup> Tikengä ko nanä Jekowu Kenan yiwixawän, hängä Isip kuwä, dasingga pahakinu undä inikin. <sup>30</sup> Using inikin. “Isip kewu uwomde kuhiläle yiwixak

\* **42:12:** Josepdä payänä wamu kitokngä hikngä yänikulu, “‘Ulapnin pahana malikutde, meyä aläknga apunggak,’ yang natäkengu, bäniyä äpmebä täpä täkwämbik?” yang natake yänikut.

täpätä ‘Ginu amäk tahanangge wepdä apuke nindutapningge apuying,’ yang ninike, kitokngäkän ninikut. <sup>31</sup> Tiwän nindä using inikumäng. ‘Ninu wamu hiyäkängän yäkamängunin. Wepdä apuke dandutapnimde doapumäng. <sup>32</sup> Ninu Kenan yiwixamängunin. Tiwän ninu täpätule wawakgän. Nanindä ulapninu täpöyaläxät towikut. Tiwän ninu unekänu 12. Tiwändeyä ulapninu täpätu wenä. Tike wasekngä täpä naninkät yiwixawät, teke apgumäng,’ yang inikumäng.

<sup>33</sup> “Tiwän kuhiläle yiwixak täpätä using ninikut. ‘Using tahawäyä, ginu hiyäkängän yäkaying äminunin yang natäpit. Notsä täpätu ane tewä yiwixawän, täkwäkgutäkän wilu yotsäle päke kunong, inale notsäbamu takgä yiwayak. <sup>34</sup> Tiwändeyä ulapsä wasekngä uläpähimu aläkapnong. Tiwän kawit. Kakengä ginu wepdä apuke nindutapningge doapuying, tike wamu hiyäkängän yäkaying äminunin, yang natäpit. Tikengä notsä ane yiwik täpä hipdu damit. Tiwän Isip kewu awomune täkekän tihikuning,’ yang ninikut,” yang inikin, nanän, Jekowun.

<sup>35</sup> Naxu päkinunin wälixäwixu, moningä wit uhiningge päke kukinu hipdu yäkmäteknegäne inäinä kekngälukyämikinä dayipgin. Unin dayikengu, wawakngäxät nanäxät naxälakin. <sup>36</sup> Tiwän nanätä using yänikut. “Gindä pahawä, enganga täpöyalätä hikngä hopikamäläk. Josewu hopikutnä äwä Simionkäyä hopinggak. Tiwän Bensaminkäyä täke kuningge yäkaying? Gindä tahaxäwik, meyä däkä namikaying,” yang yänikut.

<sup>37</sup> Yäniwän Rubendä nanä using inikut. “Bensaminu kätakngane teyo. Tiwän täke kuke, hipdu täkapit. Tike doläkapa kakengu, nina wawaxu uläpöyalu yäkwäle täke sipi kumsimäläk,” yang inikut.

<sup>38</sup> Iniwän nanätä using yakut. “Reseldä dukngikulu wawaknga uläpä ginkälu dowukuning, inale payänä axumgut, tiwän aläpähimdäkän yiwixak. Tiwän nä äminäläke alit. Ge axuxawä, kahit täpäne meyä täkngatu ile apänu, nä butayä täknga naminingunin. Tiwän nä butayä uläkngatä nuwän kupilunin,” yang yänikut.

## 43

### *Josepde notnä hipdunä Isip kukin*

<sup>1</sup> Kenan kepkatänu naxu wenä hikngä tikut. <sup>2</sup> Tiwän wilu Isipdä päkakopginu änänggäwä puluwän, Jekopdä wawakngä using yänikut. “Hipdu puku, naxu uhike päkakopnong,” yang yänikut.

<sup>3</sup> Tiwänä Judatä nanä using inikut. “Äminu bulämbamu uläpätä yäko wamu using ninikut. ‘Ulapsä doläkapningä kakengu, ginde nomu dohikngä dandupit,’ yang ninikut. <sup>4</sup> Ge gätä täke yawi, ulapninkät pukukengu, naxu äpme uhike päkakopnim. <sup>5</sup> Tike ‘Ulapsä mäläke pukunong,’ yawi, ninu dowukunim, inale ‘Ulapsä doläkapningä kakengu, ginde nomu dohikngä dandupit,’ yang ninikut,” yang inikut, nanän.

<sup>6</sup> Tiwänä Israeldä using yänikut. “Äminu bulämbamu uläpä ‘Ulapninu täpätu käyä’ yangu inale inikin? Using inikinde, meyä täknga namikaying,” yang yänikut.

<sup>7</sup> Yäniwänä wawakngatä using inikin. “Äminu uläpätä nihäle äwä ninkät nanäle ninikwayikut. ‘Nansä undan yiwixak?’ yake, ‘Äwä notsä täpätu käyä?’ yang ninikwayikut. Tiwän ‘“Ulapsä aläkepnong,” yang niniyäk,’ yangu donatäxäwik, yäkwäle wamu ‘Hii, käyä,’ yang inikumäng,” yang yakin.

<sup>8</sup> Tiwänä Judatä nanä using inikut. “Iniwi, näle apän, yupsäng pukuna. Ge nak päkakopna nake, nin, gika, äwä wawakdäkänin yangu doxumnim. <sup>9</sup> Wamu kitokngä using yänggat. Bensaminu nina äpme kang yiwit. Nätä ane gäle doläkapukengu, gutongä nätä gäle tahawit. Ge gutongä u tahawit täkngale, meyä täknga täke namiläk. Tiwän yiwikyiwiknga yiwilune, nina iwikge äpme päng yiwit. <sup>10</sup> Gätä ‘Täke,’ yawi tupä pukukumäng gämu, awukuke akoke, hipduxäyä awukuke akopnam,” yang inikut, Judatän.

<sup>11</sup> Tiwänä Israeldä using yänikut. “Using tiwänu, using tahanong. Hängä gwälamgwälamu kewu awomune nanä yäksäne kekngäluke pänong. Ge bänip gwalängge, äminu uläpäle unin imining. Pa inuxu kápängä gwälam, ingutbamdäne yanggäyi, äwä pa salinu anäkoyingu kutan bimä unin yang pänong. <sup>12</sup> Tikengä, moningu yakap päke kuwä ambäwäpahoke kengalutdamä päkapginkät, käluk päningkät unekän peke, <sup>13</sup> ulapsäxät täpä päke, äminu uläpäle yupsäng pukunong. <sup>14</sup> Anätu Kitokngänä Käyä Täpätä tahawän, äminu uläpätä ginde butayä natake pewän, Simionkät Bensaminkälu päkapnong. Dasingga? Wawaknga wenä tiwänu, undanä. Butayä täkngane yiwixawit,” yang yakut.

<sup>15</sup> Tiwänä Israelde wawaxu moning, bänip gwalängge hängä, äwä Bensamin yang päke, Isip pukukin. Päpu, Josepde kayine yiwikin. <sup>16</sup> Tiwän Josepdä Bensamin kake, puyä äminäle kuhitde yiwixak täpä using inikut. “Äminu aläkwäxu yotnane yänipäku peyo. Tikengä kälawu gwendü tänguke hanggayo. Ge nätä kepmä wom apa, naxu ixät nänim,” yang inikut.

<sup>17</sup> Tiwänä Josepdä inikut using, äminu uläkwäxu Josepde yolune yänipäke kukut. <sup>18</sup> Josepde yolune päke kuxawän naxälaxäwik, using natäpgin. “Yakap apna, moningu yäknginune kekngäluknimä päke kukumängge natake tahanggak. Ge anihpämäke, puyä äminäle päke pewän pahaxätna, dongginin päpikge tahanggak,” yang yaxäwik naxälakin.

<sup>19</sup> Tikengä Josepde yolune yämä däkäne täku, puyä äminäle kuhiläle yiwixak täpä using inikin. <sup>20</sup> “O, hiyäkän hikngä, bulämbam täpä. Yakawu ninu naxu ane uhinimde epgumäng. <sup>21</sup> Ngä axuxätna tukwawän awetnimde yiwikumäng womune yäkngin sikengu, moningu inä awäkumäng usinggän inäinä yäknginde mawune dayipgumäng. Ge hipdunin päkapukamäng. <sup>22</sup> Moningu kälukäyä nak uhinimde awämäng. Tiwändeyä moningu äminu uläpätä hikngä kengäluknimik yangu donatapgumäng,” yang inikin.

<sup>23</sup> Yawä “Täke un. Manaxälatnong, inale moningsä awäkum. Tiwändeyä Anätuhä, nansäle Anätutä hikngä hängä gwälamu yäksäne damikutnä tiwänak,” yang yänikut. Tikengä Simionu yawän, ku notnäle täkapgin.

<sup>24</sup> Tiwän Josepde yolune päke koke, yanggä bälängä hälutningge yämike, dongginäle naxu yämikut. <sup>25</sup> Tiwän naxu une näning yang yawän kakinde, bänip gwalängge päkinu, Josepde kepmä wom apän iminingge tändäkngakin.

<sup>26</sup> Tiwänä Josewu yolune apän, hängäläpä tändäkngakinu imike, sopäsopä puke, dämä kep däkäne päpu yangin. <sup>27</sup> Tiwänä Josepdä using yänikut. “Ginu iwalu dolike apuying? Nansä äminäläke yawäxakumu uläpä dasing? Täkekän yiwänak?” yang yäniwän <sup>28</sup> yäkwäle wamu using inikin. “Naninu gäle gepbine yiwixak täpä täkekän yiwänak,” yang inike, “Äminu aläpä bulämbam täpä,” yang natake, sopäsopä hipdu puke, dämä kep däkäne päpu yangin.

<sup>29</sup> Tiwän dayitake kukengä, inä mingäle wawaxu Bensamin kake, using yänikut. “Ulapsä wasekngä täpä yawäxakumu, unin an?” yang yänikengä,

Bensaminu using inikut. “Wawaknga, Anätutä gäle gwälam hikngä tahaxawän yiwitake kuyo,” yang inikut.

<sup>30</sup> Ulapnä Bensamin kawän, butayä hikngä tiwän, yupsäng hikngä peke, epu täku, yotnä inä yiwixakätan kohopike, kwänämnä tikut. <sup>31</sup> Tikyiwihikangä, kayi yanggänä yanggätä pahawän kuwä, apu dolikut wälä däknge, puyä äminä “Naxu sixut,” yang yänikut.

<sup>32</sup> Tiwänä sike, Josepde gwenu inätä imike, notnä täkwäke inätä yämike, Isip nanä Josepde yolune nakayingu inätä sikyämikin. Isip nanätä naxu Hibrü nanäxät näningge mähe hikngä natäxakin. Ge unekänu nänangäsändo. Ile tiwän inäinä sikyämikin. <sup>33</sup> Notnä uläkwäxu alakin using, yakap täpänetä ku waseknge täpäne yäxawä, yiwitake kukin. Yiwitake kuwä, “Krismasninu ämbä natäxak?” yake, kawäkawän tahakin. <sup>34</sup> Naxu sikyämikinu, päyänä täkwäke inäinä yämikin. Tike teyä Bensaminde sikin gwenu, äminu 5-dä nänangäsä gwen sikin. Naxu naxälä näxäwik, wainkäyä naxälä tängopgin\*. Tixäwik Josepkät kuläkake yiwikin.

## 44

### *Josepde käwu ahopikut*

<sup>1</sup> Naxu napä puluwänä, Josepdä puyä äminäle kuhitde yiwixak täpä wepdäkän using inikut. “Naxu yäknge meyä kekngälukyämi dopäyä, moningäxäyä yäk mawu inäinäne kekngälukyämiyo. <sup>2</sup> Tikengä silwa kápna ulapnä waseknge täpäle yäk mawune moningu wit uhiwikge päkapgutkät kekngälukngämiyo,” yawän, inä Josepdä yakut using tahakut.

<sup>3</sup> Kwepdätä tembänä hikngä gusilu akoxawän, Josepde puyä ämindä yäning yäpiwä, dongginä päke kukin. <sup>4</sup> Taun teke kuwä, belakngä dolixawän, Josepdä puyä äminä inikut. “Äminu uläkwäxu yupsäng yäwaläke ku pänggänggänuke, using yäniyo. ‘Nindä ginde nomän tahana teyä, gindä ninde wäyi hikngä täknge inale hikngä tahaying? Bulämbam täpänale käwu kukäle inale täying? <sup>5</sup> Käwu unggomune tängoxäwik, natändetdelu wepdä yiwixayingkäyä unggomune päxäwik yatapmänggaxunin. Ginu wäyi hikngä tahaying,’ yang yäniyo,” yang inikut.

<sup>6</sup> Tiwän ku pänggänggänuke, wamu Josepdä yakut using yänikut. <sup>7</sup> Tiwänä using yakin. “O bulämbam täpä, dasingge hikngä natäke nininggaläk? Ninu hiyäkän hikngä yäkamäng. Usingu dohikngä tahamäng. <sup>8</sup> Moningu yäkniginune dayipgumängu, Kenandä hipdu äwäkapna dayipguläk. Ge ‘Silva bä gol kukäle päying,’ yangu inale natäke nininggaläk? <sup>9</sup> Ninu apumängu äminu täpätutä täknge kakengu, täke tänguwä kungäxawän, äwä ninu dolämängu puyä ämin moyoyikale yiwitnim,” yang inikin.

<sup>10</sup> “Täke un. U yäkaying using tiwik. Imindäka täknge kakengu, uläpä näle puyä ämin moyoyi däkngeaxawän, ginu täkwäku meyä dowäning,” yang yänikut. <sup>11</sup> Yang yäniwän, yäknge inäinä kewune yupsäng päkepu peke sikin. <sup>12</sup> Sixawä Josepde puyä ämindä dayitake kukut. Payänäle yäxunetä dayitake kuhikangu, káp gomü Bensaminde yäxune kakut. <sup>13</sup> Tiwän unin kake, meyä hikngä natäke, inä täwik wehekin. Tikengä yäknge donggi tängäne päko peke, hipdu taunde kukin.

<sup>14</sup> Josewu yotnäne yiwixawän, Judaxät notnä täkwäkalu “Asing tahana, ninde butayä äpmembä natäpik,” yake okopi päko, Josepde kayine pimakin.

\* **43:34:** Naxu bulämbam hängakakin gwengwenune wainkäyä alängokakin.

<sup>15</sup> Tiwänä Josepdä using yänikut. “Ginu kápna kukäle inale täying? ‘Natändetdelu wepdä yiwixayingunin yatäpmänggaxunin,’ yangu donatake tahaying?” yang yänikut.

<sup>16</sup> Yäniwän, Judatä yäkwäle wamu using inikut. “O bulämbam täpänin, ‘Gutongä dolahamäng,’ yangu dasing ganinim? Anätutä wäyininu aläpän tapmäk. Nin äwä káp täkngä kaying täpä yangu undä puyä ämin moyoyika däknganim,” yang inikut.

<sup>17</sup> Tiwänä Josepdä using yakut. “Usingu dohikngä pewa pahaning. Kápna kukäle täk täpätäkän näle puyä ämin moyoyi däkngake yiwixawän, ginu nansäle bänip kwikwik täkngane kunong,” yang yänikut.

### *Judatä ulapnä gatängämikge yakut*

<sup>18</sup> Tiwän Judatä täku, Josepdä yiwikulune inälängän yiwike, using inikut. “O bulämbam täpänin, wamu takembä ganiwit? Kingkät gäxälu bulämbam täpäyat. Usäkän. Tike nä puyä ämindatä yäwa, tokngä manatängamiyo.

<sup>19</sup> Tupä ninu using ninikuläk. ‘Ginu nansä ayiwänak? Tiwän notsä täpätu käyä?’ yang niniwi, <sup>20</sup> nindä using ganikumäng. ‘Hii, naninu äminäläke alikengä, ulapninu wasekngä täpä towikut. Ngä undan yiwälak. Mingätä wäwi täpäyaläkän dukngikut. Dukngikutnä payänä axumgut. Tixawän wawakngä wasekngä täpätäkän yiwixak. Uläpä naninde bänip,’ yang ganikumäng.

<sup>21</sup> “Tiwän gätä using ninikuläk. ‘Aläkepnong tiwän käwit,’ yang niniwi, <sup>22</sup> nindä using ganikumäng, o bulämbam täpänin. ‘Wawakdäkä uläpä nanä teke epnangäsändo, inale aleke epänu, nanä axupixunin,’ yang ganikumäng.

<sup>23</sup> “Tiwändeyä gätä puyä äminda using ninikuläk. ‘Ulapsä wasekngä täpä doläkepä, ginde nomu hipdu dondandupit,’ yang ninikuläk. <sup>24</sup> Tiwänä naninde hipdu kokengu, wamu uninikuläk usinggän inikumäng.

<sup>25</sup> “Tiwänä nandä using yakut. ‘Hipdu puku naxu uhinong,’ yang niniwän, <sup>26</sup> nindä using yakumäng. ‘Ninu dowukunim, inale ulapninu wasekngä täpaxälu dowukuna, äminu uläpätä ninde nomu dohikngä nindupikge yakut. Tike ulapninu aapänu, take äpme pukunim,’ yang inikumäng.

<sup>27</sup> “Tiwänä nanindä using ninikut. ‘Ginu anatäxaying. Mängätnatä wawakngä täpäyaläkän hikngä dukngikut. <sup>28</sup> Täpätu ahopikut. Tiwän nä doxakum. Dasingga? Kälap tukgämbä tänguke yahandekin? <sup>29</sup> Tiwän äpmanu aläpaxäyä aläke kunggäwä, kahit bänäkängän meyä päpänu, gindä näle butayä bulämbam hikngä naminingunin. Nä äminäläke alit. Ge nä butayä uläkngatä nuwän kupilunin,’ yang ninikut.

<sup>30-31</sup> “Bulämbam täpä, nana wawakdäkä aläpä näxälu doxuta kakengu, axupixunin, inale wawakdäkä aläpä nandäne bäniyä hikngä. Naninu äminäläke hikngä damänsimu alik. Ge wawakdäkä aläpä ninkälu hipdu doxuna, nindä naninde butayä bulämbam hikngä iminimunin, tiwänu axupixunin. <sup>32</sup> Tiwänä unetäkänu, nätä wamu kitokngä hikngä täkngatu nanu using inikum. ‘Bensaminu nina äpme kang yiwit. Ge doläkapukengu, täpduk täpduxu yiwilu, meyä uläkngä ninalekän yiwik,’ yang inikum.

<sup>33</sup> “Ge using kakengu, nä Bensaminde tangge takembä gäle puyä ämin moyoyikale ane yiwixawa, wawakdäkä aläpä payänä täkwäkät hipdu kopning? <sup>34</sup> Tike wawakdäkä aläpä doxuwänu, nä nanale hipdu doxuwit, inale meyä nanale apik täknga kawitde mähe natäxat,” yang inikut, Judatän.

## 45

*Josepdä inäle yatapgut*

<sup>1</sup> Josewu butayä hikngä natake, kwänäm titnangäsä hikngä tikin. Tiwän puyä äminä Isip nanä “Ginu undä hikngä yolu anggweni teke epuxunong,” yang yänikut. Inale puyä äminä une yiwixawä, notnä “Nä Josep,” yang yäniwikge donatäpgut. Tike inäkän yiwixawäyä yäniwikge natäput. <sup>2</sup> Ge puyä äminu teke epuxawäyä, Josewu kwänämu bulämbam hikngä yangotixawän, Isip nanä natäxawä, kingge yolune yiwäxaying äminkäyä “Josewu using tik,” yang ku yawä natäpgin.

<sup>3</sup> Tixawänä Josepdä notnä täkwäxu “Nä Josep. Nana undan ayiwänak?” yang yänikut. Tiwänä notnä täkwäxu anaxälake, yäkwäle wamu doinikin.

<sup>4</sup> Tiwänä Josepdä notnä using yänikut. “Ane inälängän hikngä apnong,” yawän, apgin. Tiwänä using yänikut. “Nä notsä Josep, tupä gindä Isip nanäle yämä uhikinunin. <sup>5</sup> Tiwändeyä äpmanu näle u tahakinde, bänipsäxätanu meyä mawänong. Bä tokngä täkngatu gihäle manatäpnong. Inale Anätutä ämin gatangyämikge natake tewän, nätä gämäxu apgum. <sup>6</sup> Nak takgä yiwixätna, krismasu gwenalä apuxunggak. Tiwän nak puyä dowahake dowäke, krismasu 5-käyä äpme yiwitnim. <sup>7</sup> Anätutä kahitnä inätä hikngä täkngatune gatängdamän, gindä yiwike, bapuha mahande sakngälawikge natake tewän, nätä gämäxu apgum.

<sup>8</sup> “Nä yolu awomune gindä dolahawä apgum. Tike Anätutä tewän apgum. Tiwänä Anätutä napmämbän, Isipde kingge natändetdet inixäwik, kingge yolune yiwixaying äminunin dayingyiwäxäwik, Isipde kuhiläle yiwixat.

<sup>9</sup> Ge ginu yupsäng ko, nana using ininong. ‘Nä Josep dika wawakgä wamu aläknga tewa apunggak. Anätutä tahawän Isip kewu awomde bulämbam täpäle yiwixat. Ge mayiwiyo. Tike näle yupsäng hikngä epso. <sup>10</sup> Päkepu nina wäkngasim, distrik Gosenu kewu uwomune yiwiläk. Ge wawakga, bapuka, towiyä gämända, sipsipda, hängä täpäka yangu ane päkepu peke yiwiläk. <sup>11</sup> Äminbamu undä nakge dapmäxawä, krismasu 5 apixunin. Ge ane epnong. Tiwän nätä dandung yiwit. Tike dondanduyiwa, ginu undä nakge dapnäng,’ yak wawakga Josepdän,’ yang ininong.

<sup>12</sup> “Nä Josepdä daninggat. Ginu undä nä nandukengu, anatäpnangäsä. Bensamin, gä ulapna hikngä. Gäxäyä näle anatäpnangäsä. <sup>13</sup> Ge ko nana ahikngä ininong. ‘Josewu kantili Isipkätanu, umanä bulämbam hikngä,’ yang inike, hängä ane inaka dayiyinggexät inike, yupsäng täkepnong,” yang yänikut.

<sup>14</sup> Yänikengä Bensaminu täku betake, kwänämu initikut. Tiwän yäkwälaxäyä Bensaminä betaxäwik initikut. <sup>15</sup> Tiwän Josepdä notnä undä yänitixäwik, kis pahangyämitage kukut. Tiwänä notnätä wamu une inikin.

<sup>16</sup> Tiwänä “Josepde notnä aapuying,” yangu kingge yolune yatäke kuwä natake, king äwä puyä äminäle kuhiläle yiwixaying yanggä täke hikngä natäpgin. <sup>17</sup> Tiwänä kinggä Josewu using inikut. “Notda using yäniyo. ‘Wilu donggihäne päko peke, Kenande hipdu kunong. <sup>18</sup> Ku nansä, gihäxät nanä yangu undä ane näle päkapnong. Tiwän Isipde kewu nomän hikngä womdu dama, une yiwitning. Yiwike pahawä, naxu nomängän alaxawä päke näning,’ yang yäniyo.”

<sup>19</sup> “Yänike unetäkänu using tahananinge yäniyo. ‘Engangsä, mängätsä, nansä yang päkapningge, kalbimä bulämbamu Isip nanätäne gwenduyi päke kunong. <sup>20</sup> Hängä täpähäle manatäpnong, inale hängä Isip nanä gwälamgwälamu äpme damit,’ yang yäniyo,” yang inikut, kinggän.

<sup>21</sup> Tiwänä Israelde wawaxu using tahakin. Kinggä yakut using, Josepdä notnäle kal bimä bulämbamu gwenduyi yämike, naxu kahitde näninggexät yämikut. <sup>22</sup> Unetäkänu täwik käluxu notnäle kwämbätdu kwämbätdu yämikut. Tikengä Bensaminde täwik käluxu 5 äwä moningu 300 silwa yang imikut. <sup>23</sup> Tike nanäle päku iminingge using pekut: Hängä gwälamgwälamu Isip nanä donggi 10-une päko peke, donggixät inäle pengämikut. Tikengä wit, bret, äwä naxu kahitde näpikge yangu donggi mängälä 10-une päko peke, donggixät inäle pengämikut. <sup>24</sup> Pengämike notnä yäning yäpiwän kunningge tahaxawä, using yänikut. “Kahit täpäne tākungu, mayanganinong,” yang yänikut.

<sup>25</sup> Tiwänä notnä täkwäxu Isip teke, nanä Jekopde Kenan kopgin. <sup>26</sup> Ko nanä using inikin. “Josewu doxungut. Ayiwäxak. Tiwän unetäkänu äpmanu Isipde kuhiläle yiwäxak,” yang inikin. Unin yawä, hatnäxäwik, “Hiyäkän yäkaying,” yangu donatäpğut. <sup>27</sup> Tiwän wamu Josepdä u yänikulu undä inikin. Tiwänä kalbimä bulämbamu Josepdä yämikut gwengwenunin dayike, nanäle bäniwu tangäne yiwikut.

<sup>28</sup> Tikengä using yakut. “Hiyäkände hikngä. Wawaknga Josewu ayiwäxak. Ge pukuke kakengä kupit,” yang yakut.

## 46

### *Jekowu Isip kukut*

<sup>1</sup> Tiwän Israelu hängä täpänä undä päke, yotnä teke kukut. Kuhikangä Berseba kundopğut. Une kundoke, nanäle Anätunäle kälawu sipmäke hawän yähäkukin.

<sup>2</sup> Tiwän kupiläne Anätutä tahawän, dambu bimä tikut. Tixawän Anätutä “Jekop, Jekop” yang iniwän, Israeldä “We! Nä ane,” yang inikut.

<sup>3</sup> Iniwän Anätutä using yakut. “Nä Anätu. Bapukale Anätu, nä unin. Gä Isip kuwiläkge manaxälayo. Isipkätanu nätä äpme pahawa, gäle bapuka sakngälawän, kantri inulung hikngä dakngawän yiwitning. <sup>4</sup> Isiwu gäxät pukunimunin. Tikengä hipdu Kenanu päkakopit. Gä Josepkät yiwixäwik kupiyä, itä kwayiwik. Ge Isip kuwiläkge, manaxälayo,” yang inikut, Anätutän.

<sup>5</sup> Tiwän Jekowu Berseba teke kukut. Wawakngä uläkwäkgä Jekop, mängätnä, engangä yangu kalbimä inulungu kinggä pewän kukinu unggwengwenkätan päko peke, päke kukin. <sup>6</sup> Unetäkänu kälawu äminsak äwa hängä täpänä Kenan päkin yangu undä unuxät pake kukin. <sup>7</sup> Jekopdä ixät nanä undä päke, Isip kukut. Wawakngä, yäpanä, bapunä wäwi, bapunä mängälä yang unda päke kukut.

<sup>8</sup> Jekopde wawakngä, bapunä yangu Isip kukinu umanä using.

Yakap täpä Ruben. <sup>9</sup> Tiwänu Rubende wawaxu Hanok, Palu, Hesron, Karmi yang. <sup>10</sup> Tiwänu Simeonde wawaxu Jemuel, Jamin, Ohat, Jakin, Sohar Saul yang. Saulde mingä Kenan nanä. <sup>11</sup> Tiwänu Livaile wawaxu Gerson, Kohat, Merari yang. <sup>12</sup> Tiwänu Judale wawaxu Er, Onan, Sela, Peres, Sera yang. Tiwändeyä Erkät Onankälu Kenan kumgumäläk. Judale wawaxu Peres, uläpäle wawaxu Hesron, Hamul yang. <sup>13</sup> Tiwänu Isakarde wawaxu Tola, Pua, Jasup, Simron yang. <sup>14</sup> Tiwänu Sebulunde wawaxu Seret, Elon, Jalel yang. <sup>15</sup> Jekopde wawaxu uläkwäxu, mängätnä Lea itä Mesopotemia yiwixäwik dukngikut. Yäpanä täpätuxäyä andukngikut. Umanä Daina. Jekopde mängälu Leatä dukngikutkät bapunä uläkwäkalu unekänu 33.

<sup>16</sup> Tiwänu Gatde wawaxu Sifion, Hagi, Suni, Esbon, Eri, Arodi, Areli yang.

<sup>17</sup> Tiwänu Aserde wawaxu Imna, Isva, Isvi, Beria yang. Tiwänä haminä

Sera. Aserde wawaxu Beria, uläpäle wawaxu Heber, Malkiel yang. <sup>18</sup> Gat Aser yangu, Jekopkät Silpaxätde wawak. Silpa uläpä Labandä yäpanä Leale puyä äminäle imikulunin. Jekopkät Silpaxätde dukngikumäläkät bapunä uläkwäkälu unekänu 16.

<sup>19</sup> Jekopde mängälu Resel ile wawaxu Josep, Bensamin yang. <sup>20</sup> Josepde mängälu Asenatdä wawakngä Isip dukngikulu Manase, Epraim yang. Ase-nalu Potipera Onde prisu uläpäle yäpa. <sup>21</sup> Tiwänu Bensaminde wawaxu Bela, Beker, Asbel, Gera, Naman, Ehi, Ros, Mupim, Hupim, Art yang. <sup>22</sup> Jekopde mängälu Reseldä dukngikutkät bapunä uläkwäkälu unekänu 14.

<sup>23</sup> Tiwänu Dande wawaxu Husim. <sup>24</sup> Tiwänu Naptalile wawaxu Jasel, Guni, Jeser, Silem yang. <sup>25</sup> Dan, Naptali yangu Jekopkät Bilhaxätde wawak. Bilha uläpä Labandä yäpanä Reselde puyä äminäle imikulunin. Jekopkät Bilhaxätde dukngikumäläkät bapunä uläkwäkälu unekänu 7.

<sup>26</sup> Inä Jekopde wawak äwä bapunä yangu Kenan teke Isip kukinu unekänu 66. Wawakngäle mängät täkwäkäyä using kukin, tiwändeyä unuxälu doxendekin. <sup>27</sup> Tike Josepde wawaxu Isip alakumäläxu uläpäyatkät Jekopde wawak, bapunä Kenan teke Isip kukinu uläkwäkälu unekänu 70.

<sup>28</sup> Isiwu axundokengu, Jekopdä Josewu Gosen apu dayipikge natake, Juda gämäk iningyäpiwän, Josepde kukut. Tiwänä Jekop yänggwälu Gosen kundoxawä, <sup>29</sup> Josepkäyä Gosen kuwikge kalisu inäne gwenu tändäkngake, täko yiwike, nanä Israel kawikge kukut. Ku nanä kake täku betaxäwik, belakngä initikut.

<sup>30</sup> Tiwänä nanätä Josewu using inikut. “Nina kayitä angganduke, ‘Käluk yiwixaläk,’ yangu anatäxat. Ge äpmanu axupitdekän,” yang inikut.

<sup>31</sup> Tiwänä Josepdä notnä, nanä, äwä nanäxät nanä yangu using yänikut. “Kingu using ku iniwit. ‘Notna, nana, äwä nanaxät nanä yangu Kenan kewu uwomune yiwixayingu näle aapuying. <sup>32</sup> Äminu uläkwäxu sipsip, towiyä gämän yang daying yiwäxayingunin. Ngä sipsipnä, towiyä gämänä, äwä hängä täpänä yangu undä päkapuying,’ yang iniwit. <sup>33</sup> Ge kinggä yawän kuwä, ‘Ginu ina puyä bimä pahakayingunin?’ yang daniwänu, using ininong. <sup>34</sup> ‘O bulämbam täpänin, ninu tupä bapunindä pahakakin using pahakamängunin. Wawakdäkänetä sipsip, towiyä gämän yang daying yiwixakumängä, using daying yiwäxamäng,’ yang ininong. Using iniwä, kinggä Gosen kewu awomune äpme pewän yiwitning, inale Isip nanä sipsip dayingyiwäxaying äminde mähe natäxayingunin,” yang yänikut, Josepdän.

## 47

### *Josepdä notnä, nanä yang kingge yänipäkapgut*

<sup>1-2</sup> Tiwänä Josepdä notnä 5 tuwänguwän, Gosen kep womu teke, kingge kukin. Kuke Josepdä kingu using inikut. “O king, nana, notna yangu sipsipnä, towiyä gämänä, äwä hängä täpänä undä päke, Kenanu aleke apuhika, Gosen kep womune aapuyingä undan yiwayak,” yang inikut. Inikengä notnä uläkwäxu yawän, kingge kayine kopgin.

<sup>3</sup> Tiwän kinggä using yänikut. “Ginu ina puyä bimä pahakayingunin?” yang yänikut.

Yäniwän yäkwäle wamu using yakin. “O bulämbam täpänin, ninu tupä bapunindä pahakakin usinggän, sipsip dayingyiwäxamängunin,” yang inikin.

<sup>4</sup> Unetäkänu using inikin. “Kenankätanu naxu wenä hikngä tiwän, sip-sipdä nänangäsäxäyä wenä tinggäwä, mätekngä womsimu ane yiwitnimde apumäng. Ge gätä täkembä yawi, ninu Gosen yiwitnim?” yang inikin.



<sup>5-6</sup> Tiwänä kinggä Josewu using inikut. “Isip kewu awomu gätäne. Nangga äwä notda yangu gäle apuying. Tiwän Isipkätanu kewu nomän hikngä Gosendän. Ge une yawi yiwitnong.

“Tiwänu notda uläkwäkätanu, iminimindäka kälawu nomängän daying yiwixayingä kakengu, u äminuningän tuwänguyo. Tiwän nätäne itä daying yiwitining,” yang inikut.

<sup>7</sup> Tiwänä Josepdä nanä Jekowu kingge kayine initäkapän, Jekopdä kingu wam gwaläng imikut. <sup>8</sup> Imän kinggä “Gä krismasda dasingdasings?” yawän, <sup>9</sup> using inikut. “Kewu anggomune tihikuxäwik, krismasna 130 yiwixat. Tiwän u tihikukumu meyä bulak tihikukum. Bapunatä tihikuxäwixu, krismasu meyä ayiwikin. Tike näle krismasu mätekngä,” yang inikut. <sup>10</sup> Tikengä wam gwalängu hipdu imixäwixu, aepuxukut.

<sup>11</sup> Tiwänä kinggä inikut using, Josepdä nanä, notnä yangu Ramses Distrikätanu\* kewu womduhim yämän, une yiwikin. Isipkätanu Ramses Distrikge kewu nomän hikngä. <sup>12</sup> Unetäkänu Josepdä nanä, notnä, nanäxät nanä, äwä engang yangge natake, naxu ämin apmäng yämixawän, näxäwik yiwikin.

### *Josepdä Isip nanä gatängyämikut*

<sup>13</sup> Isip nanä, Kenan nanä yangu naxu wenä hikngä tinggawän, takgä yiwixäwä, kitokngänä wenä tikin. <sup>14</sup> Tiwänu moningu Isip nanätäne awä Kenan nanätäne yangu undä hikngä nakge tahaxäwik, Josepde imä päke, kingge yolune päku pekut. <sup>15</sup> Isip nanä Kenan nanä yangu moningä undä mumbä pulukgäwä, Isip nanä undätä apu, Josewu using inikin. “Moninginu undä amutna puluying. Tiwändeyä gä inale nindung yiwixawi kumnangge tikamäng? Naxu niming,” yang inikin.

<sup>16</sup> Tiwänä Josepdä using yänikut. “Moningsä awulukge tiwänu, kälawu alowikayingunin päkapu namixawä, yäkwäle naxu äpme damit,” yang yänikut. <sup>17</sup> Yäniwän sipsip, meme, towiyä gämän, hos, äwä donggi yangu undä päkapu imikin. Tixawän yäkwäle nak yämän näxäwik, yiwixawä krismasu unggwenu apgut.

<sup>18</sup> Krismasu unggwenu apuxuwän puluwänä, hipdu apu Josewu using inikin. “Bulämbam täpänin, ‘Naxu nimiyo,’ yangu dongganinangäsä teyä, moningninu wenä. Tiwän kälawu äminsakäyä gäle undä anggamikumäng. Ge äpmanu hängä täpätu nakge gaminangäsä wenä. Tike nihäxät kep-ninkätgän. <sup>19</sup> Gä inale nindung yiwixawi kungäxätna, kepninu moyo yiwitnanggenggak? Nihäxät kepninkät päxäwik, naxu nimiyo. Tiwän ninu kingge puyä ämin moyoyi däknäna, itä nihä äwä kepnin yangu towikngä däknäwik. Nak salin nimiyo. Tiwän unin pahana, kewu wäyi doliwik. Tiwän bulä alawä, unin päke nake, doxumnim,” yang inikin.

<sup>20</sup> Naxu wenä hikngä tiwän, Isip nanä undä kepnä pewä, Josepdä kewu undä kingge umande uhiwän, kinggä päke, towikngä däknäkut. <sup>21</sup> Josepdä kepnä uhiwän, äminu Isip nanä undä hikngä kingge puyä ämin moyoyi däknäkin. <sup>22</sup> Tike prisu moningu kinggä iwikge yämixawän, naxu uhingnäkin. Ge nakge dondapmäke, kepnä dowewä päkut.

<sup>23</sup> Tiwänä Josepdä äminu Isip nanä using yänikut. “Äpmanu kingge umande kepsä, gihä yangu auhingat. Ge nak salinu anin päku, puyäne pahanong. <sup>24</sup> Itä bulä alawä päkengu, äpuke 1-u kingge imixäwik, 4 gihäle penong. Tikengu gihäle peningune nanä käwutdu sakngäyile pexäwik,

\* **47:11:** Gosen kewu uwomu umanä täknägat Ramses Distrik.

kawutdu gihä, gihäxät nanä, äwä engangsä yang näningge, penong,” yang yänikut.

<sup>25</sup> Yäniwän using inikin. “O bulämbam täpänin, ninu axumnangäsä teyä, gätä ilakngä ninduke, gatängnimitäkapunggawi, käluk yiwitnanggekamäng. Ge kingge puyä ämin moyoyile äpme yiwitnim,” yang inikin.

<sup>26</sup> Tiwän Josepdä mämä wamu using tekut. “Isipkätanu kewu kinggänekän. Ge äminu undä naxu puyäne nanä päkengu, äpuke, 1-u kingge imixäwik, 4 inäle pening.” Mämä wamu uläknga äpmankäyä using yiwäxak. Kinggä äminbamde kewu awäke teyä, prisde kewu dowäkut.

### *Jekopdä inä kupän kwayiningge Josep inikut*

<sup>27</sup> Israel yänggwälu Isip päku, Gosen kep womune yiwikin. Une yiwixäwik, kepnä pätake kuke, engangu dukngixawä, meyä sakngälakut.

<sup>28</sup> Jekowu Isip yiwixawän, krismasu 17 apuxukut. Unekänu krismasnä 147 yiwikut. <sup>29-30</sup> Täpduxu axupikge däpi tiwän, wawakngä Josewu yawän apän, using inikut. “Gätä ilakngä nanduxaläkngä kakengu, näle natake, gwälam hikngä tahaxäwik, wamu ganiwilu kätakga bakanale kematde täxäwik, ‘Usingu äpme tahawit,’ yang hiyäkände hikngä naniyo. Nätä kupa, Isipkätanu maxwayinong. Tike nätä kungäke bapunale kuwa, gupna Isipdä take, bapuna kwayikin womune täku kwayinong,” yang inikut, Josewun.

Iniwän “Usingu äpme tahawit,” yang inikut.

<sup>31</sup> Tiwänä Jekopdä “Anätule umande hiyäkände hikngä naniyo,” yang iniwän, Anätule umande hiyäkände hikngä inikut. Tiwän Israelu däme däpmunä pekgak womune täpu temäke, Anätule eu wam yakut.

## 48

### *Jekopdä Epraimkät Manasexälu wam gwaläng yämikut*

<sup>1</sup> Täpduxu womdu yiwihikangä, ämindä Josewu using inikin. “Nangga amalik,” yang iniwä, Josepdä wawakngä Manase Epraim yang yänipäke, nanäle kukut.

<sup>2</sup> Kuwän “Wawakga gäle aapuk,” yawä, Israelu awekulu, kwätän hikngä tahake, enake yiwikut.

<sup>3</sup> Tikengä Josewu using inikut. “Nä Kenankätanu taunu Lus unggäpangune\* yiwixäwa, Anätu Kitokngänä Käyä Täpätä apu, wam gwalängu using namikut. <sup>4</sup> ‘Nätä pahawa, gä engangu naxälä towimbi, meyä sakngälawik. Nätä pahawa, bapuka kantrinä inätä take yiwitning. Tiwän kewu awomu, bapukale tupäkände äpme yämit,’ yang nanikut,” yang inikut, Josewun.

<sup>5</sup> Unetäkanu using inikut. “Nä ane gäle doapuxäwa, wawakga Isip alakumäläxu aläpâyälu nina wawak däknakamäläk. Ruben Simeon yang towikum bimä, Epraim, Manase yangkäyä wawaknga däknakamäläk.

<sup>6</sup> Tiwän engangu Epraim, Manase yangge mehene towimbiäxu, gikale. Tiwän näle wawakgä kewu Kenan uwomune päningu, Epraim, Manase yangkäyä awähimäläk. Tike ulapnä ile mehene alatningu payänäle kewune yiwitning. <sup>7</sup> Wamu u yänggalu, mingga Reselde natake yänggat. Kewu Mesopotemia uwom teke, Kenan kewu uwomune taunu Epratde wäkngäsim kuxäwik, Reselu kumgut. Tiwän butayä hikngä natake, Epratde kahit kwayimune kwayikum,” yang inikut. (Epralu, äpmanu Betlehem yang inikaying.)

\* **48:3:** Tupä taunu Betel unggäpangu Lus yang inikakin.

<sup>8</sup> Tikengä Israeldä Josepde wawak dayike, “Aläpâyalu imin?” yang iniwän, <sup>9</sup> Josepdä yäkwäle wamu using inikut. “Aläpâyalu wawaknga Anätutä ane Isip yiwixäwa namikulunin,” yang inikut.

Tiwän “Näle päkapso. Tiwän wam gwaläng yämit,” yang inikut.

<sup>10</sup> Israelu äminäläke tiwän, kayi kupilä tiwä, nomänu dondayipgut. Ge Josepdä wawakngä yänipäkapän, Israeldä bapunä päku betake, kis tahangyämikut. <sup>11</sup> Betake Josewu using inikut. “Gäle nomu dombänggandupit yang natäxakum deyä, Anätutä pahawän, gikakänu donggandut. Tike wawakgaxät undä dandupa yiwimäng,” yang inikut.

<sup>12</sup> Tiwäna Josepdä wawakngä Israelde bälängäne wäkngäsim yiwikumäläxu yäniwän, kwayimune päku yiwixawät, Josepdä sopäsopä nanäle nomune puke, däme kepkatan täpu temgut.

<sup>13</sup> Josepde wawaxu uläpâyalu, yakap täpä Manase, tiwän ulapnä Epraim. Ge Josepdä Manase kätakngä dambunä hamändä täke, Epraimu kätakngä hiyänä hamändä täke, Israelde yänipäkapän, Manase Israelde hiyä käwut yiwän, Epraimu Israelde dambu käwut yiwikut. <sup>14</sup> Tiwändeyä Israeldä kätakngä hiyä hamändä Epraimde kuhilune täke, kätakngä dambu hamändä Manasele kuhilune täkut. Manasetä gämäk alakut deyä, kätakngä hiyä hamändä doläkut.†

<sup>15</sup> Tixäwik wam gwalängu using yämikut.

“Bapuna Abraham, nana Aisak yangu Anätule wam täwake, ile gebpine yiwikumäläk.

Anätu uläpätä yiwikyiwiknga yiwitäkapulu, iwikge nandung yiwik.

<sup>16</sup> Meyä näle apginu nä axumnangäsä teyä, itä ängela däknigake gatängamixawän yiwitäkaput.

Ge Anätu uläpätä wakwakdäkä aläpâyalu bänip kwikwixu äpme yämik.

Ämindä wawakdäkä aläpâyatde uman yakengu, nina, bapuna Abraham, äwä nana Aisak yangge dombulämdäning.

Tiwän wawakdäkä aläpâyalu engangu äpme towimbät, meyä sakngälawik, kewu anggomunen,” yang yakut, Jekopdän.

<sup>17</sup> Nanätä kätakngä hiyä hamändä Epraimde kuhit täpän kake, Josepdä “Uhamänu Manasele kuhit tänangäsä tahanggak?” yang natäke, nanäle kätaxu uhamänu Manasele kuhiläne täku tewikge täxäwik, <sup>18</sup> using inikut. “Nan, usingundo. Yakawu aläpänin. Ge kätakga hiyä hamändä ile kuhit täyo,” yang inikut.

<sup>19</sup> Tiwänä Jekopdä usingu dolahawikge natäke, using inikut. “Wawaknga, anatät. Ixäyä bapunä äpme meyä sakngälake, kantri inätä täke yiwitning. Tiwän umanä käyä tiwik. Tiwändeyä ulapnäle umanu bulämbam hikngä äpme tiwän, payänäle umanu yapmimbik. Tiwänä ulapnäle bapunä meyä sakngälake, kantrinä inäinä päke yiwitning,” yang inikut.

<sup>20</sup> Tikengä täpduxu unggwenune Jekopdä wam gwalängu using yämikut.

“Mahande Israel nanätä äminu wam gwaläng yäminingge natäkengu, gitde natäpä apän, using yänining.

‘Anätutä gwälam hikngä tupä Epraim, Manase yangge pahakut usingu, gälaxäyä usinggän pahayok,’ yang yänining,” yang yänikut, Jekopdän.

Wamu u yakulu, ulapnä Epraimde umanu yakapde yiwän, payänä Manasele umanu mahande yiwikut.

† 48:14: Tupä nanätä wam gwaläng yäminingge, wawakngä yakap täpä nanätä kätakngä hiyänä hamändä päke, ulapnä dambunä hamändä päkakin.

21 Tiwänä Israeldä Josewu using inikut. “Nä axumnangggat. Tiwändeyä Anätu ginkälu äpme yiwixäwik, bapuhäle kewune hipdu danipäke kuwik. 22 Sekem nanäle kewu nomän hikngä. Tupä kwälemna, gwäwäyana yang päke, Amor nanäxät amäke, kewu uwom tākumu notdale doyāmit, tike gäle gaminggat,” yang inikut.

## 49

### *Jekopdä wawakngä mahande dasingga yiwitninggäne yānitapgut*

<sup>1</sup> Jekopdä wawakngä yangyāwāmbän apä, using yānikut. “Wäkngasim apnong. Tiwän mahande dasingga yiwitninggäne danitapit.

<sup>2</sup> Ginu undä Jekopde wawak, ginu undä ane apnong.

Nä nansä Israeldä yāwilu, apuke natāxätng.

<sup>3</sup> Ruben, gä wawaknga yākap täpä.

Näle kitokngä, gätä päkuläk.

Wawakdäkäne gä gämäk towikum.

Umanda käyā.

Kitokngäka käyā.

<sup>4</sup> Tiwändeyä umanda wenä tiwik.

Yanggä däkngake matāwä sipmākayingbimä säkge doyiwxalāxunin.

Nanggale mängätkät pekumäläk.

Mängätanaxät peke, mayäkngä bulāmbam hikngä namikuläk.\*

Ge gä yakap täpäle doyiwiläk.

<sup>5</sup> Simeonkät Livaixälu yiwikyiwikngä usäkän.

Hängä amäk pahanangäsätäne päke, äminsipmāk tahakamälāxunin.\*

<sup>6</sup> Wepdä wam yāxawälu, nä doxuwa yiwitnim.

Wam yiwikyāxawälu, donggatāngyāma yānim.

Inale tokngä natākengu, ämin sipmākamälāxunin.

Äminde towiyä gämānde kendāngalu yumdekän sipmändäkngawät tahandambätäkayingunin.

<sup>7</sup> Bāniptoxu yupsāng natāke, tokngä natāxāwik,

āminu tokngä dākä yumdekän yāmikamälāxunin.

U tahakamälākge tokngä dākä inä pähimäläk.

Tiwän bapunä unekānu donggatāke yiwitning.

Tike Israelkätanu kewu notnätä päningune täpātu täpātu petāke kuwa yiwitning.

<sup>8</sup> Juda, notdatä umanda tängetnatning.

Iwalda gätäkän sipiläk.

Tiwän nanggale wawakgä gäle sopāsopä putning.

<sup>9</sup> Juda, gä laion bimä.

Laiondä kälap ku sipmāke nake,

hipdu päkapu pekyiwixawä,

ämindä doxu pahangyāwāxayingbimä.

<sup>10</sup> King puyä Judatä täpixu ämindä dolāning.

Inä bapunätä tätāke koxawä,

towikngätä apungä puyä uläknga täpik.

Tāke kantri undä itä daying yiwik.\*

\* 49:4: Yakap 35:22    ☆ 49:5: Yakap 34:25-30    \* 49:10: Wamu aläknga, yāpulinä kätak hikngä donatāxayingunin.

- 11 Donggi wain puyäne äwamä pewä, wain salinu änäning.  
Tiwän täwikngäxäyä wain yanggätä ähälutning.  
Tiwändeyä wainu dowuluwik.
- 12 Ämindä wain tängokgäwä, kayi wain bimä dak tining.  
Kälawu äminsakge mämu ämindä päke tängokgäwä,  
mayä mämbimä kwak hikngä tining.†
- 13 Sebulunu yanggä gwende kwayimune yiwik.  
Kewu uwomu nomän tiwän, sipdä päkapu yiwitningge nomän.  
Kewu Sebulundä täpixu täkungu taun Saidonde kewune yiwik.
- 14 Isakalu donggi kitokngä gwendu bimä.  
Tiwändeyä meyä käwukäwut wamängämä,  
moyo päke pek yiwik.
- 15 Isakalu kewu äyiwä täkaningge womdu kawän nomän hikngä tiwänu,  
moyo yiwän täkäning.  
Tike äminde puyä ämin moyoyi däknge,  
meyä päpikge gwetakengu,  
puyä kitokngä hikngä pahawik.
- 16 Danu äminä nomän daying yiwik.  
Israel notnätä daying yiwixaying using daying yiwik.
- 17 Danu gomok bimä.  
Gomokgä kahitäpäne kohopike yiwixawä, äminu hos tängäne apä,  
hosde bäläng yähawä, hosdä hätnawä, äminu hos tängäne yiwixayin-  
gunin päkepu sipmäkaying using tahawik.‡
- 18 Yawe, gätä gatängamiläkge yiwixat.
- 19 Gatde yolu kukanananggä apu pahawä malining.  
Tiwändeyä Gatdä mähexätandä apu sipik.
- 20 Aserde kewune naxu nomän alätning.  
Tiwän naxu gwälam hikngä kingge yämik.
- 21 Naptali meme tukgä inä natäk tihikuxäwik,  
engangä gwälam hikngä dukngikaying using tahawik.
- 22 Josewu nawu täkngatu bimä.  
Yanggä akondokayingune doke, salinä meyä hikngä aläxawä,  
kätakngä täpmäxäwik, dämän täpä täpä kopik.
- 23 Kwalemdä amäkaying ämindä tokngä natäke kwälemdä temningge pa-  
hakin.
- 24 Tiwändeyä Josewu kwälemnä päkulu,  
kätakngä doyamumbä, nomängän mukut,  
inale Jekopde Anätu kitokngänä käyä uläpätä gatängämikut.  
Anätu uläpä Israel daying yiwixak täpänin.  
Anätu uläpä Israelde hup.§

† 49:12: Judale kewu nomän hikngä tiwän, nak puyä meyä pahaxäwik, kälawu meyä towitning.

‡ 49:17: Dande bapuna äminu naxäländö. Tiwändeyä kitokngänä käyä tiwä, iwalnä sipning.

§ 49:24: Anätu huwu bulämbamu gwendu bimä. Israel nanä undan kuhopiwä, iwalnä sipnangäsändö.

- 25 Bapukale Anätutä gatänggaminggaxunin.  
 Anätu Kitokngänä Käyä Täpätä bänip kwikwik gaminggaxunin.  
 U gamikgä pahawän, hopä enetängätä kepdane epring.  
 U gamikgä pahawän, yanggä amälankätandä kepdane akopning.  
 U gamikgä pahawän, mängälä gin yänggwätkätan nanä engangu meyä dukngitning.
- 26 Wam gwalängu bapunatä näle namikinu, gäle gamitdä ayapmik.  
 Wam gwalängu meyä hikngä anggaminggatdä täwalde nomu ayapmik.  
 Wam gwalängu anggaminggalu gätä päpiläk.  
 Notda täkwäkätanu äminu bulämbam däknagakuläkgä päpiläk.
- 27 Bensaminu homu tuxu kitokngäna käyä gwendu bimä.  
 Kälawu tembänä ku sipmäke nänggaxunin.\*\*  
 Ge kupiläne notnäle uhike yäminggaxunin,” yang yakut, Jekopdän.
- 28 Wamu uläkwäxu Israelde wawaxu 12 uläkwäkge bapunä mahande dasingga yiwitninggäne yänikulunin. ‘Using yiwitning’ yang u yänikulu, wawakngäle yiwikyiwikngä dayipän tixawä yänikut

### *Jekopdä kupän kwayikin*

29-30 Wawakngä mahande dasingga yiwitninggäne yänikengä, Jekopdä wawakngä puyä wamu täkngatu using yänikut. “Nä axungwäke notna axumgin aminde kuwitde däpi alik. Ge axupa, gupna Kenan täke kunong. Täku hupgänangu bapuna, nana yang pekindäkäne tenong. Hupgänangu undäkä Makpelaxätan, Epron Hit nanä uläpäle kewune. Makpelaxät Mamrexälu wäkngäsिम wäkngäsिम. Hupgänangu undäkä kepkät Abrahamdä Epronde kätaxune mätmätde uhikut. <sup>31</sup> Abraham, mängätinä Sara yang undäkäne pekin. Tiwän Aisak, mängätinä Rebeka yangkäyä unekän pekin. Ge Leatä kupäntäyä une tekum. <sup>32</sup> Kewu uwomkät, hupgänangu undäkäxälu Abrahamdä Hit nanäle kätaxune auhikut. Ge ninaxäyä axupa, gupna aläku, hupgänangu undäkänekän tenong,” yang yänikut.

<sup>33</sup> Puyä wamu wawakngä yänipulukengä, Jekowu bälängä awekgaxune päko peke kungäke, bapunä tupä kumginde kukut.

## 50

<sup>1</sup> Nanatä kupän, Josewu butayä hikngä natäke, nanä betake initixäwik, kis tahangämikut. <sup>2</sup> Tikengä “Gupnä bukatayäk,” yake, puyä äminä doktale yiwixaying täkwäxu yäniwän, nanäle guwu mälasin pexäwik, täwikgä täpä kopgut.\* <sup>3</sup> Puyä uläknga tahananggengu, täpduxu 40 tahakakin. Ge Israelde guwu using pahaxawä, täpduxu 40 apuxukut. Tixawän Isip nanä ile butayä natäke, kwänäm tixawä, täpduxu 70 apuxukut.

<sup>4</sup> Butayä täkngane yiwikinu puluwänä, Josepdä kingge puyä äminu umanä käyä täkwäxu using yänikut. “Näle täke natäkengu, kingu using ininong. <sup>5</sup> ‘Josewu nanatä using inikut. “Wamu uyäwilu, Anätule umande ‘Usingu äpme tahawit,’ yang naniyo,” inike “Nä axupitde däpi alinggak. Ge nätä kupa, mätmälu Kenen kep womune ninale kwayikum däkäne täku teyo,” yang iniwän, “Usingu äpme tahawit” yang Anätule umande inikut. Ge täkembä tewi, nanä Kenan täko tekengä, hipdu apik?” yang ininong,” yang yänikut. <sup>6</sup> Yäniwän king ku iniwä, Josepde wam natäke, kinggä using yakut.

\*\* **49:27:** Homu tukgä kälap yäwäke sipmäke napulukaying using, Bensaminde bapunäxäyä iwälnä using pahaning. \* **50:2:** Isip nanä umanä käyä ämindä kupä, gupnä bukatayäk yake, doktatä gupnä matäke, bäniyä sike, maäläsinu inänä peke, täwikgä wamätäke kokakin. Tikengu boksune pexakin.

“Täke. Nanggatä yawän Anätule umande inikuläk using täko teyo,” yang inikut.

<sup>7</sup> Tiwänä Josewu nanä kwayiwikge kopgut. Tiwän kingge puyä äminu umanä käyā kingge yolune pahakaying, puyä äminu umanä käyā Isipkätan pahakaying awä <sup>8</sup> Josepkät nanä, payänä, ulapnä, nanäxät nanä yangu undä kopgin. Tixawän Gosenu engangä, sipsipnä, towiyä gämänä yanggäkän yiwikin. <sup>9</sup> Tixawän amäk äminu hos tängäne päko yiwike kukaying ämin, äwä karis bimälängäne päko yiwike kukaying ämin yangkäyā using kopgin. Äminu u kopginu meyä hikngä.

<sup>10</sup> Axuhika Atat nanätä witde dapäkdapäkngä uhinggikaying womune kundopgin. Atalu Yanggä Jodan Dupine wäkngäsım. Uwomune kundo-kengu, butayä hikngä natake, kwänämu bulämbam gwen tikin. Tixäwik Josepdä nanäle natake, butayä täkngane yiwixawän, täpduxu 7 apuxukut. <sup>11</sup> Butayä täkngane yiwixawä dayike, Kenan nanä uwomune yiwixayinggä using yakin. “Isip nanä butayä hikngä natäxaying,” yang yakin. Ile tiwän, kewu Yanggä Jodan Dupine wäkngäsımu uwomu, umanä ‘Abel Misraim,’† yang inikaying.

<sup>12</sup> Jekopde wawaxu inä yänikut using tahakin. <sup>13</sup> Nanäle guwu Kenan kewune täko, hupgänangu Makpela nanä däkäne tekin. Makpelaxät Mamrexälu wäkngasım wäkngasım. Hupgängangu undäkaxät kewu uwomkälu Abrahamdä mätmätnäle, Efron Hit nanä uläpäle kätaxune uhikut. <sup>14</sup> Nanä kwayikengä Josep, notnä äwä äminu ixät kopgin yangu undä hipdu Isip kukin.

#### *Josepdä notnä bänip kwikwik wam yänikut*

<sup>15</sup> Nanä kwayikengä, Josepde päyänä täkwäxu using yakin. “Nanu alikut. Ge wäyi täkngaläknga Josepde pahakumängge, yäkwäle Josepdä tokngä natake, tokngä däkä nimiyäk,” yang yakin.

<sup>16</sup> Yake wamu Josepde using tewä kukut. “Nangga axupikge däpi tixawänu, using ninikut. <sup>17</sup> ‘Josewu using ininong. “Wäyi täkngaläknga payäkatä gäle pahake tokngä däkä gamikindeyä, gutongänä pahawi hopinong,” yang ininong,’ yang ninikut. Ninu nanggale Anätule gepbine yiwixamäng. Ge wäyininu täkembä pahawi hopining?” yang yawä ku inikin. Iniwä Josewu wamu uläknganin natake, kwänämnä tikut.

<sup>18</sup> Tiwänä payänä undä täkwäkgä täkapu, Josepde kayine pimake, “Ninu gäle puyä ämin moyoyi,” yang inikin.

<sup>19</sup> Iniwä using yänikut. “Manaxälatnong. Nä Anätundo, ngä nätä tokngä däkä damit. <sup>20</sup> Gindä näle wäyi pahaningge natäppin. Tiwändeyä Anätutä wäyi u pahakinunin täpän täkwämbän, nomän tik. Äminu meyä axumnangäsä teyā, Anätutä anggatängyämän, käluk yiwixaying. <sup>21</sup> Ge manaxälatnong. Gihaxät engangsäxälu äpme dandung yiwit,” yang yänikut, bänip kwikwik wamun.

#### *Josewu äxumgut*

<sup>22</sup> Josewu notnä täkwäkät Isip yiwikin. Tixäwik Josewu krismasnä 110 tikut. <sup>23</sup> Äyiwixawängän wawakngä Epraimde bapunä alawä, wawakngä Manasele wawaxu Makirde engangkäyā alawä, Josepdä inäle päkut.

<sup>24</sup> Tiwänä Josepdä notnä using yänikut. “Täpduxu axupitde däpi alik. Tiwändeyä Anätu anggatängdamikge äpme apik. Itä apungu, ginu kewu awomunetä, kewu Abraham, Aisak äwä Jekop yangge yämikge kitokngä

† 50:11: Hibru wamune ‘Abel Misraim’ äwä “Isip nanä kwänäm tikaying,” yangu guläkngä usäkän.

hikngä yänikut womune danipäke kopik,” yang yänikut. <sup>25</sup> Yake using yänikut. “Wamu daniwilu, ‘Usingu äpme tahanim’ yangu Anätule umande naninong. Anatutä änggatängdamikge apänu, gupna kewu awomunetä ähikngä täke kopnong,” yawän, “Usingu äpme tahanim,” yangu Anätule umande inikin.

<sup>26</sup> Josewu krismasu 110 yiwike kumgut. Tiwänä gupnä mäläsin peke, bokskätan tekin.



## Rut

### *Naomi ayä axumgut*

<sup>1</sup> Tupä Israel nanä kingu wenäne, Israel äminde kepkätanu gusit tiwän, naxu wenä tikut. Tiwän Juda nanä täpätu Betelehem yiwixakulu, mängätnä, wawakngä täpätat yang päpän, Israelu teke, womsimu kantri Moap päku yiwitningge kukin. <sup>2</sup> Wäwi uläpä umanä Elimelek, tiwän mängätnä Naomi, tiwän wawakngä uläpätatde umanu Malon, Kilion yang. Uyänggwälu Efralunetä sakngälakin. Tiwänu taunä Betelehemu uwomu Judaxätan. Uwomu aleke päku Moap yiwikin.

<sup>3</sup> Päku yiwihika, Elimelexu aweke kungäxawän, Naomi wawakngä täpätatkät inäkän yiwihika, <sup>4</sup> wawakngä mängätnä Moap nanä päkumäläk. Umanä Opa, Rut, yang. Moap päku, krismasu 10 yiwike, <sup>5</sup> wawakngä Malon Kilion yangkäyä undä kumgumäläk. Ayä wawakngä uläpätat yangu undä teke kumgin, Naomin.

### *Naomixät Rutkät Betelehem kukumäläk*

<sup>6</sup> Womsimu Moap yiwixawän, “Yawetä äminämbamu apu gatängyämike, naxu wuyäne nanä yäminggak,” yawä natäpgut. Tikengä Moap teke ayinä täpätatkät hipdu kuningge tändäkngakin. <sup>7</sup> Tike ayiwixakut womu teke, hipdu Juda kep womune kuningge kahit täpäne kukin.

<sup>8</sup> Täku kahitbäna ayinä yänikut, “Hipdu mingsä yot gihänggihä kukahon. Gitdä näxät, axumgin äminkätde tahakumäläk bimä taknga, Yawetä gitde gwälam hikngä pahayok. <sup>9</sup> Yawetä gatängdamän, apsä päke, ile yolune gupsäng yiwison,” yake, kis pahangyämän, kwänämnä duksäng tikumäläk.

<sup>10</sup> Tixäwik, “Undanä. Nilu notdambamde gäxät kunim,” yang inikumäläk.

<sup>11</sup> Tiwän “Ayina hikngä, kukahon, yotsäle. Inale kunim, näxälun? ‘Wawakngä äpmembä dukngiwän itä pähimäläk,’ yang natäxamäläk?” yang yänikut Naomitän. <sup>12</sup> “Ayina hikngä, yotsä hipdu kukahon, inale nä äminäläke alit. Ge apna tänangäsändo. Nina natäpa wawak dukngitnangäsä tiwän, kupilä anggwenunekän apna täke, wawaknga dukngiwa, <sup>13</sup> gilü ile yiwixawät takahimäläk? Bä wäwi täpätuyi dayikengu, apsäle doxuhimäläk? Ayina hikngä, undana. Meyä gitdä pämläxu nätä pätdä ayapmik, inale Yawetä nä maha temängamikut,” yang yänikut.

<sup>14</sup> Unin yäniwän, hipdu duksäng hikngä tikumäläk. Tike Opa hawanä kis tahängämike, yotnäle kukut. Tiwändeyä Rulu Naomixät gatäke kuhimäläkge natäpgut.

<sup>15</sup> Tiwän, Naomitä inikut. “Kayo. Notda mängälu notnämbamkät anätunäxätde hipdu axunggak. Gäxäyä kuwi kukahon,” yang inikut.

<sup>16</sup> Tiwändeyä Rutdä using inikut. “Anggapmambitde mananing yäpike, hipduna kuwitde mananing yäpiyo. Säneka kuwi, näxäyä axuwit. Säneka yiwi, näxäyä une yiwit. Gäle notdambamu näle notna. Gäle Anätuka näle Anätuna. <sup>17</sup> Säneka kupi, näxäyä une kupa kwayining. Nilu kungäkqäkänä matäwik. Tike hängä täpätutä matäwänu, Yawetä meyä bulämbam hikngä namikge natäxat,” yang inikut. <sup>18</sup> Tiwän Naomitä kawänu, Rulu ixät kuhimäläkge kitokakut. Tiwän axuwikge ining yäpikulu undan tekut.

<sup>19</sup> Tiwänä unetä kuhika, ku Betelehem kundopgumäläk. Kundopät Betelehem nanä undätä duksang kulakaxäwik, mängälätä “Naomimbä an?” yang yakin.

<sup>20</sup> Yawä “Naomi yangu mananinong. Mara yang naninong, inale Anätu Kitokngänä Käyä Täpätä yiwikywiknga alahawän wäyi hikngä tikut,” yang yänikut, Naomitän.\*

<sup>21</sup> Tikengä hipdu using yänikut. “Anetä teke kukumu, hängäna meyä. Tiwändeyä Yawetä hipdu moyo hikngä nanitakapuk. Ge Naomi yangu inale nanining? Yawetä nä alahawän malit. Kitokngänä Käyä Täpätä meyä anamik,” yang yänikut.

<sup>22</sup> Wamu uläknga Naomitä Moap kep teke, ayinä Rulu Moap nanä täpaxät hipdu kukumäläkgäne. Täpduxu uwomkätanu sänggum bimä bali yang yänikayingu moyokän matäxawä, Betlehemu kundopgumäläk.

## 2

### *Rulu Boasde wuyäne pahakut*

<sup>1</sup> Naomile ayä Elimelekät nanä täpätu hängänämbamgän tiwän umanä käyä. Uläpä umanä Boas.

<sup>2</sup> Rut Moap nanä täpätä Naomi inikut. “Tewi wuyäne kuwa, imindäka ilakngä nandupänu, ile mehene kuxäwik, bali salinu itä matäxawän epningu butuwit,” yawän, “Ayina hikngä, kuyo,” yang inikut, Naomitän.

<sup>3</sup> Tiwän Rulu axu, nak matäkakin äminde mehene yäwaxäwik, bali itä matäxawä epginu, bututäke kukut. Puyä ulängä kukulu, Boas Elimelekät nanä uläpätäne yangu äpmeyä katapgut.

<sup>4</sup> Awahaxawä, inä unggwenunekän Boasu Betlehemdä apu, nak matäkakin äminu “Yawexälu gikat,” yang yäniwän, yäkwäle “Yawetä pahawän nomändän yiwiläk,” yang inikin.

<sup>5</sup> Tiwänä Boasdä nak matäkin ämindäne kuhiläle tuwängukut täpä inikut. “Mängälämätexu aläpä imindäne?” yawän, <sup>6</sup> yäkwäle using inikut. “Uläpä Moap nanä, Moapdä Naomixät apgumäläxunin. <sup>7</sup> Tembänä apu ‘Täkembä tewi nak matäkaying äminde mehene yäwaxäwik, bali awamäxawä däpäknä epningu butuwit?’ yang nanike, bututäkapuk. Tiwändeyä gepmäne mateknä wesim yiwän täkaying,” yang inikut.

<sup>8</sup> Tiwänä Boasdä Rut inikut. “Kätak natäxayo. Bali wuyä awomu maleke ku, täpätuyitäne tängälängäne mambutuyo. Mängälämätexu wuyä alängäne pahakayinggä kuxawä kuxäwik butuyo. <sup>9</sup> Wäwi säneka matäwayak yangu kätak dayixäwik, mängälämätexu ixät pahakayingu mehene yäwayo. Puyä ämina, ‘Malahawä maliyok,’ yangu kitokngä ayänit. Yanggäkalembä tiwä, axu itä uhike peningunin tangopso,” yang inikut.

<sup>10</sup> Tiwänä Rutdä sopäsopä puke, kuhilä kewune täpu temäke inikut, Boasun. “Nä malä nanä. Tiwändeyä ilakngä inale nanduxaläk? Näle inale natäxaläk?” yawänä, <sup>11</sup> Boasdä inikut. “Nä anatäpgum, apdatä kungaxawän, hawakale dasingga tahatakappinggaläxun. Mingga, nangga, yotda yang peke, äminu tupä dondayixakuläkge apguläkge nä anatäpgum. <sup>12</sup> Ge u tahakuläkge yäkwäle, Yawetä gamiyok. Yawe Israel nanäle Anätuninu anggandung yiwikge apguläk täpätä hängäläpä meyä gamiyok,” yang inikut.

<sup>13</sup> Yawän, “Bulambam täpäna, gä näle ilakngäkänu usinggän nandupiläkge natäxat. Mängälämätexu gäle wuyäne pahakayingu umanä käyä, tiwän nä umana wenä. Geyä wam gwälangu gätä naniläkgä, meyä nätä pälu anggatängaminggak,” yang inikut, Rutdän.

<sup>14</sup> Nak nänangäsä täpduk tiwän, Boasdä Rut inikut. “Ane apu, brelu päke, yanggä kaxalä täknane pewi kaxalawä, nänggä,” yang inikut. Yawän,

\* **1:20:** Naomi yangu yäpuli kulakak. Mara yangu yäpuli meyä.

Rulu täkapu, bali matäkaying ämindä yiwikinune puku yiwikut. Tiwänä Boasdä sänggumde notnä puhäk hakinu imikut. Imän napän täke tiwän, naxu käwutdu ayiwikin.

<sup>15</sup> Anake, bali butuwikge enaxawänä, Boasdä wuyä äminä kitokngä yänikut. “Bali awamäpeningunembä päpän kakexäyä, mainiwä mayäkayok. <sup>16</sup> Tike awamäpeningune nanä notnäxäyä aluliwä akopä pengäminong, tiwän butuwik. Tiwänu maininggämätanong,” yang yänikut.

<sup>17</sup> Geambutuxawän tukawän, bali u butukulu täku sipmäng yäwambän bulätäkän epä kawänu, meyänä 13 kilo bimä tikut. <sup>18</sup> Tiwän bali päke, taun täku, dasingdasingga päkulu hawanä iniwän kakut. Tiwän anapän täke tiwän yiwikinkät sike imikut.

<sup>19</sup> Imän kake, “Äpmanu säne butuläk? Iminde wuyäne päläk? Äminu uläpä gandutewän päläxu, Yawetä pahawän nomändän yiwiyok,” yang inikut, Naomitän.

Iniwän Rutdä, inikut, iminde wuyäneka pahakulun. “Puyä ulängä pätdäne towikngä umanä Boas,” yang inikut.

<sup>20</sup> Iniwän, “Boasu Yawetä pahawän nomändän yiwiyok. Yawetä axumgin äminkät käluk yiwixaying äminkätde gwälam hikngä pahanggaxu dolexak,” yake using inikut. “Wäwi uläpä apnitde notnä hikngä. Ge notnäle natake nindung yiwitnangäsä täpätu,” yang inikut, Naomitän.

<sup>21</sup> Iniwän, Rut Moap nanä uläpätä inikut. “Täkngatuxayä using nanik. ‘Puyä äminaxät unekän gatäke kuxäwik butuyo. Tixawän sänggum bimä undä matäwä puluwik,’ yang nanik,” yang inikut.

<sup>22</sup> Tiwän Naomitä Rut inikut. “Ayina hikngä, mängälämätexu Boasde wuyäne pahakayingkät kuningu täke. Inale äminu täpätule wuyäne ku päxawi, tahawä maliyä,” yang inikut.

<sup>23</sup> Ge mängälämätexu Boasde wuyäne pahakakinkät gatäxäwik, bali pänggäwä puluwän, witkäyä pänggäwä pulukut. Unggwenggwenkätanu Rulu hawanäxät yiwikumäläk.

### 3

#### *Rulu ayäle täwakut*

<sup>1</sup> Täpduxu gwendune hawanätä Rut inikut. “Ayina hikngä, nätä wäwi täpätu kake gama, itä mängätnäle täpän, yotsäne gupsäng yiwisimäläk. <sup>2</sup> Boasde natäpso. Mängälämätexu ile wuyä pahaxawä ku butukuläxu uläpä apnitkät nanä. Äpmanu tukwatde bali sipmäng yäwäxawä bulätä epukaying womune däpäkdäpängä uhinggiwik. <sup>3</sup> Ge yanggäka häluke, hängä käpängänä käyä gupdane pahake, täwikga käluk pahake, uwomune kuyo. Tike nak yanggä yangu donapuluxawänu, alänggämänu maxuwi gandupsok. <sup>4</sup> Awäku pewänu, une hikngä pekgak yangu kätak kayo. Ge awexawänä, ku täwixu aomipewixu, nomnä bälängä omimbik däkähimgän tängenake, bäläng kwayimnäne peyo. Tiwänu itä dasingga tahawiläkge äpme ganiwik,” yang inikut.

<sup>5</sup> Iniwän Rutdä inikut. “U yänggaläk usingu äpme undä pahawit,” yang yakut.

<sup>6</sup> Tikengä Rulu bali sipmäng yäwäxawä bulätä epukakin womune ku, hawanätä dasingga inikulu, undä täwake pahakut.

<sup>7</sup> Boasu nakngäxät yanggänäxät napän, täke hikngä tinggawän, bänipgwäläng natake, bali pekinde kwayimune päku pekut. Pexawän, Rulu wepdäkän ku, täwixu bälängä pänguhikulu, nomnä däkähimu tängenake, bäläng kwayimnäne pekut.

8 Ge Boasdä kepdamände, dasingga tike enake, täpän täkwämbänu, mängälä täpätu bäläng kwayimnäne pekgawän kakut. 9 Kake, “Gä imin?” yawänä, Rutdä, “O bulämbam täpäna, nä Rut. Gä apnale notnä. Ge mängättdale täyo,” yang inikut.

10 Iniwän, “Yawele pahawän nomändän yiwiläk. Ge gwälam hikngä täknga äpmasim tahanggaläkgä, tupä hawakale tahakuläxu ayapmik. Wäwimätexu hängänämbamgänbä bähängänä wenämbä unin ku apdale päpi yiwixätngängäsä teyä usingu dolahaläk,” yang inikut. 11 “Manatänatäliyo. Äminbamu taun yiwixayingu undä anatäxaying, gä mängälä nomän täpä yangun. Ge wamu u yaläxu undä äpme tawake pahawit. 12 Hiyäkän. Nä apdale notnä. Tiwändeyä apdale notnä hikngä täpätu undan. Tike nä atumaha bimä. 13 Kupiläne ane yiwiyo. Ge gwäsiyā katapnim. Dasingga, notnäle natäkengu, äpmembä mängättnäle täke gandung yiwik. Using tahawixu täke. Tike wenä tiwänu, Yawele umande yänggat. Nätä äpme täke gandung yiwit. Ge une pekgayo. Tixawän gwäsi tiwik,” yang inikut, Boasdän.

14 Tiwänä bäläng kwayimnäne pexawän, axwakawikge tixawän, “Ämindä nandupnäng” yake enakut, inale “Mängälä täpätu bali sipmäng yäwäxawä bulätä epukaying womune kuk,” yang natäpnäng yakut, Boasdän. 15 Tikengu unetäkän using inikut. “Kwäman täwikga täpi dopän täpi wäsiwän,” yang iniwän, using tahawän, 25 kilo bali wälikngämike, täko gwäpikngämike, hipdunä taunde kukut.

16 Tixawän Rulu hawanäle kuwän, using inikut. “Ayina hikngä, kuwi dasing tahak?” yang iniwän, Boasdä ile dasingga pahakulu Rutdä undä inikut. 17 Inike, unetäkänu using inikut. “‘Hawakale moyo hikngä maxuyo,’ yake bali 25 kilo namik,” yawänä, 18 Naomitä inikut. “Ayina hikngä, wepdä yiwixayo. Tixawän dasingga tiwixu, äpme yawä natäpiläk. Inale wamu uläknga yawän nomätawikge, äpmanu Boasu doyiwän täkänanggekaying.”

## 4

### *Boasdä mängättnäle täkut, Rulun*

1 Tixawän Boasu taunde yämä däkäne, wamu inulung wopwom yiwik yäkakin womune päku, une puku yiwikut. Yiwixawänu, Elimelekege notnä Boasdä natäke yakut täpä une apgut. Apän, Boasdä inikut. “Notna, ane päkapu puku yiwit,” yawän, päku puku yiwikut.

2 Tiwänä Boasdä kuhiläle taun yiwixakinu 10 using päke yawän, un-uxäyā unekän päku puku yiwä, 3 itä notnä uläpä inikut. “Naomi hipdu Moapdä apgut täpätä kewu notnit Elimelekgäne moningge tek. 4 Ge ayäwa natäpiläkge natät. Ge gä notnitde natäke, ile kep kang yiwiläkge uhiwiläkge natäkengu, äminu ane puku yiwiyingu aläkwäk äwä notnambamde kuhiläle yiwixayingu aläkwäk yangge kayine uhing. Tike mehe natäkengu, nomän naniyo, tiwän natäpit. Inale, äminu täpätuyitä uhinangäsändo. Tike gäkän. Tiwänä nä unetä atumaha bimä,” yawän, äminu uläpäta, “Nätä äpme uhiwit,” yang yakut.

5 Tiwänä Boasdä yakut. “Täke hikgnä. Gä kewu Naomile kätaxune uhikengu, usinggän Rut Moap nanä kombälu uläpäxäyā aläpiläk. Ge ax-umgut äminde hängäläpä umanä täknga yangu using ayiwitning,” yawänä, 6 notnä uläpäta yakut. “Using kakengu, nä uhinangäsändo, inale moningu engangale yäminangäsä, moyo mumba kunäng. Ge gika uhing. Douhiwit,” yang inikut.

<sup>7</sup> Tápduxu unggwenggwenkätanu Israel nanä hängä täpätu äminde yanguhiningge natakenğu, äminu täpätutä bäläng yayikngä utdoke, äminu auhiwikge natäxakut täpäle imikakut, wamu uläknga yawä nomätänanggungun. <sup>8</sup> Ge notnä uläpätä Boasu, “Gika uhing,” yang inikengu, bäläng yayikngä utdoke imikut.

<sup>9</sup> Tiwänä Boasdä kuhiläle yiwixakinu uläkwäk äwä äminu undä une yiwikin yangu using yänikut. “Ginu äpmanu ananduxawä, Elimelekät wawakngä Malon awä Kilion yangge hängäläpä undä hikngä Naomile kätaxune uhinggat. <sup>10</sup> Unetäkän daniwilu, Rut Moap nanä Malonde kombälu uläpä nätä mängätnale tänggat, axumgut täpäle hängäläpä awä umanä täknga yangu usinggän yiwitningge. Ge bapunä gwende uman täknga itä teng yiwixäwik, Malonde notnäle uman yakengu, ile dombulämdäning, taunäxätanun. Ge ginu äpmanu ananduxawä uhinggat,” yang yanikut.

<sup>11</sup> Yawän, kuhiläle yiwixakin awä äminu undä yämä däkäne yiwikin yanggä yakin. “Hiyäkän, ninu angganduxätna uhinggalak. Yawetä mängätä yotdane kopixu uläpä tahawän, Reselkät Leaxätdä Jekopde engangu meyä dukngikumäläk bimä tiyok. Ge gä Efratkätanu hängäka meyä tiyok. Tixawän Betlehemkätanu umanda täknga yatäke kopnong. <sup>12</sup> Yawetä engangu mängälä uläpäle imän dukngikgamixu, inä tahawän gin yänggwälu Juda Tema yangge wawaxu Peres yänggwät tikut bimä tike, umansä käyä tiyok,” yang inikin.

#### *Rutdä Boasde wawak dukngikut*

<sup>13</sup> Tiwänä Boasdä Rulu yotnäne täke kuwän, mängätnä däkngawän, yiwikumäläk. Tiwän Yawetä kitokngä imän, tängäne käyä tiwän, engangu wäwi täpätu dukngikut.

<sup>14</sup> Dukngiwän mängälätä Naomi inikin. “Yawele uman tängenatnim. Itä äpmanu anggandung yiwitnangäsä täpätu anggamik. Äpme Israelkätanu wawakdäkä uläpäle uman täknga yatäke kopnong. <sup>15</sup> Tiwän itäyä yiwikyiwikga pahawän käluk tiwä, äminu täke tixawi, itä äpme gandung yiwik, inale ayikatä wawakga 7 itä tahanangäsä bimä täknga ayapmike, gäle butayä natäke, dukngikgaminggak,” yawä <sup>16</sup> Naomitä engang kápä betäxäwik, kang yiwikut.

<sup>17</sup> Tiwän mängälä inalängän yiwixakindä umanä Obet yang inike, “Engangu wäwi uläpä Naomile dukngikngämik,” yang yakin, ämimbamun. Tiwänä Obelu Jesile nanä, tiwän Jesi Dewitde nanä.

#### *King Dewitde bapunä*

<sup>18</sup> Peresde wawaxunetä sakngälatake ku King Dewilune kukulu using. Peresde wawaxu Hesron.

<sup>19</sup> Tiwän Hesronde wawaxu Ram. Tiwän Ramde wawaxu Aminadap.

<sup>20</sup> Tiwän Aminadapde wawaxu Nason. Tiwän Nasonde wawaxu Salmon.

<sup>21</sup> Tiwän Salmonde wawaxu Boas. Tiwän Boasde wawaxu Obet.

<sup>22</sup> Tiwän Obetde wawaxu Jesi. Tiwän Jesile wawaxu Dewit.

## Jona

### *Jona Tākelāpāle wam upukut*

<sup>1</sup> Yawetā Jona Amitaile wawaxu using inikut. <sup>2</sup> “Gā Niniwe\*,” taunu inulung hikngā unggāpangune kuyo. Ku duksāng yāninggāmātayo. Inale nā andayit, itā gutongā hikngā yiwik maliyingun,” yang inikut.

<sup>3</sup> Tiwāndeyā Jona Yaweale wam hapduke, Tasisde datākuwikge kukut.† Yawe teke datākuwikge, Jopa puku, siwu gwendu Tasisde kuwikge tahang-gawān kake, moningu uhike, unggwenune koke, Tasisde kukut.

<sup>4</sup> Tiwāndeyā sip gwenu axuxawān, kwāmanu Yawetā tewān, yanggā gwenune inulung hikngā apuxawān, yanggā gwenkāyā naxälā tāku temgut. Tinggawān sip uputnangāsā tikut. <sup>5</sup> Tiwān sipde wuyā āminu anaxälake, anātunāle ināinā tumuxu anggatāngyāminingge yaxāwik, “Asing pahana, sip gwenu kwāngā āpmembā tiwik?” yake, hāngälāpā une pekinu pāxāwik, yanggāxātan mumbā wukukin.

Meyā ulāknga apgulu, Jona siwu gälāmnā gwenkātan tāpu dāpmunā pekbulāmdaxawān apgut. <sup>6</sup> Tixawān sipde kuhilāle yiwixak kāpātā puku kake, “Meyā tāknga apuxawān, gā inale pekgalāk? Enake, anātukale tumuxu yang. Tiwān itā butayā āpmembā ninduke nipmambān yiwitnim,” yang inikut.

<sup>7</sup> Tixawān sipde wuyā āmindā inākān yakin. “Umaninu yamāke bekātan kekngälutnim. Tikengu iminde umanda tākengu ile meyāle apunggak yānim,” yake, using tahake, Jonale uman tākin.

<sup>8</sup> Tikengā Jona inikin. “Nining. Meyā ninde apunggaxu alāknga, iminde meyāle tiwān apunggak? Gā ina wuyā pahanggalāxunin? Tiwān sāne nanā? Gā kantri sanggāpangune nanā? Gā āminu salākwākāt nanā?” yang inikin. <sup>9</sup> Iniwāyā, Jonatā using yānikut. “Nā Hibru ulākwākāt nanā. Nā sopāsopā Yawe Anātu yekāwune nanā, kep, yanggā gwen yang pahakut tāpāle pukgalunin,” yang yānikut. <sup>10</sup> Yakapkāyā Jonatā “Yawe teke datāngapunggat,” yangu ayawān natāpginde, naxälā hikngā natake, “Usingu inale tahalāk?” yang inikin.

<sup>11</sup> Yanggā gwenu hipdu alāku temgulu yapmike, meyāmeyākān tāku temānggawān, “Gāle dasing tahana, yanggā alinggaxu kupitang yiwik?” yang inikin. <sup>12</sup> Iniwā yākwāle Jonatā using yānikut. “Ginu nāle wāyile tiwān, kwāmanu inulungu alākngatā apu pahawān malikaying. Ge nā yanggā gwenkātan tāke mumbā pukuwa, ulinggaxu wenā āpme tiwik,” yang yānikut.

<sup>13</sup> Tiwān wuyā āminu, “Sipgwenu āmbā tahana, kwayimune kuwik?” yake, yanggā duksāng hikngā kwayikin. Tiwāndeyā yanggā gwenu yakap tāku temgulu ayapmike, duksāng hikngā tāku temānggawān, tahawā tāke dolikut.

<sup>14</sup> Tinggawān Yaweale tumuk wamu using yakin. “Āminu alāpātā kupānu, manihipi kumnom. ‘Itā āminu nomān tāngukaying,’ yangu manatāngnimiyo, inale gā o Yawe, gika natake pahalāk,” yake, <sup>15</sup> Jona tāke yanggā gwenkātan mumbā pukukut. Tiwān yanggā gwenu duksāng hikngā tāku temgulu wepdā kupitang yiwikut. <sup>16</sup> U tahawān kake, wamu kitokngā yakin using,

\* **1:2:** Niniwe Asiliale taunu inulung hikngā gāpanggu. Asilia nanā Israel nanātāne iwanā. † **1:3:** Tasisu gusitdā pukunggak kāwut, tiwān Niniwe gusitdā akonggak kāwut.

sipde wuyä äminu Yawele naxäla hikngä natake, hikawu tänguke, ofale hawä ihikuxawän, tumuxu inikin.

<sup>17</sup> Jonä yanggä gwenkätan take mumbä pukuwänu, Yawetä natäpän, pisu inulungu gwendutä apu Jona guläpakut. Tiwän undan yiwixawän, täpduxu gwenalä gwendu apuxukin.

## 2

### *Jonale tumuk*

<sup>1</sup> Jona pisode bänipkätan yiwixäwik, tumuk wamu Anätunä Yawele <sup>2</sup> using yakut.

“Yawe, nä anaxälake yanggäwämba,  
näta natake yakumu gätä pahakuläk.  
Ämusing hikngä axumgin ämindä yiwixayingkätandä,  
tumuk wamu anggatängamiläkge yäwa,  
näle tumuxu anatäpguläk.

<sup>3</sup> Gätä mumbi,  
nä yanggä ämalan hikngä,  
yanggä bänipkätan epgum.  
Tiwän yanggätä täpän kopa,  
gäle yanggätä täku temäke pänguhikut.

<sup>4</sup> Tiwän using natäpgum.  
‘Gätä gika nomdanetä anawaläk.  
Tiwändeyä gika takwän yotda hipdu axawit.’

<sup>5</sup> Yanggätä täpän kopgum,  
tiwän pälä päkakopa hakin.  
Yanggä gäpmayi hikngä gwendä  
tängäna täpä undä hikngä täpän kopa,  
songäsongä yanggäne nanätä  
kuhitna gwenu wamgin.

<sup>6</sup> Nä täwan kemat hikngä aepgum.  
Kepdä yämä iwikiwik yiwitde alepän kuhingamikut.  
Tiwändeyä, Yawe Anätunatä  
gapmayinetä käluk takako tewi yiwikum.

<sup>7</sup> Nina natäpa, käluk yiwitnangäsä taknga wenä tinangge tiwän,  
Yawe, nä gäle natake,  
tumuxu yäwa,  
yot takwändanetä anatäpguläk.

<sup>8</sup> Hängä kitokngänä wenä ämindäkän kwätäluke  
tumuxu ile tahakaying äminu uläkwäxu,  
gwälam hikngä gätä pahangyäminggaläxu  
maha yämikaying.

<sup>9</sup> Tiwändeyä nä kawu gäle tayixäwik,  
gäle uman taknga yatängenaxäwik,  
hikawu gäle tänguke häwa ihikuwik.  
Wamu kitokngä u yakumu  
undä pahawit.

Axumnangäsä tiwändeyä,  
Yawetäkän käluxu nipmambän yiwixamängunin,”  
yang yakut.

<sup>10</sup> Tiwänä Yawetä pis gwenu iniwän, täku yanggä kwayimune watutekut, Jonan.

### 3

#### *Jona Tākelāpāle wam gwalamikut*

<sup>1</sup> Tiwānā Yawetā Jona hipdu using inikut. <sup>2</sup> “Gā Niniwe taunu inulung hikngā unggāpangune ku, wamu nātā ganinggalu yānitapso,” yang inikut.

<sup>3</sup> Tiwān Jona Yaweale wam tāwake, Niniwe kukut.

Taunu unggāpangu inulung hikngā, ge axu wuyā une pahananggengu, tāpduxu gwenalā gwendu pahanangāsā. <sup>4</sup> Ge tāpduxu yakap gwenu, Jona taunu unggāpangune kopgut. Ko tihikuxāwik, using yānikut. “Tāpduxu 40 apuxuwānu, Niniwe Yawetā alahawān maliwik,” yawān <sup>5</sup> natake, Niniwe nanā Anātule wamde bānip tike, “Naxu dohikngā nake takgā yiwitnim,” yakin. Yake āminu undā, umanā kāyā āwā umanā wenā yangu meyā natake, tāwixu meyā tākngatāne palapalangānā kāyā dākāndākā pahakin.

<sup>6</sup> Niniwele kingu wamu ulāknganin natake, meyā pāke, sia yiwixakut dākā teke epuke, tāwixu belakngā kinggāne utdopeke, tāwixu meyā tākngatāne palapalangānā kāyā pahake, mulup dākāxātan puku yiwikut. <sup>7</sup> Tikengā māmā wamu Niniwe nanāle kitokngā tāknga yatewān kukut. Using yakut.

“Wamu alāknga nā kuhitsāle yiwixatkāt, wuyā āminaxātdā using yākamāng. Amin āwā hikawu āmindā daying yiwixaying, inulung matekngā yang undā hāngā tāpātu manapā tiyok. Nak, yanggā yangu mahikngā nanong. <sup>8</sup> Amin, hikawu āmindā towikaying yangu undā tāwixu meyā tākngatāne palapalangānā kāyā pahanong. Pahake āminbamu undā tumuk wamu Anātulekān kitokngā yānong. Yaxāwik wāyi hikngā tākngalāknga āwā āminsiptāk tāknga yangu awenong. <sup>9</sup> Tiwān dasingga, Anātu ninde tokngā hikngā natāxu āpmembā teke, bāniyā tāpān tākwāmbān ‘Asipit,’ yang natak tāknga teke donihipik?” yang wamu using tewān epuxukut.

<sup>10</sup> Tiwān unin pahake wāyi hikngā tākngalāknga pahakakinu Anātutā awekinā dayipgut. Dayike, awahawān maliningge yakulu, bāniyā tāpān tākwāmbān, dowahawān malikin.

### 4

#### *Anātutā Niniwe āminde butayā natāpgut*

<sup>1</sup> Anātutā Niniwe nanā dowahawān maliwā, “Asipnangāsā pewān yiwixaying?” yake, Jona tokngā hikngā natāpān, bāniyā dākītā bimā ihikut.

<sup>2</sup> Tokngā natake, Yaweale tumuk yakut. “Yawe, yotna yiwixāwixu, ‘Axu yāwa bāniyā pāpā tākwāmbā dosipilāxunin,’ yangu dongganikum? Ile tiwān yakawu, Tasisde datākuwitde tahakum. Nā anatāpgum, gā Anātu butayā āmin. Tokngā yupsāngu donatake, gwālam hikngā pahangyāminggalāxunin. Natāndetdetda awāpi tākwāmbā, dowahawi malikayingunin, yangun. <sup>3</sup> Ge, Yawe, tewi kungānggāwa. Na kāluk yiwitde donatāt. Axupitde natāxat,” yang inikut. <sup>4</sup> Iniwān Yawetā inikut. “Gā tokngā inale natāxalāk?” yang inikut.

<sup>5</sup> Tiwān Jona yot gāpangu teke, gusitdā akonggak kāwut pāku gepmānā tahake, puku yiwixāwik, “Niniwe dasingga tiwān kawit?” yake kang yiwikut. <sup>6</sup> Tiwān Anātu Yawetā “Jona gusitdā ihiyāk,” yake, nawu kwāmbātduhimu Jonale gepma imikge natāpān alakut. Tiwān Jona nawu uxwambatde tāke hikngā natāpgut.

<sup>7</sup> Geyā kwepdātā gwāsi hikngā Anātutā natāpān, nawu uxwāmbālu gomokgomokgā matāwān kumgut. <sup>8</sup> Ge gusitdā akoxawānu, Anātutā wawuwawungu tokngā hikngā tāknga gusitdā akonggakātandā natāpān



apgut. Tiwänä gusitdä Jona kuhiläne ihinggäwän tahandambätakut. Axupitge natäke, “Nä käluk yiwitde donatät. Axupitde natäxat,” yang yakut.

<sup>9</sup> Tiwänä Anätutä inikut. “Nawu uxwämbätde tokngä inale natäxaläk?” yawänä, Jonatä yäkwäle using inikut. “Na tokngä täke natäxat. Tokngä hikngä natäke, axupitde natäxat,” yawänä, <sup>10</sup> Yawetä inikut. “Nawu axwämbälu kwepdän alakutnä, äpmanu gwäsi kungäk. Gätä doxwayikuläk. Tike uxwämbätde Gä wuyä täkngatu dowahakuläk, tiwändeya Gä butayä ile natäxaläk. <sup>11</sup> Äminu Niniwe nanä, hängä nomän bä gutongä yangu donatäxaying äminu 120,000 ayapmikut. Tiwän hikawu ämindä daying yiwixayingkäyä meyä hikngä. Dasingge tiwän taunu inulungu unggäpangge butayä donatäpit?” yang inikut, Anätutän.

## Wam Yäpuli

Anätule wam kende kamängu, äminu tupä hikngä nanä tiwän womduyine nanätäne kende kamäng. Hängänä täpätuyi äwä hängä u pahakakinu täkngatuyi yanggäne kendeke bulämnä natäxamäng. İle tiwänu, wamu täkngatuyile yäpuli ane temgumäng.

Wamu ane temgumängu, ABD yäkamäng using, yakawu leta A däkäneta ku leta wasekengä Y däkäne temgumäng. Ge wamu täkngatule yäpuli natäpäläkke natäkengu, wamu uläkngale leta yakap dakanin kayo. Wamu leta A däkäneta päkutnä kakengu, leta A bulämbam däkäle gepbine kayo. Tiwän wamu leta B däkäneta päkutnä kakengu, leta B bulämbam däkäle gepbine kayo.

*A*

**alta** Alta yangu däkixoxu hupdäkän temätäke koke ofa, Anätule häkakinunin.

*Ä*

*B*

**bali** Bali naxu rais bimä. Sälinä päke, yamänggämimbä, flawa dakngawä, bret häkayingunin.

*D*

**donggi** Donggi towiyä bimä. Tiwändeyä belakngä bimä, tiwän kitokngänä käyā. Ge ämindä ulängäne hängä täpänä meyä päko peke, päke tihikukayingunin.

*E*

*F*

**fik** Fixu pa däkätu. Tämnä kwälängä, tiwän sälinä ämindä näkayingunin.

*G*

**gupnä matäkin** Kontraxu Anätuxät Abrahamkät pahakumäläk täkngale yäxäwik, wäwile yämunde gup matäkaying.

*H*

**hos** Hosu towiyä bimä. Tiwändeyä belakngä, tiwän kitokngänä käyā. Ge ämindä ulängäne päko yiwixäwik tihikukayingunin. Bä hosu karis wamängyämä, hosdä tulipäke tihikukayingunin.

*I*

*J*

*K*

**kalis** Kalisu kalbimä. Tiwändeyä hosdä tulipäke tihikukakin.

**kamel** Kamelu hos bimä. Tiwändeyä belakngä hikngä, tiwän kitokngänä käyā. Ge ämindä ulängäne hängä täpänä meyä päko peke, päke tihikukayingunin.

**kerup** Keruwu ängela bimä, tiwändeyä gupnä kälap gup bimä. Anätutä hängä takwän täpäläpä dayingyiwitningge pekut.

**kis** Israel nanätä kis pahakakin. Äminu täpätutä notnäle alamnä molänätä täpik. Wäwi notnä ixät nanä bänip gwälänge using pahakakin.

**kontrak** Kontrak yangu äminu täpäyalätä wamu täkngatukän yake, “Nä usingu äpme tahawit, tiwän Gä using tahayo,” yake yatäpät kitokanggax-unin. Tuwäng wamu täkngatu using. Wäwi täpätuxät mängätnäxätdä miti yolune täko, pastol äwä ämin yangge kayine “Unekän yiwihika kumsim,” yang yäkamäläk.

*L*

**laion** Laionu pusimbimä, tiwändeyä bulämbam hikngä, tiwän kitokngänä käyä. Kälap, ämin yang sipmäke näkayingunin.

*M**N*

**nomän** Gwaxu Anätule kayine nomänu, ofale bä anananggengu täke.

*O*

**ofa** Ofa yangu hängäläpä Anätule imikakin täpäläpänin.

**olip** Olip yangu pa uman. Ile salin pängsäpä, yanggäyi apukakin.

*P*

**pris** Prisu äminbamde meyä päke, ofa äwä tumuk yangu Anätule pahakakin ämin unin.

**profet** Profelu Anätutä “Using tiwik,” yang yänixawän yatapmäkaying ämin unin.

*R**S*

**sekel** Moning bä hängäle meyä.

**silwa** Hängä moninggä uhikamängge bimä silwatä uhikakin.

**sipsip** Sipsiwu towiyä bimä, tiwändeyä dängämnämbängän. Tiwän Israel nanätä gwakngäle äwä dänggämnätä täwik pahaningge, il tiwän towikayingunin.

*T*

**taunde yämä däkä** “Iwanindä apu nihipnäng,” yake, yot gäpangge kwayimune dämän pahakakin. Tiwän aepuxuningge, yämä sipmäkakin. Taunde yämä däkäne, wamu inulung wopwom yiwik yäkakin.

**towikngä** Hängä täpä uhike, towikngä däkngakaying usinggän, hängänämbängän ämindä äminu puyänä pahangyämningge uhike, towikngä däkngakakin.

*U**W*

**wain** Wainu naxu täpätu tomato bimä. Awahawä dopä, talangu däpi mapä koke, salinä meyä kwämbätkwämbät alakaying. Bulä alawä, ämindä päkapu peke, bälänggä yayinggämike, yanggäyi päke, säkge pewä yiwitake kuhika, yanggä nomänu tiwäyä tängokayingunin.

**wit** Wilu rais bimä. Nak yolune pewä, wäyi dolikayingunin.

*Y*

**yis** Yisu flawatä täkäningge, flawane pewä, flawa täkawäyä, hängäkayinguing. Tike flawa yupsäng häningge natäkengu, yisu dowexayingunin.